




თ. ითხევის გამ. საზოგ. გამოცემა, № 171

მეორე წიგნი

კავკასიონი

ავტორის ფაქსიმილეთი

მეორე გამოცემა



ტფილისი

ქალაქთა კავშირის სტამბა.

1919

ქ. ქ. წერა-გითხვის გამ. საზოგ. გამოცემა, № 171

მეორე წიგნი

ტ. კენესტა
K 35.141
2

ავტორის ფაქსიმილეთი

მეორე გამოცემა

ტფილისი.

ქალაქთა კავშირის სტამბა.

1919

Խոս շին, չը եկացաւ, և չ-
լուս չէր առաջաւ. Կառավար պաշ-
տուս առաջ հեգուն ցամացոյ-
տա Խոյացիստա, ի, թւ բաւարա-
բ ձեւ յան, ու ձեւամբ Շ
ահնաշինուած օնցուուս ք-
այի սպազմա.

օդան ժա

Պահանջման
1908 թ.

2 Խոյացիստա

„არ გვინდა, არა!“

(სურათი)

— ტყუილად შევეცდებით, თქვენო კე-
 თილშობილებავ, არ ისურვებენ! — უთხრა
 მღვდელმა ბოქაულს, როდესაც წირვის შემდეგ
 გალავანში გამოვიდნენ და დაბურული ხის ქვეშ
 დადგნენ. მათთან ერთად დადგა კიდევ ერთი
 სერთუკოსანი ახალგაზისა, რომელიც იმათ გა-
 მოსვლამდის გალავანში დადიოდა და ხან რო-
 მელს საფლავის ქვას დააკვირდებოდა და ხან
 რომელს. ახალგაზდა ხმა-ამოუღებლად ამოუღა
 ბოქაულს მხარში და თავჩაღუნულმა მიწაზე
 ჯოხით რაღაცის ხაზვა დაიწყო.

იქვე ახლოს ქუდ-მოხდილები და გულ-
 ხელდაკრეფილები იდგნენ სოფლის მოხელენი
 და კიდევ რამდენიმე გლეხი და დაღვრემილები
 გასცემეროდნენ ცის სივრცეს. „რად შეგვაყრე-
 ვინა ნეტა ეს სოფელი, — პფიქრობდნენ ისი-
 ნი: — იქნება კიდევ რამე გამოგვიტყვრინა და
 ამ სისხლი-პური ჭამის დღეს უნდა მოგვაცდი-
 ნოს. კაი საქმე-კი არ იქნება, ხარჯი უნდა მო-
 გვიმატონ, რომ მთელი სოფელი შეგვაყრევი-

ნა“-ო, ჰეთიქრობდნენ და ვერ გამოეცნოთ, რა
მიზეზით უნდოდა ბოქაულს სოფლის ყრილობა...

— მაშ მაგრე გგონიათ, მამა? — ლიმი-
ლით უპასუხა ბოქაულმა და ბოლთის-ცემა დაიწ-
ყო ხის ქვეშ.

მღვდელი ამ დროს დაებჯინა შევერცხ-
ლილ თავიან ბზის ჯოხს, იღლით დაეყრდნო
და მოსიარულე ბოქაულს თვალს ადევნებდა.
ბოქაული ამ ტრიალის დროს, რაც ძალი და-
ლონე ჰქონდა, ულვაშებს უბერავდა. ხან დო-
ინჯს შემოიყრიდა და ლამთქნარებით ზანტად
გადიჭიმებოდა წელში, თითქოს ტკბილის ძი-
ლიდან ეს არის ეხლა გამოაღვიძეს და ლოგინ-
ში იზმორებაო; ხან ხმალზე ხელს წაივლებდა
და გახოკილ დედამიწაზე მაგრად გაუსვამდა;
ხან კიდევ უეცრად შედგებოდა და წალის ქუს-
ლებებე უცბად მოტრიალდებოდა. ბოლოს, მიუ-
ბრუნდა გლეხებს და ბრძანების კილოთი მამა-
სახლისს დაეკითხა:

— ყველას შეატყობინე?

— ყველას, შენი ჭირიმე! — უპასუხა მამა-
სახლისმა.

— შეიკრიბნენ კიდევაც?

— კანცელარიასთან არიან შეკრებილები
და შენს მობრძანებას ელიან.

— კარგი, წადით და უთხარით, პრისტა-
ვი ეხლავე მობრძანდება-თქო.

— ეხლავე, შენი ჭირიმე, ბატონო!

მამასახლისი და სხვა გლეხებიც მაშინვე
გაბრუნდნენ და, ვიდრე გალავნის კარებს არ
გასცდნენ, ქუდები არ დაუხურავთ.

— და, და, მამაო, ტყუილად გგონიათ,
ვითომ გლეხები არ ისურვებენ.

— მე, თქვენო კეთილშობილებავ, გამოც-
დილებამ დამარწმუნა, რომ არ ინდომებენ.

— როგორ?

— ისე, რომ ამ ოთხის წლის წინად, მის
უსამღვდელოესობის უქაზის თანახმად, სამ-
რევლო სკოლა გავმართე და, აი, დღეს იმისი
ხსენებაც აღარ არის. ამისი მიზეზი გლეხები
არიან. წარმოიდგინეთ, თქვენო კეთილშობი-
ლებავ, მეორე წლის გასვლამდის, ერთი რა არის,
წამლად ერთი ბავშვიც აღარ დაიარებოდა სკო-
ლაში, თუმცა-კი პირველს წელს ზედა-ხორა ჰქო-
ნდათ და ადგილის უქონლობით ბევრი არ მი-
ვიღე.

— ეე, მამაო, სამრევლო სკოლა რა სახსე-
ნებელია სამინისტრო სკოლასთან, რომლისთვი-
საც ათასნაირი პოპერიტელსტვოები და ინსპეკ-
ტორსტვოებია დაარსებული, რომელშიაც სულ

იმისთანა სპეციალისტი, როგორიც ვლადიმირ სერგეიჩია, მასწავლებლები ინიშნებიან. ვლადიმირ სერგეიჩმა გორის საოსტატო სემინარია დამთავრა და მოწმობაც კარგი მიიღო... რა-საკვირველია,—განაგრძო ისევ ბოქაულმა, რო-დესაც ისინიც კანცელარიისკენ წავიდნენ:— ვლადიმირ სერგეიჩისთანა მასწავლებლები კარ-გად წაიყვანენ საქმეს. ესეც რომ არ იყოს, სირცხვილიც არის, რომ ორას კომლიანს სო-ფელში სამინისტრო სკოლა არ არსებობდეს. აქ, რასაკვირველია, სამრევლო სკოლა არ ივა-რგებს. სამრევლო სკოლები იმ სოფლებში უნ-და გაჰმართონ, სადაც ათიდგან ოცამდის კომ-ლი მცხოვრებია, ან კიდევ ცოტა მეტ-ნაკლები.

— ეგ სულ ერთია, თქვენო კეთილშობი-ლებავ, სამრევლო იქნება თუ სამინისტრო, არ იხეირებს, როდესაც გლეხებს სწავლის სურვი-ლი არა აქვთ. გლეხს რო სწავლის მნიშვნელო-ბა ესმოდეს, იმისთვისაც კარგი იქნებოდა, მაგ-რამ რო არ ესმით, რას ვიზამთ!

— რო არ ესმით, უნდა გავაგებინოთ. აი, ეხლა ვნახავთ, რა სიხარულით მიიღებენ ჩვენს წინადაღებას, როდესაც... როდესაც ვლადიმირ სერგეიჩი აუხსნის სწავლის მნიშვნელობას.

ვლადიმირ სერგეიჩმა გაიღიმა ამ სიტყვებ-

ზედ და თვალშინ წარმოიდგინა, თუ როგორ
გამოვალ შეკრებილი ხალხის წინ ამ რამდენისამე
წუთის შემდეგ და დავიწყებ ჩემ „სიტყვას“, რო-
მელიც ხალხს აღტაცებაში მოიყვანს და დაუ-
ყოვნებლივ სურვილს გამოაცხადებსო. „გლე-
ხებმა,—გაიფიქრა ვლადიმირ სერგეიჩიმა:—თა-
ვიანთ აღტაცების გამოთქმა ტაშის დაკვრით არ
იციან, თორემ, როცა ჩემს სიტყვას გავათავებ,
ტაშის ხმა გაისმის ხალხში.“ მერე წარმოუდგა
თვალშინ, ვითომ ვლადიმირ სერგეიჩი უკვე
დაამტკიცეს მასწავლებლად და სალდათობისა-კი
აღარა ეფიქრება-რა. ის იქნება და ის, ვეღარ
წამიყვანენ სალდათად და დროს ტყუილად აღარ
დაშაკარგვინებენ. სალდათობა რომ მოაგონდა,
ტანში ჟრუანტელმა გაუარა და ბოქაულის მი-
მართ მადლობით აივსო. „ეგ რო ჩემი ნათესავი
არა ყოფილიყო,—ამბობდა თავის გულში ვლა-
დიმირ სერგეიჩი:—და ხელის გამართვას არა
სცდილობდეს, ხომ მე ადგილს ვერ ვიშოვი და
სალდათობა არ ამცდება, რადგანაც თავისუფა-
ლი ადგილი აღარსად მოიძებნება“-ო... ამ ფიქ-
რებში ჩვენი ახალგაზდა დავალიანებულის კაცის
სახით შესცემეროდა ბოქაულს, რომელიც უკვე
გაჩუმებულიყო და თავის ფიქრებს მისცემოდა.
იმას უნდოდა მადლობის ნიშნად მივარდნო-

და ბოჭაულს და გაეკოცნა, მაგრამ შუამავალი მღვდელი უშლიდა ხელს.

ბოჭაული-კი კმაყოფილის სახით გაიცემი-რებოდა წინ და ისიც თავის მხრით ტკბილს ოცნებას ეძლეოდა. რა წამს ხალხს გამოვუცხა-დებო,—ოცნებობდა ბოჭაული,—მაშინვე მიიღე-ბენ ჩემს წინადადებას და ამით ჩემს ნათესავს ვლადიმირ სერგეიჩს, ჯერ ერთი, სალდათობი-საგან დავიხსნი, მეორე კიდევ, თავის ლუკმას გავუჩენ. მერე ვლადიმირ სერგეიჩი, რასაკვირ-ველია, მადლობის გადასახდელად გაპგზავნის გაზეთში წერილს და ქებას დამიწყებს, რომ იმის დაუცხრომელი მეცადინეობით ამა-და-ამ სო-ფელს სამინისტრო სკოლა ელირსა და გლეხებს განათლების გზა მიეცაო. რასაკვირველია, ჩემს მეცადინეობას ერთი-ორად ასწერს და, ოჰ, ვინც წაიკითხავს, მაშინვე წამოიძახებს: „აი, ამისთანა პრისტავები უნდა გვყავდეს პატარა ბლომად, რომ...“ მაგრამ ამ დროს, თითქოს ყურში ჩასძახა ვინმეო, მოაგონდა გალავანში მღვდლი-საგან ნათქვამი სიტყვები: „არ ისურვებენო.“ ამ გარემოებამ, ცოტა არ იყოს, აუმღვრია სუ-ლი და აფიქრებინა: „მართლა რომ არ მოინ-დომონ, მაშინ ხომ ყოველი ჩემი ცდა სულ ტყუილად ჩაივლის!... ჰმ!.. როგორ შეუძლიანთ

გამიბედონ და უარი მითხრან!“ — ხმა-მაღლა წა-
მოიძახა უკანასკნელი სიტყვები ბოქაულმა და
მრისხანე თავის გაქნევით შეხედა კანცელარიის
წინ შეყრილს გლეხებს, რომლებიც იმის დანა-
ხვაზედ წამოიშალნენ და ქუდ-მოხდილები გა-
ჩერდნენ.

ბოქაულმა ვერც-კი გაიგო, როგორ მი-
ვიდა კანცელარიამდის. რაკი დაინახა ხალხი,
მრისხანე სახე უფრო მოიჭმუხნა და კანცელა-
რიის დერეფნის გრილოში ამაღლებულ ადგი-
ლზედ ავიდა.

— გამარჯვებათ თქვენი! — დაიძახა მაშინვე
იმან.

— კეთილი იყოს თქვენი მობრძანება! —
უპასუხეს აქა-იქიდან გლეხებმა.

— ხალხო, — სთქვა შემდეგ ბოქაულმა! —
იცით, დღეს რისთვის შეგყარეთ ერთად?..

— არ ვიცით, ბატონო! — უეცრად გაი-
სმა ხალხში ხმა და ბოქაულს სიტყვა გააწყვე-
ტინა.

— ჰო, ეგ მეც ვიცი, რომ არ იცით, და
ი ეხლავე გეტყვით, — დაიწყო ისევ ბოქაულმა
და ცოტა ხანს შემდეგ განაგრძო: — თქვენ უვი-
ცები ხართ, არაფერი გესმით! ქვეყანაში სცხო-
ვრობთ და არ იცით-კია, რა ხდება თქვენს

ცხვირწინ! განა თქვენი ცხოვრება ცხოვრებაა?!
არა, თქვენ მხეცურად სცხოვრობთ...

ხმა-გაკმენდილი ხალხი გაკვირვებით ჰქონდა:
„ნეტა, პრიჭტავი ზომ არ გადარეულა,
რომ ასე გვლანძლავსო.“

— თქვენ რომ გესმოდეთ რამე, თქვენ
რომ ცოდნა გქონდეთ, მაშინ აგრე აღარ იცხო-
ვრებდით, მაშინ სხვანაირად მოეწყობოდით...

— ჩვენთვინაც კარგი იყო, შენი ჭირიმე,
რო ვიცოდეთ რამე, მაგრამ ჩამგონებელი არა-
ვინა გვყავს! — წამოიძახა ბოქაულს ახლო მდგომ-
მა ერთმა გლეხმა.

— აქნობამდის თუ ჩამგონებელი არა გყავ-
დათ, — ბოქაულმა დაიხვია ხელზე გლეხის სი-
ტყვები, თორემ აღარ იცოდა, ქვეით რა ეთქვა
და ან როგორ ელაპარაკნა ვლადიმირ სერგეი-
ჩის შესახებ, — ეხლა გიჩნდებათ. აი, ეს იქნება
თქვენი ჩამგონებელი და მასწავლებელი, ეს გა-
მოგიზრდით შვილებს და გასწავლით, როგორ
უნდა ცხოვრება კაცურად, თუ-კი მოისურ-
ვებთ და ინდომებთ სამინისტრო სკოლის გა-
მართვას...

— როგორია ე სამინიჭტრო სკოლა? —
დაეკითხა ერთი ახალგაზდა, ოც-და-რვისა თუ
ოც-და-ათი წლის გლეხი, რომელიც კანცელა-

რიის წინ მიქუჩებულ ქვებზედ შემდგარიყო და
დაყრდობილი ყველას თავს დასცეროდა.

— აი, ეხლავე აგიხსნით ეს ყმაწვილი, რო-
გორიც არის და რა მნიშვნელობაც ექმნება
თქვენს ცხოვრებაში ამ სკოლას. აბა, ვლადი-
მირ სერგეიჩი, აუხსენ ყველაფერი, მიჰმართა
სერთუკოსანს ახალგაზდას და თითქოს განვებ
გაკეთებული ამაღლებული ადგილი დაუთმო
მომავალს მასწავლებელს.

ვლადიმირ სერგეიჩი შედგა ამაღლებულს
ადგილზედ და იქიდგან ხალხს რამდენჯერმე გა-
დაავლო თვალი. სერთუკოსანი კარგა ხანს იდგა
დაფიქრებული და ხმა ვერ ამოელო, რადგანაც
მეტის-მეტი აღელვებისაგან, როგორც ამბობენ,
„სული ყელში მოებჯინა“.

როგორც იყო, ძლივს-ძლიობით აღახვნა პი-
რი და აკანკალებულის ხმით წამოიძახა: „ხალხნო
და ჯამაათნო!“ ხალხი ამ ხმაზედ გატვრინდა და
„სული განაბა“. ვლადიმირ სერგეიჩიმა განაგრძო
თავისი სიტყვა ისევ აკანკალებულის ხმით და
თან მთელის ტანით თრთოდა. ეს მხოლოდ პი-
რველში მოუვიდა. რაც დრო გადიოდა და,
როგორც იტყვიან, „თავის როლში შედიოდა“,
იმის ხმას სიმაგრე და სიმაღლე ეძლეოდა, ტა-
ნის თრთოლა უცხრებოდა, და ცოტა ხნის შემ-

დეგ მთლიად დამშვიდებული ხელების ქნევითა და სხვა-და-სხვა ჰანგებით ჰლალადებდა ხალხის წინაშე. ვლადიმირ სერგეიჩმა დაწვრილებით აუწერა ხალხს სამინისტრო. სკოლა. ჯერ ის აუხსნა, სამინისტრო სკოლა ვის მზრუნველობის ქვეშ არის და ამისთანა სკოლებში მასწავლებლად ვისა ნიშნავენ. ამ საგნის შესახებ ბევრი ილაპარაკა და, სხვათა შორის, ისა სთქვა, რომ მასწავლებლად მარტო იმას ჰნიშნავენ, ვინც დიდს სკოლას გაათავებსო, იმ სკოლასაო, სადაც მასწავლებლებს ამზადებენო. „იქაო,—განაგრძო ვლადიმირ სერგეიჩმა:—ყველაფერს, ყველაფერს ასწავლიანო“.

შემდეგ ილაპარაკა იმის გამო, თუ ყმაწვილებს როგორ ექცევიან სკოლაში სწავლის დროს, ან როგორ და რას ასწავლიან. როცა ვლადიმირ სერგეიჩმა სკოლის აღწერა გაათავა და დაიწყო, რა მნიშვნელობა ექმნება ამისთანა სკოლას ხალხის ცხოვრებაში, მაშინ იმის ფრთა-გაშლილს აზრს საზღვარი არა ჰქონდა. რა სიკეთე გინდათ, რომ არ ეხსენებინოს, რომ სკოლის შედეგად არ დაეხატოს... „შეიძლებო,— სთქვა მან ბოლოს:—ერთს ბედნიერს დღეს თქვენი შვილები ჩინებით და ორდენებით პოლკოვნიკის და გენერლის მუნდირებში მოგივიდეთ...“

მაშინ ვინ აღწერს თქვენს სიხარულს?! მაშინ ვიღა გიცნობთ, რომ თქვენ ოდესალაპ უბრალო გლეხები იყავით“-ო. რომ ეს შესაძლებელია, მაგალითად მოუყვანა ლომონოსოვი და კიდევ უცხო ქვეყნების რამდენიმე სხვა სახელოვანი კაცი. „აი, ასეთი ბედნიერება მოგენიჭებათ,—დაასკვნა მან:—თუ მოისურვებთ სკოლის გამართვას და იკისრებთ იმის შესანახ ხარჯს, დანარჩენი ჩვენ მოგვკითხეთ. ჩვენ თითონ დავამტკიცებინებთ თქვენს განაჩენს და თქვენ აღარას შეგაწუხებთ“-ო. ვლადიმირ სერგეი იჩი გაჩუმდა. ახალგაზდა კაცმა გადაავლო თვალი ხალხს და ჰკვირობდა, რომ ხალხი გაჩუმებული იყო, მუნჯობდა და თავის აღტაცებას და სურვილს არაფრით არ აცხადებდა...

— გავათავე!—უეცრად წამოიძახა სერთუკოსანმა. იმას ეგონა, ხალხი იმის გამოა გაჩუმებული, რომ კიდევ მოელის რასმეო.

არც გათავების მოგონებამ გამოიყვანა გლეხები სიჩუმიდგან. ამ გარემოებამ სულ ერთიანად დაანელა ის და მაშინვე თავისდა უნებლიერ გაიფიქრა: „ნუ თუ ჩემმა სიტყვებმა ამათზედ არავითარი მოქმედება არ იქონიეს?“ ამ დროს ბოქაულმა წაავლო ხელი მკლავში და აღტაცებით უთხრა:

— მშვენიერი სიტყვა იყო! აი, ამისთანა
სიტყვები უნდა გააგონონ ხოლმე ხშირად, რომ
გლეხები გონს მოვიდნენ. არა, მამაო? — დაეკი-
თხა ბოქაული მღვდელს, რომელიც იმათ მიუ-
ახლოვდა და ვლადიმირ სერგეის ულოცავდა
მჟერმეტყველების უნარს.

— მშვენივრად განმარტა, მშვენივრად! —
უპასუხა მღვდელმა.

— მეც მგონია, კარგად ვსთქვი, მაგრამ
ამათი სიჩუმე რას მივაწერო? — წამოიძახა ვლადი-
მირ სერგეიმა და თვალები ბოქაულს მიაშტერა.

— ხალხო, — დაიძახა ბოქაულმა! — ხომ გაი-
გეთ ყველაფერი?

— გავიგეთ, ბატონო! — დაიძახა რამდენ-
მაშე გლეხმა.

— ჰო და, თუ გაიგეთ, რაღას გაჩუმებუ-
ლხართ და არას ამბობთ?

ხალხში რაღაც ხმა-დაბლა ლაპარაკი ჩამო-
ვარდა და ყველა ისევ ჩქარა მიჩუმდა.

— ჰა, შევადგინო პროტოკოლი, რომ
სკოლის გამართვის თანახმა ხართ?

ხალხში ისევ ხმა-დაბალი ჩოჩქოლი ჩამო-
ვარდა.

— მაგრე რას ყაყანებთ?.. ვისაც სათქმე-
ლი აქვს რამე, ხმა-მაღლა სთქვას?

— მე მაქვს სათქმელი, შენი ჭირიმე, ბატონო, და ვიტყვი კიდეცა, თუ არ გამიწყრები!

— წამოიძახა იმ გლეხმა, რომელიც წინად დაეკითხა: „როგორია სამინიჭირო სკოლაო.“

— ხალხო, გაჩუმდით! ენდე, ე მაგას უნდა დოფაპარაკი. შენი სახელი? — გაწყვიტა სიტყვა ბოჭულმა და სახელი ჰქითხა გლეხს.

— სესია მქვიან, ბატონო!

— ჰო, სესიას უნდა თქვას რამე, გაჩუმდით, — დაიძახა ბოჭულმა, როცა გლეხმა თავისი სახელი უთხრა.

დანარჩენი გლეხები გაჩუმდნენ და სესიას დაუწყეს ცქერა.

— როგორ განგებ მაღლაც შემდგარხარ! — სიცილით მიჰმართა ბოჭულმა და შემდეგ დაუმატა: — აბა, სესი, დაიწყე!

— ის უნდა მეთქვა, — დაიწყო სესიამ: — რომ ე სამინიჭირო სკოლა, ღვდელს რო სკოლა ჰქონდა, იმასა ჰგვანებია.

— იმას არა ჰგავს, — დაიძახა ბოჭულმა და სიტყვა გააწყვეტინა: — მღვდლისა სამრევლო სკოლა იყო.

— სამრევლო იყო თუ რომელი, ისე-კი ასწავლიდა მღვდლის შეილი, როგორც ენდე ე ყმაწვილმა ილაპარაკა. იმ სკოლაში ოვეში თირ-

თუ მანათს ახდევინებდა შაგირდებს. ვინცა სწავლობდა, ის იხდიდა, შენი ჭირიმე. აი, ე ყმა-წვილმა სკოლაზე რომ ილაპარაკა, იმისთვის-კი ყველამ უნდა ვიხადოთ. შენი შვილი ისწავლის თუ არა, მაინც უნდა იხადო...

— მაშ ერთმანეთს არ უნდა დაეხმაროთ!? —
სასტიკად უთხრა ბოჭაულმა.

— მე იმას როდი ვიძახი, ბატონო, რო არ უნდა დავეხმაროთ-მეთქი. ჯანი და სული წავიდეს, დეე, ყველამ ვიხადოთ, მაგრამ რად უნდა ვიხადოთ, როცა ბალლები ტყუილად სცდებიან, როცა სკოლაში არაფერს აკეთებენ...

— როგორ თუ არას აკეთებენ? მაშ წიგნს არ ასწავლიან? — გაჯავრებით ჰკითხა ბოჭაულმა.

— ასწავლიან-კი, მაგრამ რა ნაირად ასწავლიან?! „ანაბანას“ ძლივას დაასწავლიან, მერე ისიც ავიწყდებათ. ტყუილად იძახდა ენდე ე ყმაწვილი, რო თქვენი შვილები იარანალ-პოლ-პონიკები დახდებიან. იარანალ-პოლპონიკად მაგრე ადვილად რო დახდებოდნენ, რატო თითონ არ გახდა, მაგას უფრო დიდ სკოლაში არ უსწავლია?.. არა, ჩემო მამავ და ძმაო, ჩვენ, აი, ე მიწის შვილები ვართ, ჩვენ მამა-პაპას ე მიწისთვის შაულევია სიცოცხლე და ჩვენც ისე უნდა შავალიოთ. ჩვენ უნდა ვხნათ და ვთესოთ, ლვინო

და პური მოვიყვანოთ. აი, თუ-კი იმისთანა სკო-
ლას გაგვიმართავთ, რომ კარგა ხენა-დათესვა
და პურისა და ლვინის მოყვანა ვისწავლით, მა-
შინ ვინ თავ-მკვდარი ხარჯს გაექცევა და ფულს
დაინანებს. აი, გვიწინამძღვრეთ და ისეთი სკო-
ლა გაგვიმართეთ, როგორიც წინამძღვარიანთ-
კარის სკოლაა. ეე, თქვენი ჭირიმეთ, ხალხო,
რეებს არ ასწავლიან! გაზაფხულზედ ჩემ ცოლე-
ურთან ვიყავი. ჩემი ცოლი-ძმამ მითხრა: „აბა,
წამოდი, ჩვენი სკოლა ნახე, ხომ არ გინახამ-
სო“. „არა მეთქი“ და წავედით. რო არ შავე-
დით, ხალხო, თვალი ზედ დამრჩა იმათ მუშაო-
ბაზედ. საკვირველება რამ იყო. ი თითი სიგძე
ბალლები ისე ლამაზათა ბარამდნენ, რო მეც-კი
ვერ დავბარამ ისე. მასწავლებელიც თავს ედგა
და, როცა შესცდებოდათ, ასწავლიდა. მერე იმან
წამიყვანა და ბალლების ნამუშავარი მაჩვენა.
რეები არა ვნახე, ხალხო, ვინ ჩამოთვლის! ვუ-
ცქეროდი ი ბალლებისაგან გაკეთებულ სკამებსა,
გუთნებსა და ვკვირდებოდი. არა მჯეროდა,
თუ იმათი გაკეთებული იყო. ახლა ეზოს გარედ
გამიყვანა და მინდორზედ გამახედა: „აი ე ჯე-
ჯილებს ხო გედავო.“ „ჰო მეთქი“. „ჰოდა, ეგენი
სუ ი ბალლების მოხნულ-დაფარცხულიაო.“ აი,
დიდება შენთვის ღმერთო! ვუცქეროდი იმ შვე-

ნიერ ჯეჯილს და ვნატრობდი: „ნეტავი ჩემი
შაქრიკა ერთი რვა-ცხრა წლისად მიქცია ღმე-
რთმა, რო წამამეუვანა და აქ მიმებარებინა-მე-
თქი.“

— მეცა ვნახე ი სკოლა! — წამოიძახა ამ
დროს ერთმა გლეხმა.

— ხო მართალს ვამბობ? განა, გოგლა,
სულ ბალლები მუშაობენ?

— მართალს ამბობ, ღმერთმანი, მართალს!
— უპასუხა გოგლამ.

— ჰოდა, მართალს ვამბობ! აი ე პრიჭ-
ტავი აქა ბრძანდება და ვთხოვოთ, რო ისე-
თი სკოლა გაგვიმართოს..

— მაგისთანა სკოლების გამართვა ჩვენ არ
შეგვიძლიან. სამინისტროს სკოლებს ეგეთებს
არ ჰესნიან და ამისათვის მაგას თავი დაანებე,
ტყუილად ბევრს ნუ ლაპარაკობ, — უთხრა ბო-
ქაულმა სესიას.

— ამისთანას არა ხსნიან და მაშ ნურც
სხვანაირს გაჰესნიან. ხალხო! — მიუბრუნდა მერე
ხალხს: — ხომ იცით, აგერა, აი, იმ სოფელში რო
სკოლაა. ისიც, მგონი, სამინისტროა. ეხლა იქ
გლეხები ბევრსა ნანობენ: „ნეტავი ღმერთი
გაგვწყრომოდა და ხელი არ მოგვეწერა სკო-
ლის გამართვაზედ. ამოდენა ხარჯს სულ ტყუ-

იღად გვახდევინებენო. ოღარ გვინდა სკოლაო, მაგრამ ვიღა გიჯერებს, რაკი ერთი მოვაწე- რეთ ხელი, ახლა ძალად გვახდევინებენო. გინ- და თუ არა, უნდა იხადოთო.“ მართლა-და, ოროლი მასწავლებელი იმათ ბატონებად გაჰ- ხდომიან და სულს ართმევენ. არა, ხალხო, არ შესცდეთ და ხელი არ მოუწეროთ!— მაღლა დაიძახა ეს სიტყვები სესიამ და თვალი გადაავ- ლო გაჩუმებულს ხალხს.

ბოჭაული ამ სიტყვებმა სულ ერთიანად გააცეცხლა. შეჲგა უეცრად ამაღლებულს ად- გილზედ და სასტიკად შესძახა:

— ხალხო, ე ჩაგ სულელს არ გაუგო- ნოთ და უარი არა სთქვათ!..

— სულელი რადა ვარ, შენი ჭირიმე, ბატ...

— გაჩუმდი, თორემ ეხლავე ტყავს გაგაძ- რობ!...— შეუტია ბოჭაულმა.

— ტყავი რად უნდა გამაძრო, ისეთი რა დავაშვე. ჯერა გვკითხავ და მერე...

— არ ეყურება ამასა!.. შენ ეი, მისამარ შენ- თვის იყავ, თორემ ციხეში დაგალპობინებ. შენ ვინ მოგუა ნება, ეგრე ცუდად მოიხსენიო სამინი- სტრო სკოლა. მაგით შენ მთავრობას ლანძღავ, ხალხს უჯანყებ. — ბოჭაული თან-და-თან უფრო ცეცხლდებოდა და პირიდან დორბლსა ჰყრიდა.

— მე არც არავინ გამიღანძლავს და არც არაფერი. მე...

— კიდევ! მამასახლისო, გაათრევინე ეგ...

მამასახლისმა არ იცოდა, რა ექნა, საცოდავად იდგა გაოცებული და ხალხს გაშტერებით შესცემოდა.

— რად უნდა გამათრიოს, რა დავაშავე! —
სესია უფრო უხირდებოდა და სიტყვას არ უთმობდა ბოქაულს, რაც, რასაკვირველია, იმის კეთილშობილების თავმოყვარეობას ძალიან არ მოსწონდა.

— არ გეყურება, დაიჭირე-მეთქი?! — დაილრიალა ბოქაულმა და საცოდავ მამასახლისს ერთი ისეთი მათრახი გადაპკრა, რომ გველივით გადიკლაკნა. იმის შემდეგ-კი იკადრა მამასახლისმა, მაშინვე მეველეებით მიჰვარდა სესიას, მაგრამ სესია გძელი კომბლით იგერიებდა და ახლოს არ უშვებდა მეველეებს.

— დაიჭით, დაიჭით! .. — უყვიროდა ბოქაული.

— დაპკარით! — დაუძახა მეველეებს თავის მხრივ მამასახლისმა, რადგანაც ეშინოდა, რომ ბოქაულს კიდევ არ ეთავაზებინა იმისთვის.

მეველეებმა დაკვრით-კი არ დაპკრეს, მაგრამ დაიჭირეს-კი. სესია თითონვე დაპნებდა,

როდგანაც იფიქრა: „რო გავუძალიანდე, ვაი
თუ უფრო ძვირად დამიჯდესო!“
სესია გაათრიეს.

— წაიყვათ, ჯერ ერთი სამი დღე ბოსელ-
ში შეამწყვდიეთ, მერე ვასწავლი ჰქონა! — მევე-
ლეებმა სესია პატარა იქით გაიყვანეს და ცო-
ტახანს შეფერხდნენ, როდესაც ბოქაულმა ზუ-
რგი იქითკენ მიიბრუნა. იმათ უნდოდათ გაე-
გოთ, ეს ამბავი რითი გათავდებოდა.

— ხალხო! — დაიძახა ბოქაულმა, როცა
ცოტათი დამშვიდდა: — არ დაუჯეროთ იმ სუ-
ლელს. ეს სკოლა თქვენთვის გვინდა და არა
ჩვენთვის. დიდ სარგებლობას მოგიტანთ. მაშ,
ჰა, პროტოკოლს შევადგენ, რო გინდათ სკო-
ლის გამართვა.

— არ შეადგინო, არ გვინდა! — მიაძახა
სესიამ შორიდან ბოქაულისკენ პირ-უკულმა
მიბრუნებულმა.

— ეგ ისევ მანდა გყავთ, თქვე...

— არ გვინდა, არა! — უეცრად დაიგრიალა
ხალხმა და ბოქაულს სიტყვა გააწყვეტინა.

ბოქაული სულ გადაირია და არ იცოდა,
რა ექნა. ვლადიმირ სერგეიის ხომ ტანში მო-
იშალა. მხოლოდ მღვდელი იყო დამშვიდებუ-
ლი და შეურყეველი. მოძღვარს ტუჩებზე ლი-

მილი უქროდა და ამით თითქოს ეუბნებოდა
ბოქაულს: „აკი მოგახსენე, არ ისურვებენ-
მეთქი.“



„მამას მიწა მივაყალეთ!..“

(სურათი)

გუშინ თითონ უშველა ორ მესაფლავეს თავის ქმრის გამოტანა და ურემჩედ დადება. ისე, უკუბოდ, უმღვდლოდ, უხარჯოდ და შენ-დობის უთქმელად, ლეიბიანად გაშოტილი შე-უდეს ურემჩედ სოსიკა და შეზარხოშებულმა მესაფლავეებმა ღილინით შეატარეს სოფელი და სამარის კარამდის მიიტანეს...

-- ამას რას ვხედავ, ჩემო კარგო სოსიკო!... — წამოიძახა მართიკომ, როცა სოსიკოს გვამს ურემჩედ უდებდნენ, და გაცეტებულმა თვალების აქეთ-იქით ცეცება დაიწყო. — მოდით, ქა, რას იმალებით?!.. დავიტიროთ ჩემი კარგი სოსიკო. რა დაგიშავათ, ხალხნო, რომ მაგრე დაუტირებელს და დაუმარხავად უშვებთ სოსიკოსა?! — იძახოდა ის, მაგრამ ხალხი არსადა სჩანდა. მარტო აქა-იქ ბანიდგან რამდენიმე ადამიანი გამოსცეკროდა მართიკოს და მწუხარებით გაიძახოდა: „ღმერთო, ეხლა-კი: ნუ მოგვეკლავ და მერე თუნდ ერთ წამსაც ნუ გვაცოცხლებო.“ მომეტებული ნაწილი-კი სო-

ფლელებისა დიდი ხანია თავ-ზარ-დაცემული გა-
ვარდა და ტყესა და მინდორს მოჰვედა.

იმისმა მაზლმაც, როცა ქმარი ავად გაუხ-
და, თავი დაანება და თავისი ცოლშვილი მინ-
დორში გახიზნა.

დარჩა მარტოკა მართიკო თავის ოთხის
წლის გოგოთი ავადმყოფის გვერდით. ის თავ-
განწირულებით უვლიდა, მორიდება თავში
აზრად არ მოსვლია, მაგრამ ამ თავგანწირუ-
ლებამაც ვერა უშველა-რა. სამის დღის შემდეგ
ქმარი ხელიდგან გამოეცალა.

— თქვენი ჭირიმეთ, ხომ კარგად დაასაფ-
ლავეთ?!.. მიწა ხომ ბლომად მიაყარეთ?! — შეს-
ძახა მართიკომ მესაფლავეებს; როცა იმათ ცა-
რიელი ურემი კარებზე ჩამოუტარეს.

— საფლავი ჯერ სულ არ ამოგვიმსია, —
თითქმის ერთხმად უპასუხა ორმავე მესაფლავემ.

— რას მეუბნევით?! ნუ დამლუპავთ, თქვე-
ნი ჭირიმეთ, ნადირს ნუ შემიჭმევთ! — შელრი-
ალა მართიკომ.

— დავიღალენით, შე დალოცვილი შვი-
ლო, ასე გონია ალალაობა იყოს! ჩვენც ადა-
მიანის შვილები ვართ. დღეს ეს მესამე საფლა-
ვი გაგვითხრია და მესამე მიცვალებული გაგვი-

ტანია.—უთხრა ერთმა მესაფლავემ და ხარებს სახრე გადაჰკრა.

— არა გიშავთ-რა, ღვთის გულისთვის, ისიც კარგად დამარხეთ! — უკანიდგან მიაძახა მართიკომ.

— არა გიშავთ-რა რას მიქვიან, წადი და ახლა შენ მოუარე შენ მიცვალებულს! — უკან მოუხედავად უპასუხა ერთმა მესაფლავემ, რომელიც ურმის თავს იჯდა და ჩქარა საბძელსაც მოეფარა. მართიკო-კი გაშტერებული დარჩა იმის პასუხით და ასე რამდენსამე ხანს იდგა.

— შვილო, წავიდეთ, ჩვენ მაინც მივაყაროთ მიწა!... — სასოწარკვეთილებით წამოიძახა მართიკომ და ხელით აითრია თავისი პატარა ქალი, რომელიც იქვე, დედის გვერდით, მობუზული იდგა და მოწყენით შესცემოდა დედას.

სულ სირბილით მივიდა ქმრის ნახევრად მოყრილ საფლავამდის და მაშინვე მიწის ფხაჭნა და საფლავის ამოვსება დაიწყო. პატარა ქალიც თავის პატარა ხელებით მუქა-მუქა მიწას იღებდა და მამის საფლავს აყრიდა.

— ქა, მე თავ-მკვდარი, ამასაც შევესწარი, სოსიკო, რომ ჩემი ხელით გმარხამ, ჩემი ხელით მიწას გაყრი!... — გამწვავებულმა წამოიძახა და იქამდის შეგუბებულს ცრემლს გზა მისცა.

მიწას აყრიდა თავის ქმარს და თან ცრემლით ალბობდა. დედის ტირილზედ პატარა ქალმაც ტირილი მორთო და ცრემლით სავსე თვალებით მიწას ჩასცეროდა...

— დავმარხოთ, შვილო, მამა-შენი, დავმარხოთ!.. კარგად იმუშავე!.. — მალ-მალე წასძახებდა თავის ქალს და თითონაც აჩქარებით ფხაჭნიდა მიწას...

გუშინ თავის ხელით დამარხა ქმარი, დღეს-კი თითონ ის აგერ წამოგდებულია კერის პირას და პირიდგან ნასაქმებში დამბალა.

წუხელ შუალამისას აუვარდა პირსაქმება და მუცლის წვა. წინადაც, ქმრის ავადმყოფობის დროს, უჩუხხებდა მუცელი, გააფალარათა კიდეც, მაგრამ თავს იმაგრებდა და ქმრის წუხილთან თავისი სულ დაავიწყდა. წუხელის-კი აუვარდა მუცლის წვა და სულ თეთრად გაათენა. მასთან ერთად არც პატარა გოგოს მოუხუჭავს თვალი. ის, როცა დედა გაშვავებული გინძახდა: „მიშველეთ, წყალი, წყალი“-ო, ჯამით მიუტანდა წყალს და ეუბნებოდა: „დედი, აი „დალიე.“ ისიც სვამდა წყალს, მაგრამ უკანვე აბრუნებდა დალეულს. მუცელში არა უდგებოდა-რა. თანდათან უფრო სუსტდებოდა და აი... მზის გაღახრაზე უკვე მიიბნიდა და მიკნა-

ვებულის ხმით ხანდახან წამოიძახებდა ხოლმე: „მიშველეთ!“ მაგრამ ვინ იყო მშველელი? თავს მარტო ოთხი წლის გოგო ეჯდა და თვალ-ცრემლიანის ხელებით ძუძუებს უსრესდა.

— შვილო! — მიჰმართა მიკნავებულის ხმით თავის პატარა ქალს, როცა თვალის ქუთუ-თოები ძლივას ასწია და მსხვილი თვალის კატ-ლები თავის მოწყენილს გოგოს თვალებს დაუ-პირდაპირა.

— შვილო, გარეთ გადი, შენც არ შეგე-ყაროს ხორველა!.. წადი, წადი, შვილო!.. ეჭ! — ამოიკვნესა შემდეგ და თვალის ქუთუ-თოები მძიმედ ჩამოიფარა, რომ გულის საკ-ლავი სურათი აღარ დაენახა... — მეც რომ მოვ-კვდე, ვიღა მოუვლის ჩემს პატარა სოფკას!.. ღმერთო!... — წამოიძახა მართიკომ და ცრემლები გადმოსცვივდა მილულული თვალებიდგან...

სოფკა-კი ზღაბით წამოდგა და კარების გვერდს აეყუდა. ის გასცემროდა კარგა ხანს მოწყენით ჩამავალს მზეს და თან თვალის ქუ-თუთოებს აჩქარებით ანძრევდა მზის სხივების გავლენის ქვეშ.


— ძია!.. — უეცრად წამოიძახა სოფკამ და აჩქარებით გაექანა მომავალი კაცისაკენ.

— გოგო, მამა რა უყავ? — ტირილით მოა-

ძახა შორიდგან მართიკოს მაზლმა, რომელმაც
 მინდორში ჭორად გაიგო, რომ იმისი ძმა სო-
 სიკა გუშინ დაასაფლავესო. იგი ნამდვილის შე-
 სატყობად წამოვიდა.

გოგო მაშინვე შესდგა და გულამოსკვნით
 წამოიძახა :

— მამას მიწა მივაყალეთ!..



„ყველაი დავკარგე!...“

I

ცხვრის ბინის ახლო ათასფრად აყვავებულ პატარა ბეჭობზედ, რომელიც კოხტად შეკრულს თაიგულს ემსგავსებოდა, იჯდა ყვავილთა დედოფალი, სიმშვენიერის გვირგვინი, ჯერ ახლად გადაშლილი მთიულის ქალი და აღგზნებულის თვალით გატაცებით უმზერდა ყვავილების ჯგუფებს, რომელთაც ერთმანეთისათვის თავი თავს გადაედოთ და ასე ჩახუტულებს სალამოს ნიავზედ ტკბილის, შეუშფოთებელის და შეუხამებელი ალერსისათვის მიეცათ თავი. ზევიდგან-კი წყვილი, ერთმანეთის სიყვარულით გატაცებული პეპელა დაცქრიალებდა და იმის რჩევაში იყო, თუ რომელი ჯგუფი ყვავილებისა უკეთესს მასპინძლობას გაუწევდა და სულს გადაუშლიდა. ორი მოარშიყე ხან რომელს ყვავილების ჯგუფს დააფრინდებოდა და ხან რომელს. ისინიც მოარშიყეთა ყოველ მიტანებაზედ სწყვეტდნენ ალერსს, უღებდნენ გულს და ნებას აძლევდნენ დამტკბარიყო წყვილი პეპელა მათის გამაცოცხლებელის ნექტარით და,

როდესაც გულ-ასუყებული ორი მოარშიყე აფ-
რინდებოდა ერთის ჯგუფიდგან და ახლა სხვა
ჯგუფს დაუწყებდა გარს ფრენას, ისევ ჩაეხუ-
ტებოდნენ და განაგრძობდნენ ტკბილს აღერსს.

უმზერდა გატაცებით ამას ამათ შუა მჯდომი
ქალი და ტუჩებზედ ტკბილი ლიმი უქროდა;
ყელმოლერებული შესცეკეროდა ამათს აღერსს
და იმასაც გულში უღვივოდა სიყვარულის ნა-
პერწყალი. ხომ ამ ორის წლის წინად სწორედ
ამ ადგილას აიღო ყვავილებისაგან მაგალითი;
ხომ ყვავილებმა სუნთან ერთად გარდასცეს ამ
ბუნების შვილს სიყვარულის თესლი, რამაც
იმის გულში შესაფერი ნიადაგი იპოვა და ფეს-
ვები ლრმად და მკვიდრად გაიდგა. ბუნების
შვილმა ბუნებისაგან აიღო მაგალითი და, რო-
დესაც ამ ორი წლის წინად ესა და ის სწო-
რედ ამ ადგილას ისხდნენ და, ორნივე გაჩუ-
მებულნი, ყვავილების აღერსს თვალს ადევ-
ნებდნენ, თავის-და უნებურად გადახარა თავი
და თავისი მთრთოლვარე ტუჩები მის ტუჩებს
შეახო. რამ გამოიწვია ეს მოძრაობა იმათში,
ისინი ამას ვერ მიხვდნენ და არც ამის გამო-
კვლევას გამოსდგომიან. ასე ჩახუტულები კარგა
ხნობამდის იყვნენ და აჩქარებით ჰქონდნენ.
როდესაც გააშორეს ტუჩები, ორმავე თითქმის

ერთხმად წამოიძახა: „ჩემო ყველავ,“ და თვალი თვალს გაუყარეს, თითქოს ამათ თვალით ერთმანეთის შეკმა სურდათ, რომ ამ გვარად სამუდამოდ ერთ არსებად ქცეულიყვნენ.

უმზერდა ყვავილების ალერსს ქალი და აგონდებოდა ეს ამბავი და ქალის დამამშვენებელი და უპირველესი ღირსება უმანკოებისა და კრძალულებისა—სიწითლე იმის ლოკებს არა შორდებოდა. ქალს ეხლაც აჩქარებით გული უცემდა იმისათვის, უნდოდა ეხლაც თავ-დავიწყებით ჩაჰკროდა გულში, მაგრამ როგორ მოეხერხებინა, როდესაც ის შორს იყო, როდესაც ესა და ის ამ ორი წლის წინადვე დააშორეს. ის ჯარის-კაცად გაიწვიეს და კენჭიც ერგო. მას შემდეგ ერთმანეთი იღარ უნახავთ... „ნინიავ, ნინიავ!.. ჩემო ყველავ, რაისთვის არ იკითხავ შენთვის მკვდარს?!“ გრძნობით წამოიძახა ქალმა და ისევ ისე მიტვრინდა. რამდენჯერმე გონებაში გადითვალა, თუ რახანი კიდევ უნდა იყოს ნინია ჯარის-კაცადა და როდის მობრუნდება. რა ღამესაც მობრუნდება, მაშინვე, ჰფიქრობდა ქალი, ჩემს თავსა სთხოვსო მამას და მერე-კი ვეღარავინ გაგვაშორებს. მაგრამ ამ დროს ელვასავით გაურბინა თავში აზრმა, რომ მამა ნებას არ მისცემს, რადგანაც ნინიას არა-

ვინა ჰყავს და არც არა აქვს-რა, რამდენისამე
სულის ცხვრის გარდა, ისიც იმის მამისაგან
მიცემული, როცა ის ამათ მეცხვარედ ედგათ.
ცოტა არ იყოს, ამ აზრმა შეაფიქრიანა და შეა-
ლონა. უეცრად გაუქრა ტუჩებზედ ლიმი და სახე
მოექუშა. „ნინიავ, ნინიავ, მამაიამაც რო ნება
არ დამრთოს, მე თავს არ დაგანებებ, გამოვიქ-
ცევი, ყველგან წამოვალ შენთან!.. რა ვუყო,
რო არავინა გყავს და არაი გაქვს! მე-კი მი-
ყორხარ და...“ გადაწყვეტით წარმოსთქვა ქალ-
მა ცოტა ხნის დალონების შემდეგ და ისევ თა-
ვი მოიმხიარულა.

— ქალავ, რას ჩაფიქრებულხარ?! — უკანი-
დან მოესმა ვისლაც ხმა. ქალმა მიიხედა უკან
და იმის თვალს წარმოუდგა ჯარის-კაცი, ქარ-
თულის დრუჟინის ტანთსაცმელში.

— ბარამ, შენი კვნესა მე, საით გივლია?!
მოხვედ მშვიდობით!.. — სიხარულით წამოვარდა
ფეხზედ და ალერსიანად დაუწყო მზერა.

— დამხვდი მშვიდობით! როგორ არიან
თქვენები, დედა სად არის?..

— ვეძას *) წავიდა და ჯერედ არ მოსუ-
ლა. კარგად არის, შენი კვნესა მე!

— ვეძასა?

*) მეავე წყალი.

— ჰო. საით გივლია, ბარამ?

— სანადიროდ ვიყავ და ვერა მოვკალი-
რა. მინდოდა უფროსისთვის წამელო ნანადირე-
ვი, მაგრამ, დასწყევლოს ლომისამ, არა შემე-
ფეთა-რა.

— სად უნდა წაგელო?

— დუშეთს, საღაც ვარ.

— ახლა მიჰდიხარ?

— ჰო, შინ ჩავივლი და ფეხად ისევ გავ-
პრუნდები.

— მაგრე ჩქარა რაისთვის მიხვალ, რატომ
არ დარჩები ცოტა ხანს?

— განა ცოტა ხანია აქა ვარ. ერთი კვი-
რაა, რაც შინ მოვედი და თუ ხვალ არ გა-
მოვცხადდი, არ იქნების.

— მშვიდობით, ქალავ, დედაის მოკით-
ხვა! — ცოტა ხნის ლაპარაკის შემდეგ გამოეთ-
ხოვა ბარამი და წასასვლელად გაბრუნდა.

ქალმა-კი რაღაც ყოყმანობა დაიწყო, უნ-
დოდა ეკითხა რამე, მაგრამ ვერ ახერხებდა,
სცხვენოდა. ბოლოს, როცა ბარამი კარგად
დაშორდა, უკან დაედევნა და იკანკალებულის
ხმით დაუძახა:

— ბარამ, შენს მზესა, ნინიას ვერ ხედუ-
ლობ, ისაც სალდათად არ არის?!

— როგორ არა, სულ ერთად არა ვართ!

— როგორ არის?

— რა უკირს, სმა და ჭამა არ აკლია და ქალებთან ქეიფი, — ღიმილით უთხრა ბარამშა.

— სტუუი, ის ქალებთან არ იქეიფებს! — წყრომით უპასუხა ქალმა და გამოტრიალდა.

II

დაღამდა. დიდი ხანია მეცხვარეებმა თავთავიანთი ადგილები მონახეს და ცხვარი დააბინავეს. სულ მაღლა მოზარდი დააყენეს, რომ ლამე ქვევით, ხევში, სადაც ბინა აქვთ, არ დაცხეს; მას მოაყოლეს თოხლობა, მერე ყოჩიბა და სულ ქვევით, ზედ ბინის გვერდით, მეწველი ცხვარი დააყენეს. თითონაც დაიყვნენ და ზოგი მოზარდს მოუწვა გვერდით და ზოგი კიდევ დანარჩენებს. ძალლებიც, მათი ერთგული მეგობრები, მეცხვარეებთან ახლო წამოეყარნენ და პატრონებივით ყურ-მახვილად სძინავთ. ყოველ ცხვრის დაფუვენვაზედ, ყოველ იმათ განძრევასა და ფეხების ბარტყუნზედ მძიმედ ასწევენ წინა ტოტებს და ასე დაყუნცულები ზემოდან მძიმედვე თვალით წრეს ავლებენ მთელს ბინას, და რაკი დარწმუნდებიან, რომ მტერი არსად

არისო, განგებ ერთი-ორჯელ წაჟუეფენ და ისევ საძილედ მიეყრებიან.

ბინაში-კი მხოლოდ ცხვრის პატრონის ჯალაბობა მიწვა ქოხში და მათგანვე გაკეთებული ყველი თავით მიიწყეს. სულ სამი ქალი იყო: ერთი ცხვრის პატრონის ცოლი, მეორე იმისი გასათხოვარი ქალი და მესამე რძალი. ესენი ყველთვის, როცა-კი ცხვრის წველის დროა, მთაში ამოდიან, რომ ყველი თითონვე გააკეთონ და იქ რჩებიან, ვიდრე ცხვარი არ გაშრება. ეხლაც იმისთვის ამოვიდნენ და აგერ მეორე კვირაა, რაც იქ ცხვრის ბინაზედ არიან ღამეცა და დღეც.

მიჩუმდა ყველაფერი. ცხვარმაც შესწყვიტა ფრუტუნი და ფეხების ბაკი-ბუკი, რაც ძალლებს ძილს უკრთობდა და მალ-მალ ზარმაცად შეა-ყეფინებდა. მარტო ნანასავით ეწვეთება ყურში აქ მყოფთ მთის წვერიდან ცელქად ჩამომდინარი წყლის ჩანჩქარი, რომელიც ჩამოკიდებულ მთის კალთებზედ მარდად ჩამოხტის და მარგალიტებრ წინწკლებს ესვრის გარშემო უხვად ამოფეთ-ქილს ყვავილ-ბალახებს. მთვარემაც უკანასკნელად გადმოხედა მთის წვერიდგან ცხვრის ბინას და მძიმედ, თითქოს ენანება, რომ ასე მალე ანებებს თავს ამ მშვენიერ ბუნებასაო, ჩაე-

შვა. აგერ, იმისი უკანასკნელი მკრთალი სხივებიც გაიფანტა ცის სივრცეში და აქამდის გაცრიაგებულმა ვარსკვლავებმა კაშკაში მორთეს. ამ დროს მოისმა მთის ზემო კალთიდგან, საღაცბატყანი არის დაბინავებული, საამური ხმა სალამურისა, ჯერ მძიმედ და დაბლად, მერე ამაყად და მედგრად, როგორც მთიულის გული, და ბოლოს-კი ისევ მიწყნარდა, მიჩუმდა და წყლის ჩანჩქართან შეერთებული ოდნავ-ლა გამოისმოდა იმისი ხმა. რაღაც ზეციურს საიდუმლოს მოგვითხრობდა წყლის ჩანჩქართან შეერთებული სალამურის ხმა....

„ნეტავი, თევდორავ, არ მასმენდე მაგხმას! — წამოიძახა ქოხში ქალმა და გულალმა გადაწვა. — რაი ვქმნა, მე ბეჩავმა, რაი?!..“ მაღმალ წამოიძახებდა ხოლმე ქალი და სასოწარკვეთილებით ხან ერთს მხარეს გადავარდებოდა და ხან მეორეს. თავი საშინლად უხურდა და თვალები უბრწყინავდა. ტირილი უნდოდა, ისე უნდოდა, რომ ასე თავის სიცოცხლეში არა მოსდომებია-რა, თითქმის, როგორც ამბობენ, ტირილი ყელშიაც ჰქონდა მობჯენილი და არჩოდა, მაგრამ იმის თვალებს ცრემლი არ ეკარებოდა. თევდორა-კი უფრო გულსაკლავ ხმებს ათქმევინებდა სალამურს და ბოლოს სულ კვნე-

სის ხმად აქცია, რომელიც ქალს ყურს ეწვე-
თებოდა და სდაგავდა იმის გულს.

„ბარამ, ბარამ, რაი დაგიშავე, რაისთვის
გასმინე?.. არა, ბარამ, ლომისის მაღლმა, სტყუი,
ცილსა სწამებ ნინიას, ის მე არ დამივიწყებდა,
არა!.. ნინიაი მაგას არ იზამს!... მე ის მიყვარს
და!..“ — წამოიძახა ქალმა, როცა თევდორამ ცო-
ტას ხნობით სალამური შესწყვიტა, მაგრამ იმან
ისევ ჩქარა ჩაბერა სალამურს და სამწუხარო
ხმები ისევ ჩააწვეთა ყურში. ქალი გატვრინდა.
ის უგდებდა ყურს და ხმის მაგიერად ყურში
ესმოდა: „ნინია გატყუებს, ნინია გატყუებს!..“
ამას ჩასძახოდა სალამურის ხმა, ხოლო წყლის
ჩანჩქარი კვერს უკრავდა: „ჰო, შე ბეჩავო...
ჰო, შე ბეჩავო!..“ ქალმა ველარ გაუძლო ამ
იდუმალ ხმებს და გიფივით წამოვარდა. წამო-
ვარდნისათანავე წამოიძახა: „არა, არა!... ნინია
არ მამატყუებს!..“ „როგორ არა!.. როგორ
არა!.. ხა, ხა, ხა!.. გატყუებს!“ — მოესმა თავი-
სი სიტყვების პასუხად ქალს... „ჩემი თვალით
თუ არ ვნახე, არ დავიჯერებ, არა!.. ეხლავე წა-
ვალ იქ!“ — ხმა მაღლა წამოიყვირა ქალმა და
ჯოხს წამოავლო ხელი...

— ვინა ხარ? — წამოიძახა ქალის ხმაურობა-
სა და ფაჩუნზე გამოლვიძებულმა იმისმა დედამ.

— მე... — უპასუხა ქალმა.

— რაისთვის არ დასწევები, რას ფროტია-
 ლობ?! — შეუტია დედამ და გადაბრუნდა.

III

ჭ. დუშეთის გამონაპირებით, ზედ გზატკე-
 ცილის პირად ორ-სართულიანი სახლები სდგას,
 რომელშიაც მოთავსებულია დუქანი და სადგომი
 ოთახები. წინ დიდი ბაკი აქვს. ეს დუქანი თა-
 ვის სადგომი ოთახებით და ბაკით იმითია შესა-
 ნიშნავი, რომ ტფილისს თუ კავკავს მიმავალი
 არ ასცდება. ამის გამო დღე-მუდამ სავსეა ხოლ-
 მე მუშტრით. ნამეტნავად საღამოობით მოატ-
 ყდება ხოლმე ფურგუნები შიგ მსხდომითა და
 აქ ითევენ ღამეს. დუშეთის ლოთი-ფოთი ბიჭე-
 ბი, ხშირად ვითომ და „ბლადოროდნებიც“ გად-
 მოდიან აქ საღამოობით და დროს ატარებენ ფურ-
 გუნებით მოგზაურ ქალებთან.

კვირა საღამო იყო. კავკავიდან მომავალმა
 რამდენმამე დასაპალნებულმა ფურგუნმა ჟღრია-
 ლით შეიგრიალა ბაკში, საიდანაც მაშინვე გა-
 დმოლაგდნენ აჭრელებული კაბებით სხვა-და-სხვა
 სისქისა და სიმაღლის ლოყებ-დაბრაწული ქალე-
 ბი. ზოგი მათგანი ზემო სართულში ავიდა, ზო-

გი-კი დუქანში შევიდა და სასმელ-საჭმელი შეუკვეთა. მეფურგუნებმაც დააბინავეს ცხენები და ისინიც საჭმლის ზრუნვას შეუდგნენ. ჩქარა გააჩაღეს სამოვრები და გარს შემოუსხდნენ. მოვიდა კიდევ რამდენიმე ფურგუნი.

არც დუშელებს დაუგვიანიათ. იმათაც კანტი-კუნტად დაიწყეს დენა, გაიმართეს სტოლები და დაიწყეს სმა და ჭამა. ვინც „ბლალოროდნები“ იყვნენ, იმათ ოთახებში შეჰყვეს თავი და იქიდან ულოცავდნენ ბალკონზე მსხდომ ქალებს.

ქვევით ეზოში სამხა ჯარის-კაცმა დაიდგა სტოლი და ლვინის სმა დაიწყო. გაიმართა საზოგადო სმა და ჭამა. რამდენიმე ჯარის-კაცი ხან იქ აეყუდებოდა და ხან აქ: ისინი უმზერდნენ მოქეიფეთ და პირს ნერწყვი მოსდიოდათ, მაგრამ რას იზამდნენ, როდესაც ფული არა ჰქონდათ ჯიბეში და ამის გამო ქეიფის უინი მარტო ცქერით უნდა მოეკლათ. კარგა ხანს შესცქეროდნენ და როდესაც მოეწყინათ ხმელად ქეიფი, შინისკენ გასწიეს იმ განზრახვით, რომ, როდესაც ფულს იგდებენ ხელში, აქ იქეიფონ.

— ეი, მათუშკი, ჩემთან წამოდი, აი ფულები? — შეჰყვირა ქვევიდან ერთმა ჯარის-კაც-



თაგანმა ზევით ქალებს, როდესაც რამდენისაშე
ჭიქის შემდეგ თავში შეუსხდნენ...

— ხა, ხა, ხა! — გადიხარხარეს ზემოდ ქა-
ლებმა: — გინდათ, რომ მანდ ჩამოვიდეთ?

— ჰაი, ჰაი, რომ გვინდა! — უპასუხა ისევ
იმან.

ამ ჰასუხზე წამოდგა ერთი კარგა ჩასუქე-
ბული ქალი და კიბეზე მძიმედ ჩამოვიდა. იმას
უკან მოჰყვა მეორე, ცოტა ამაზე მჭლე.

— ბარამ, კარგისები მოდიან, აი! — წამო-
იძახა ერთმა, როცა ქალები ამათკენ წამოვიდ-
ნენ.

— ლომისის მაღლას, ის ერთი საბნადაც
გვეცვის და ლეიბადაც! — უპასუხა ბარამმა.

— მოდით, თქვენი კვნესამე, მოდით! .. —
თითქმის ერთხმად უთხრა სამშავე და ფეხზე წა-
მოდგნენ.

ქალებმა იმათი ადგილი დაიჭირეს და ლვი-
ნო გადაჭრეს.

— ნინიავ, მაიტა რამ, ჩვენც დავსხდეთ! —
უთხრა ბარამმა და, როდესაც ნინია დუქანში
შევიდა, მეორეს მიმართა:

— ნიკოლავ, შენც გაქვს ფული? .. შინიდ-
გან რომ ჩამოვიტანე, ვით თუ არ გვეყოს.

— რამითი გაქვს?

— ექვსი.

— გვეყოფის, ბარამ, მეც მაქვს ორი.—
უთხრა ნიკოლამ და ლვინო დაასხა.

ნინიამ გამოიტანა გრძელი სკამი და პირ-
დაპირ ჩამოუჯდა ქალებს, რომლებმაც ეშვაკუ-
რად შეჰედეს და რაღაც წასჩურჩულეს ერთ-
მანეთს.

— ბედნიერავ, მოეწონევი! — უთხრა ნი-
კოლამ ნინიას და მუჯლუგუნი წაჰერა.

ლაზლანდარობით და სიცილით ბლომად
დალიეს ლვინო. ქალები ისე დაითვრნენ, რომ
აღარ ესმოდათ, რას ამბობდნენ და რას არა,
და უშვერის პირითა ლანძლავდნენ ბარამს, ნი-
ნიას და ნიკოლას...

— ნინიავ, იმღერე რამ! — წასძახა ბარამმა
და თითონვე დაიწყო:

მთიელი ვარ და მთას წავალ,

იქ მყავს დედისა ძმანია!..

ნინიამ და ნიკოლამ კიდევ მეორე უთხრეს
და მწყობისად იმღერეს.

— გაჩუმდით, გაჩუმდით! — ხელების ფარ-
თხეით შეაყენა მომღერლები ჩასუქებულმა. — რა
ტურებივით ჩხავით!.. აბა, ეხლა ჩვენ ვიმღე-
რებთ, — სთქვა ისევ იმან და ეხლა თითონ და-
იწყო.

— შენ გენაცვალე, მა ტუჩებში!.. — წამოიძახა ბარამმა და საკოცნელად მიატანა, როცა იმან სიმღერაში თავი ამისკენ გადმოიღო...

— უნამუსო!.. — უეცრად წამოიძახა ერთმა ვილაცა მთიულის ბალლმა, რომელიც ის-ის იყო შემოვიდა და თოფ-ნაკრავივით ალაგობრივ გაშეშდა. უცნობი გაფითრდა და გაყვითლდა, როცა იმათ თვალი შეასწრო, და ტანის ცახცახი აუვარდა.

— რაისთვის არ გინდა მაკოცნინო, ქალავ! — ალერსიანად უთხრა ბარამმა, როცა ქალმა ტუჩებზე ხელი მიიფარა და საკოცნელად გაწვდილი და დამზადებული ტუჩები იქით მიიღო, რაზედაც ნიკოლამ და ნინიამ სიცილი ასტეხეს.

— არა, შენ არ გაკოცნინებ! აგერ, ის მოვიდეს, იმის ვაკოცნინებ, იმას უუჟუნა თვალები აქვს! — უთხრა ქალმა და ნინიაზედ მიიშვირა თითო.

— ბილწს, ის უნდა მიიყვანოს! — კანკალით წაიბუტბუტა ყმაწვილმა და ერთი ნაბიჯი წინ წამოსდგა.

— ეხლავ, შენი კვნესამე! — წამოიძახა ნინიამ და გვერდით მოუჯდა. ქალმა გადუღო კისერი და ნინიამაც გატაცებით კოცნა დაუწყო.

— უნამუსო! — წამოიძახა ბალლმა და ფო-
ცხვერივით ხანჯალ-ამოლებული გადახტა. ნინი-
ასაკენ.

ყმაწვილმა ხელიც ამართა, უნდოდა და-
ეკრა ქალისთვის, მაგრამ ამ დროს ბარაშმა
მკლავი დაუჭირა.

— რას ჩადი, ბალლო? — შეუტია ბარაშმა
და იქით მიაყენა.

ყმაწვილი გატრიალდა, რა-კი ხანჯლის
დაკვრა ვერ მოასწრო, და ამოლებული ხანჯალი
ისევ ქარქაშში ჩააგო.

— ბალლო, რისთვის გინდოდა მოგეკლა? —
— ჩაუინებით ჰკითხა ნინიამ, როცა ყმაწვილ-
თან მივიდა და ხელი დაუჭირა.

— ხელი უშვი!.. შენ წადი, აი, ის უნა-
მუსო ლოშნე!.. — ამაყად უპასუხა ყმაწვილმა და
ხელი გააშვებინა.

— ბალლო, ბედის-წერამ ხომ არ აგიტანა?!

ნინია რომ ყმაწვილს ელაპარაკებოდა, ბა-
რამი და ნიკოლა ისევ მოუსხდნენ გვერდით
ქალებს და სიმღერა დაიწყეს.

— უნამუსოები! — წამოიძახა ყმაწვილმა და
გაბრუნდა.

— ბალლო ბედის-წერამ ხომ არ აგიტანა-
მეთქი?! მე ცოტა მეყოფის, მთიული ვარ!

— მთიულია!.. დაცინვის კილოთი წამო-
 იძახა ყმაწვილმა: — შენ მთიული არა ხარ, არა!..
 მთიული მაგას არ იზამს, რასაც შენ ჩაღიხარ!
 წადი ლოშნე აი ის უნამუსო!

— იყუჩე, ბალლავ, თორემ აი ეხლავ თავს
 გაგაგდებინებ! — შეუტია ნინიამ და ხანჯალი
 ამოიღო.

ყმაწვილი მოტრიალდა იმისკენ და ლმო-
 ბიერად უთხრა:

— ნინიავ, ნინიავ, მამკალ, ამ სიცოცხ-
 ლეს სიკვდილი მირჩევნია!

ნინიას როგორდაც ეცნობა ეს ხმა, გაშრა
 და გონს ვერ მოსულიყო, თუ ეს ხმა სად უნ-
 და გაეგონა.

— ბალლავ, მითხარი, საით მიცნობ?

— გიცნობ, ნინიავ, და შენ-კი ვეღარ
 მიცან?

— მითხარ, ვინა ხარ? — კანკალით ჰკითხა
 ნინიამ.

— ვეღარ სცან შენი მარო?

— მარო!.. — წამოიღრიალა ნინიამ და მო-
 სახვევნად მიეტანა, მაგრამ მარომ ამაყად ჰკრა
 ხელი.

— არა, მე შენი მარო აღარა ვარ!.. აგერ
 შენა ის ლოშნე!.. — თითით ქალზედ ანიშნა

და თითონ-კი გარედ გავარდა. ნინია გაშტე-
რებული დარჩა, ვერ მიხვედრილიყო, ცხადი იყო
ეს ამბავი თუ სიზმარი.

IV

ქალი გავარდა და უგზო-უკვლოდ ხან
აღმა ეცა და ხან დაღმა. ისე გამალებული გარ-
ბოდა, რომ კაცს ეგონებოდა, უკან მტერი
მისდევსო. ქალი ჰფიქრობდა, ეშინოდა, რომ
ნინია არ დასდევნებოდა და გზაში არ დაეჭირა. მირბოდა და უკან ალარ იხედებოდა. გაირბინა
მთები, ტყეები და არ იცოდა კია, სად მირ-
ბოდა. უეცრად ავიდა ერთი მთის წვერს და
ქვევით ჩაქანება უნდოდა, მაგრამ მთის მეორე
მხარე მოფლეტილიყო, რომლის ძირშიაც ადი-
დებული არაგვი მოსჩქეფდა და მოპქუხდა.

ქალი შესდგა. გადახედა არაგვს და ტან-
ში ერუანტელმა გაურბინა. ცოტა ხნის შემდეგ
ცივმა ოფლმა დაასხა და კანკალმა აიტანა. „სადღა წავიდე, რაისოვის-ლა ვიცოცხლო?!“ —
წამოიძახა ქალმა და ქვითინი მორთო. ქვითინი
ხმით ტირილად გარდააჭუია, რასაც არაგვის
შუვილი ბანს აძლევდა. ტიროდა თავის, ჯერ
გაუშლელს, ქალობას, სიცოცხლით გაუმაძლრო-
ბას და ესალმებოდა წუთი-სოფელს. „ნინიავ,

ნინიავ!.. — წამოიძახა ქალმა, როცა ტირილით,
 გული იჯერა: — რაისთვის მამკალ?.. დაიწვი
 ჩემი ცოდით... არა!.. არა! ლომისავ, ნუ
 მისმენ!.. ნუ დავწომ ნინიას, აცოცხლე დიდ-
 ხანს და ბედნიერად ამყოფე!.. ნინიავ!.. ჩემო
 ყველავ!.. არა, ყველა აღარ მყავს!.. ყველაი
 დავკარგე!.. ” — წამოიძახა ქალმა და გადაეშო
 კიდეც არაგვში, რომელმაც ხარხარით დააღო
 პირი და საჩქაროდ ჩანთქა...



„ჩემი ბრალი არ არის, ღმერთი!..“

I

დათუა შრომიშვილი დაჰყრდომოდა ბარის
 ტარს ვენახში და გასცემოდა აღმოსავლეთით
 ახლად შემოსილს მთის წვერს, რომელსაც ოქ-
 როს-ფრად მოელვარე გვირგვინი დასდგომო-
 და, რის გამოც იგი ისე გამოიცირებოდა და
 მოელვარებდა, თითქოს ცეცხლი წაპიდებია. ე-
 ლვარებდა იგი, გაჰქონდა ლაპლაპი; მისი აღი
 ცას სცემდა, მაგრამ ობლად მდგომნი მთის
 წვერზედ ახლად გაშლილი ხეები უვნებლად და
 ნაზად გამოიცირებოდნენ ცეცხლის შუაგული-
 დან; ეკიდებოდა იმათ ცეცხლი, მაგრამ კი არ
 იწოდნენ.

დათუა შრომიშვილი, დამთვრალი სიცოც-
 ხლის ნექტარით შეზავებული დილის ჰაერით,
 შთლად ჩანთქმული იყო ბუნების ამ დიდებული
 სურათის მზერით და მთელი ტანით თრთოდა.
 იმას არ ესმოდა იმის გარშემო ფრინველთა გა-
 ტაცებული ჭიკჭიკი, რითაც ისინი უგალობ-
 დნენ ბუნების დიდებულ სურათს დილის ჰიმნს,

და განსაკუთრებით იქვე ახლად აკოკრებული ვარდის ბუჩქზედ მჯდომ ბულბულის აღგზნებულ სტვენას, რომელიც სრულებით არ ამჩნევდა დათუას სიახლოვეს; დათუას არ ესმოდა აგრეთვე ვენახის გვერდით წყალში თევზების შლაპუნი; რომლებიც უეცრად ამოხტებოდნენ ჰაერში, რომ დაენახათ დიდებული სურათი, და ისევ უეცრად წყალში ჩაშვების დროს ბოლოთი გამოადენდნენ ხოლმე ტკაცანს; ის ვერ ხედავდა იქავეთვალწინ მდგომ ვაზის სიხარულის ცრემლს, და სხვა მცენარეების მოძრაობას ვიღა იტყვის, რომლებსაც მოებრუნათ შენამული გული აღმოსავლეთისაკენ და თაყვანსა სცემდნენ იმ სურათს, რომლის წინაშე სულდგმული თუ არა სულდგმული, პირუტყვი თუ მეტყველი, გენიოსი თუ არა გენიოსი, ნიჭიერი თუ უნიჭო, ველური თუ არა ველური,—ყველა ერთგვარად მონავდება და თავის პიროვნებას იმის დიდებულ სიმშვენიერეს უერთებს.

აგერ, დათუაზე კარგა მოშორებით ტყის პირს გამოსულა ხარ-ირემი, რომელსაც მრავალ-შტოიანი რქები გადუხრია უკან, და იმაზედ არა ნაკლებ თავ-დავიწყებით უმზერს იმავე სურათს.

დათუა მოცული იყო სურათის დიდებუ-

ლებით; მთელი იმისი არსება ჩანთქმული იყო იმითი და იმისი მოსაზრება, გონება სხვა რაო-მე საგნისათვის დაჩლუნგებული და მოდუნებუ-ლი იყო.

სურათს-კი თანდათან ელვარება და სინა-თლე აკლდებოდა. ცოტახანიც და ცამ, მთის წვერმა ჩვეულებრივი სახე მიიღეს. მზემაც თა-ვი იჩინა და ყველას ერთად თავისი სხივი სტყორცნა, რომლის მოხვედრაზედაც, თითქოს ელექტრონმა დაურბინა ტანშიო, აქნობამდის მოდუნებულ და გატაცებულ არსებებს ჩაედგათ ენერგია, მიეცათ ძალა და მოსაზრება და მოძ-რაობა იწყეს: ფრინველები ჟივილ-ხივილით გამოეთხოვნენ თავიანთ ლამის ბინას და ცაში განავარდნენ; მწერებმაც-კი ზუზუნი მორთეს და ხან ერთ მცენარეს ეწვეოდნენ. და ხან მეორეს, რომელთაც მზის სხივის მოხვედრაზედ ნაზი მწვა-ნე ფოთლები შეიბერტყეს და წელი აიმართეს.

დათუამაც მაშინვე თავისდა უნებურად ამოიკვნესა და უნებურადვე ბარს ფეხი ლონივ-რად დაჰკრა, რის გამოც ბარის პირი მომბალ მიწაში ლრმად წავიდა და დიდი ბელტი ამოაგდო. პირველ ბელტს მეორე, მეორეს კიდევ მესამე მოჰყვა და ასე ბელტი ბელტს მიეწყო.

ირემი-კი განუსაზღვრელ აღტაცებაში მო-

ვიდა და გაგიჟებით დახტოდა ველზედ. ის უე-
ცრივ გაქანდებოდა ხტუნაობით ტყის ერთი ნ-
პირიდგან მეორემდის და უეცრივ ასევე მოტ-
რიალდებოდა, უკან ხტუნაობითვე დაბრუნდე-
ბოდა; ხან უეცრივ შუა ველზედ შედგებოდა,
პირს ახლად ამწვანებულ ბალახს დაადებდა და
ჩაპირებდა მიწას, თითქოს იქ, ქვესკნელს
ჩასძახის თავის ტოლს, რომ იქიდგან ამოვიდეს
და ამასთან ერთად ისიამოვნოს, დასტკებეს სი-
ცოცხლით და თავი დავიწყებას მისცეს. ჩაპირე-
ბდა ერთი-ორჯერ კიდევ და, რაკი იქიდ-
გან პასუხს არავინ აძლევდა, ისევ ასწევდა მაღ-
ლა თავს და რქებ-გადაშვებული იწყებდა ისევ
ისე ხტუნაობას.

აგერ, ის შედგა უკანა ფეხებზედ და რამ-
დენსამე წამს ისე გაჩერდა; იმან აღგზნებულად
დააჭყიტა თვალები და ის-ის იყო ტყისკენ გა-
შვებას აპირებდა, რომ ამ დროს თოფმა იგ-
რიალა. ირემი შეტორტმანდა და გულის საკ-
ლავის ამობლავლით, წინ გადახტომის მაგივრად,
გულაღმა გადავარდა.

ტყის პირიდგან გამოვარდა ახალგაზდა ყმა-
წვილი და გადაჩენილ ირემთან მირბენისათანავე
სიხარულით წამოიძახა:

— შიგ გულში არ მოხვედრია!..

ირემმა-კი ძალ-დატანებით ქუთოთოებს გა-
ნხედ გასწია და ცრემლში მოცურავი თვა-
ლის კაკლები თავის მკვლელს მიაპყრო, რითაც
თითქოს ამას ეუბნებათ: „გაუმაძლარო, რა და-
გიშავე, რომ სიცოცხლეს მისპობ?!“

ამის პასუხად ყმაწვილმა ხანჯალი ყელში
გაუგდო და მოუსწრაფა სიცოცხლე.

— ეხლა რომელი ქრისტიანი აღამიანი
ესვრის რასმე თოფს! — წამოიძახა დათუამ იქით
მიხედვის დროს, საიდგანაც თოფის ხმა მოესმა,
და, ყმაწვილი რომ იცნო, განაგრძო:

— მამა ნახე, დედა ნახე, შვილი ისე გა-
მონახე!..

ბოლო სიტყვა სიმღერით გაათავა და რამ-
დენჯერმე ამ დროს ბარს ფეხი ჩაჰკრა.

დათუას ამის შემდეგ თავი მალლა აღარ
აულია და გამალებული ჰგარავდა. ბარვის დროს
დათუა ჩამღეროდა და ჩაჰკვნესოდა მიწას, რი-
თაც თავს იმხნევებდა და დაღალვას არ ტყო-
ბულობდა, თუმცა იმის სახიდგან ოფლი ჩამო-
წკრიალებდა და ნაბარში ჩადიოდა.

მოატანა სადილობამ და დათუამაც უკანა-
სკნელიად ჩასძახა მიწას:

შობიდგან სიკვდილამდისა
შენ ჩამოვტირით, დედაო,

სიკვდილის შემდეგ შენავე
მიგვიკრამ ხოლმე მკერდსაო!..

გათავებისას დათუამ ღონივრად დაჰკრა
ბარს ფეხი და ასე მიწაში ჩარჭობილს გაანება
თავი, თითონ-კი გამოხსნა ჭრელი ხელსახლცი-
დგან გამხმარი ქერის პური და ვაზის ძირში
მიმჯდარმა ლოლნა დაიწყო. იმას ძალიან უჭი-
რდებოდა ჩაყლაპვა, რადგანაც ქერის პური
პირში ნამცეცებად იშლებოდა და, რომ ნამ-
ცეცებისათვის თავი ერთად მოეყარა, წყალს
ხშირად მიმართავდა ხოლმე და ლიტრას მალი-
მალ იყუდებდა.

ნახევარი ჯერ არ შეეჭამა, რომ თავს მი-
სი ცოლი ნენე წამოადგა.

— კარიელი რა მოგატლიკინებდა, რომ
მოტლიკინებდი, შაჟამაღს ვერას მაადუღებდი? —
მიმართა დათუამ თავის ცოლს ხველებით, რა-
დგანაც იმას ქერის პურის ნამცეცი სასულეში
გადუვარდა.

— რისა უნდა მამედუღებინა, რომ მაგრე
იცი? — უპასუხა ნენემ და იმის გვერდით ჩაჯდა.

— მარილის წყალს მაინც მაადუღებდი
და წამოიღებდი, რომ ჩამელბო ქერის პური და
აღარ დავერჩე.

— იჭ, რა დროს ეგეებია, თუ ღმერთი გწამს! მე რისთვის მოვედი და ეს შაკამადს გაიძახის!

— მერე და რატომ არ იტყვი, რისთვის მოხევედი?

— რო აღარ დამაცალე!

— პო და ეხლა თქვი! — უთხრა და მოსას-მენად მოემზადა.

იმან ჭამა შესწყვიტა და ლიტრას ხელი დააჭირა.

— იმად მოვედი, რომ იასაულმა და პრიჭ-ტავის ჩაფარმა პოესტკა გადმომცეს.

— რა პოესტკა?

— სულში იბარებენ დათუასაო.

— რიჭთვისა, აღამიანო?

— რა ვიცი, რიჭთვისა!.. აი, დაიჭი და გაიგე რიჭთვისაც.

იმან ამ სიტყვებთან ერთად ჯიბიდან უწ-ყება ამოილო და დათუას გაუწოდა.

— არა, შე ოჯახქორო, მაგას რო მაწვდი, გადავაბულბულებ თუ?!

— მე კი გადავაბულბულებ?

— დიდება შენთვის, ღმერთო!.. — პირჯვა-რი გადაიწერა ამ სიტყვებზედ და შემდეგ ცოლს შეტევით უთხრა: — რატომ არა ჰკითხე, რიჭ-

ვისა-თქო? სასუდე რა მჭირს, რა დავაშავე, ადა-
მიანო?!

— მერე, არა ვკითხე, რომ აგრე ცუდ-
უბრალოდ ჭყივილი იცი! რო არ მითხრეს, რა
მექნა? ლვდელი კიდევ შინ არ იყო, რო წამე-
კითხებინა.

— ჩაფარმა რატომ არ გითხრა, იმას ხომ
ეცოდინებოდა?

— ღმერთმა ნუ იცის იმისი თავი, რა ვი-
ცი, რატომ არ მითხრა?! „იქ წავიდეს და გა-
იგებსო, რიჳთვისაც არის დაბარებულიო.“ ასე
მითხრა, მე რომ ვკითხე.

— დიდება შენთვის, ღმერთო, სასუდე რა
დავაშავე?! ქურდობა არ გამიწევია და ბოზობა,
ვალი არავისი მმართებს და ვახში და სულ-
ში რაღ უნდა მიმათრევდნენ!.. ერთი სამი-
ოდ თუმანი-ლა მმართებს კომლობა-ამოწყვე-
ტილისა და ხომ შამოდგომაზე ტკბილი უნდა
მივცე, პირობა ასე გვაქვს და ის რაღ მიჩივ-
ლებდა!..

— ვისი-ლა გმართებს, კაცო?

— ვისი-ლა და აგერ აი სახლობა-ამოსაწ-
ყვეტ ისაკასი!

— აი ღმერთმა-კი ნუ ახეიროს იმისი თა-
ვი და ტანი!.. უთუოდ ის მქვევინავი გიჩივლე-

ბდა! იმას ხომ ღმერთი არ დაასვენებს, თუ არავის არა უხიმანა-რა.

— რაზე უნდა მიჩივლოს იმ სახლ-კარ-და-ქცეულმა?!?

— ეშმაკმა იცის იმისი თავი და ტანი, რა ვიცი, რაზე უნდა გიჩივლოს! რამდენჯერ გი-თხარ, მაგ სახლ-კარ-ამოწყვეტილს ჩამოეცალე-მეთქი, რომ მაგრე ულფოდ ყველას ტყავს აძ-რობს, მაგრამ შენ მაინც არ იშლი, მალი-მალ წახვალ და იმას მიადგები კარს.

— რას მიედ-მოედები და როშავ, როდის ერთხელ მივადეჭ კარს, ჰა?!?

— რა ვიცი, თუ არ მიადეჭი, მაშ რაში აძლევ ჩვენ სარჩო-საბადებელს ყოველ წელს? გეთაყვათ, ყოველ წელს ბატონივით სამსე ტო-მრები და ტიკები-კი მიაქვს და!...

— იმაში მიაქვს, რომ ურიასავით ძველ თამასუქებს დაუწყო ძებნა და მალი-მალ კან-ცელარიაში ხან ერთს უჩივლებს, და ხან მეორეს: ეს მამა-შენმა აიღო ვალადაო, ეს კიდე ბიძა-შენმაო. არ ვიცი, მართლა აიღს თუ არა. ამღები არ არის ცოცხალი და მოწმეები.

— თუ მაგრე არამზადობით არ შაიძინა, ხომ ღმერთი ვერ გააძლობს იმის თვალს!

— მაგრე რო არ გარამზადნა, მაშ რითი

გადაჰქიმავდა ი ორ-ატაჟიანს სახლებს, ეხლა
რო შეი ბატონივით ცხოვრობს? მაშა არა და თა-
ვის ალალად მოგებული ფულით გადაჰქიმა, აა!

დათუა და მისი ცოლი ნენე გაებნენ ისა-
კას ლანძღვა-წყევლაში, რადგანაც ისინი თით-
ქმის დარწმუნებულები იყვნენ, რომ ისაკას მე-
ტი არავინ „უხიმანებდა“ რასმე, თუმცა-კი
უწყების შინაარსი არ იცოდნენ.

— ადამიანო, აბა ერთი წააკითხე ვისმე,
მართლა ი ამოსავარდნელი და ამოსაბუგელი
მიჩივის თუ არა! — უთხრა დათუამ ბოლოს და
წამოდგა.

— რაღა წავაკითხო ვისმე, ის იქნება და
ის, აბა სხვას ვის რად უნდა ჩვენი ცოდო! —
დარწმუნებით უპასუხა ნენემ და წასასვლელად
წამოდგა.

II

— ბიჭო, სანდრო! — გადასძახა ისაკა ჭა-
მიაშვილმა ახლად მოსულ ბიჭს, რომელმაც ბა-
რი იქვე მიაყუდა.

— რას მიბრძანებ, ბატონო!

— სხვები სად-ლა არიან?

— ახლავე მოვლენ სხვებიცა.

— სანამ ისინი მოვიდოდნენ, შენ წადი გიგო და ლევანთან და უთხარ, ამაღამ ვახშმად ჩვენსა წამოვიდნენ. ესაც უთხარ, ირმის მწვა-დებიც გვექნება-თქო.

— ეხლავე, ბატონო! — უპასუხა სანდრომ და როცა გაბრუნდა, უკმაყოფილოდ თავისთვის რაღაც წაიბუტის.

— პაპა! — უკანიდან მიაძახა ჭამიაშვილს ჩვი-დმეტ-თვრამეტი წლის ქალმა, რომელიც ის იყო მაშინ გამოვიდა სახლიდან და იმასთან მივიდა:

— მამაშამ, რომელი ლვინისა ჩამოვასხმე-ვინო ბოთლიკებშიო?

— დათუას ლვინისა-თქო, იმისმა ვენახმა კარგი ლვინო იცის, — უპასუხა ისაკამ, რის შემ-დეგაც ქალი შესრიალდა შინ, და თითონ-კი ლიმილით განაგრძო: — მალე დათუას მაგივრად, ჩემსას დავუძახებ იმის ვენახს, სულ მალე... რამდენი ხანია, — განაგრძო იმან ცოტახნის სი-ჩუმის შემდეგ, — ხან საიდგან მოვუვლი და ხან საიდგან იმის ვენახს და მაინც ვერა მოვუხიმანე-რა. ვერ იქნა და ვერ ჩავიგდე იმისი ვენახი ხელში, ვერა! რამდენიც სალმა გავუსვი, იმან მაინც აიცდინა. კიდევაც შევევაჭრე, მაგრამ არა ქნა: „ჩემი მამა-პაპის ოფლი შიგაა ჩალვრი-ლი და მე როგორ გავყიდო.“ ჰმ, არ გაჰყიდი?!“

აბა თუ არ გაჰყიდი და მაშებლა მიყურე, როგორი მოგვერდი გიგდო! მგონი ისე დაგცე, რომ ცხვირ-პირი ჩაიმტვრიო. ამ ორი კვირის შემდეგ საქმეს გაარჩევენ და მერე მე ვიცი: ავიღებ ისპოლნიტელნი ლისტს და მაშ რას იზამ, თუ ვენახს არ ჩამაბარებდე?! მაგრამ მოწმებმა რომ მიმტყუნონ?! — ამ უკანასკნელ სიტყვებზე ისაკას სახეს, ცოტა არ იჭოს, სიამოვნების ზეწარი გადაეცალა და შუბლი შეეჭმუხვნა.

ამ გვარმა მდგომარეობამ სულ ცოტა ხანს გასტანა. იმის სახეს დაფიქრების ჩრდილი გადაეცალა და გამხიარულებულმა წამოიძადა: „მოწმები როგორ მიმტყუნებენ?.. გიგო და ლევანი მშიერი აზნაური შვილები არიან, ორ ვროშად მამის სულს გაჰყიდიან და მე რომ ერთორი თუმანი მივცე, ხომ სულ ფიცით დასკდებიან. მამასახლისს კიდევ მოვუხერხებ რასმე...“ დაჭეუმარიტებით წარმოსთქვა: „მოვუხერხებ რასმე“ ცოტა ჩაფიქრების შემდეგ და თავის სახლ-მიდამოს გადათვალიერების შემდეგ აივანზე ბოლოთის ცემა დაიწყო.

ყოველთვის, როდესაც-კი ისაკა ჭამიაშვილი თავის გარშემოს თვალს გადაავლებდა და აივანზე ბოლოთის ცემას დაიწყებდა, უეჭველად

თავისი წარსული მოაგონდებოდა და ამ წარსულის მოგონებით სიამოვნებდა.

„რა ვიქნებოდი ეხლა მე, რომ შინ და-
ვრჩენილიყავ და გარეთ ფეხი არ გამედგა?“
უსიტყვოდ დაეკითხა ისაკა თავის თავს კარგა-
ხნის ბოლოთის ცემის შემდეგ, როდესაც ნიდა-
ყვებით დაეყუდა აივნის მოაჯირს და დიდხანს,
დიდხანს დასკეროდა იქვე; იმის სახლის გვერ-
დით, ჩამომჩანჩქარ წყალს, რომელიც თავის
ჩერიალით ატკბობდა მის სმენას და მოგონები-
სათვის ფანტაზიას უცხოველებდა.

მართლაც, რა იქნებოდა ისაკა, რომ თა-
ვასი მამა-პაპისთვის მიებაძნა და შინ დარჩენი-
ლიყო, როგორც დათუა და იმისი მოძმე გლე-
ხები შინ დარჩნენ და თავიანთ მამა-პაპას ბაძ-
ვენ, რის გამოც, თუმცა ალალის შრომით ალალ
ლუკმას სჭამენ, ნახევარზედ მშივრები და ტი-
ტვლები არიან! ხომ ისიც, როგორც იმისი თა-
ნამემამულე გლეხები, ყველას მონა უნდა ყო-
ფილიყო, ყველას იმისთვის უნდა ებრძანებინა
და თავში ჩაეკრა! ვინც-კი სოფელში სამი რუ-
სული სიტყვით მოვიდოდა, ხომ ყველას წინ
უნდა ქუდ-მოხდილი და გულ-ხელ დაკრეფილი
დამდგარიყო და წარბებში შეეცეირა, რომ იმის
ბერვა-პრანჭვის აზრს მიხვედრილიყო და აესრუ-

ლებინა ყოველივე იმისი სურვილი!.. მაზრის
 უფროსი, ბოქაული, მათი თანაშემწეები და გა-
 დამწერლები, გადამწერლების გადამწერლები და
 მათი თანაშემწენი, ასისთავები, მათი ჩატრები
 და მოჩატრებები,—ერთი სიტყვით, მაზრის მო-
 ხელების მთელი გუნდი, რომელიც მრავალ-
 ზედ მრავალ-შტოიანია, ხომ მარტო იმისთვის
 არსებობს და მოდის სოფელში, რომ გლეხს
 თვალები დაუბლვიროს, დასჭირებულის და, თუ
 მოისურვა, სილა გასტკიცოს ან მათრახი გა-
 დუჭიროს; თუ რამ გადასახდელი აქვს, წაარ-
 თვას, გააგდოს ბეგარაზედ, მიაყენოს გაჭირვე-
 ბა და ყელში წაუჭიროს და არა იმისთვის, რომ
 გლეხის საკეთილდღეოდ იზრუნოს... გლეხის
 ყველა ამ დამცირებას და დაჯუჯკვას კარგად
 ამცნევდა ეხლა ისაკა და ამისთვის, ყოველთვის,
 ასე თავის წარსულის მოგონებაში როდესაც
 გაერთობოდა, ადიდებდა იმ დღეს, რა ღღესაც
 იმისმა მამამ ის ერთ მედუქნეს, რომელსაც დუ-
 ქანი საქართველოს სამხედრო გზატკეცილის პი-
 რას ჰქონდა, მისუა ბიჭად. ის დღე იყო ნიშა-
 ნი ისაკას ახლანდელი მდგომარეობისა; იმ დღი-
 დან ამოიშვა გლეხის ტანჯვიდან თავი და მიალ-
 წია იქამდის, რომ ის დღეს სოფელში პირველ
 კაცად ითვლება: ყველა კრძალვით და მოწიწე-

გით ექცევა; მაზრის მმართველები, უფროსები, — თორებ ნაბოლარებს ხომ თითონაც არ იკად-რებს, — ჭყივილისა და კივილის მაგივრად პატი-ვისცემით ხელს უწვდიან, იმის სახლში სტუმ-რად მიღიან, სადაც სოფლის ხარჯით უხვს მას-პინძლობას უწევს, და ამით თავ-ბრუ-დახვეულები ყველგან და ყველასთან, თუ-კი რაიმე მი-ზეზით იმაზედ ბაასი ჩამოვარდებოდა, ამას გაი-ძახდნენ: „ისაკა პატიოსანი კაციაო.“

მართალია, პირველ ხანს დუქანში დიდი სიდუხჭირე გამოიარა, მაგრამ რა? განა ის ტან-ჯვა სახსენებელია იმასთან, რომ ეხლა ის თავისი მდგომარეობით კმაყოფილია?! ის დამცირება და მიწასთან გასწორება, რომელიც პირველ ხანს დუქანში წილად ჰქვდა, სასიქადულოდაც ჰქონ-და იმას და ბევრჯელ სხვებისთვისაც უამბნია.

ი ეხლაც, მოაჯირზედ დაყრდნობილს რომ თვალ-წინ წარმოუდგა თორმეტი წლის ისაკა, რომლის პიროვნებასაც მედუქნე უწყალოდ ფეხ-ქვეშ სრესს, ტალახით სთხუპნის, არ შეჰარა-კია ამ სურათმა, პირიქით, მის გულში სიხარუ-ლი დაპბადა და იმის-და უნებურად წარმოათ-ქმევინა: „იმისი დედ-მამა ვაცხონე, რომ ასე მექცეოდა; ასე რომ არ მომქცეოდა, მე ახლა ის არ ვიქნებოდი, რაცა ვარ!“

დიალ, ისაკა ისეთი არ იქნებოდა, როგორიც ეხლა არის. ასე რომ არ მოჰქცეოდა, იქნება ცოტაოდენი სიკეთე კიდევ შერჩენიულ რამ ისაკას, მაგრამ მეღუჯნე სხვანაირად ვერ მოექცეოდა, რადგანაც იმასაც ისე ექცეოდნენ, როგორც ის ისაკას. ჩვენებური დუქნები-კი ერთგვარი სკოლაა, რომელშიაც მეფობს აღზრდის ერთგვარი მეთოდი. იმის საშვალებით ამზადებენ „ისაკებს, გეურქებს და არტემებს“, რომლებიც მზად არიან თავიანთ მოძმეთა სისხლი დალიონ. სამ წელიწადს ისაკა ისე გაიწვროთნა, რომ მეღუჯნის თვალის დახამხამების აზრსაც-კი იგებდა.

გზა-ტკეცილის პირას მოვაჭრე მეღუჯნები, გარდა იმისა, რომ მგზავრთ ვაჭრობაში ტყავს აძრობენ, სხვანაირადაც მოქმედებენ იმათ გასაყვლეფად; არც ერთი გაძარცვა გზაზედ ისე არ მოხდება, რომ მეღუჯნებმა მონაწილეობა არ მიიღონ: ბევრჯერ წაურთმევიათ მგზავრისთვის ფული და ნივთეულობა, და ამაში მეღუჯნები, პირველი ადგილი თუ იმათ არა სჭერიათ, დამხმარებელნი მაინც ყოფილან. ბევრჯერ შიგავე დუქანში გაუძარცვავთ დამთვრალი მგზავრი და, ვინ იცის, რამდენჯერ სადგურების ახლო ნივთეულობით სავსე ყუთები აუცლიათ საფოსტო ეტლებით მოგზაურთათვის.

ყველა ეს საიდუმლო გაანდო მედუქნებ
ისაკას, რომელმაც ამაში დიდი გამჭრიახობა და
ფხა გამოიჩინა: ამის გამო ისაკა, ჯერ თუ ბი-
კად იყო დუქანში, მერე ამხანაგად გაუხდა, და
ასე თვე-თვეებს გასდევდა, წელიწადი წელიწა-
დებს და ისაკას თანდათან ზურგი უმაგრდებო-
და. ამ ხანობაში ისაკამ ცოლიც შეირთო.

როცა ისაკამ ზურგი კარგა მოიმაგრა, თა-
ვის ამხანაგს, რომელმაც აღზარდა და გაწვრთნა,
ისეთი მოგვერდი უგდო, რომ ცარიელზე გაი-
ყვანა.

ბევრის ხვეწნისა და მუდარის შემდეგ თა-
ვისი გამწვრთნელი ისევე მიიყვანა ამხანაგად იმ
პირობით, რომ გზის პირას ვაჭრა და საქმე
ეწარმოებინა, წელიწადში რამდენჯერმე მიეცა
ისაკასთვის ანგარიში და მოგების ნახევარი ჩაე-
ბარებინა; თანხა-კი უკვდავად ისაკასი უნდა
დარჩენილოყო...

რაკი გზის პირას ვაჭრობის საქმე ასე მო-
აწყო, თითონ დაბრუნდა თავის სოფელში და
იქ საკუთრივ დუქანი გააღო, რომელშიაც
დახლიდრად თავისივე გაწვრთნილი ნათესავი
დააყენა. *

აქედან იწყება ისაკას ცხოვრების მეორე
ხანა და ამასთან ორგვარი მოღვაწეობაც სო-

ფელში: როგორც ვაჭრისა და როგორც საზოგადოების წევრისა, რომელშიაც ის ვაჭრობდა.

ვაჭრები თუ როგორ სძარცვენ სოფლებს, ამაზედ ბევრი თქმულა და დაწერილა. ყველა ამას ჩვენ იმასლა თუ დავუმატებთ, რომ სოფელში მოვაჭრე ერთისა და იმავე ნივთის გაყიდვა-ში ერთსა და იმავე დროს ორნაირ სარგებელს იღებს. ამის გამოსარკვევად მაგალითს მოვიყვან:

ვსოდათ, ვაჭარს რომელიმე ნივთი, რომელსაც გლეხი ყიდულობს, ულირს სამ შაურად, თითონ-კი, სულ რომ ნავლები, ცხრა შაურს მაინც გამოართმევს. გლეხმა რომ ქისა გახსნას და ცხრა შაური გადაუთვალოს, მაშინ ვაჭარს სამშაურიან ნივთში ექვსი შაური წმინდა მოგება დარჩება, მაგრამ გლეხს ქისა ცარიელი აქვს და ამისთვის ის თავის ნაწარმოებს, მაგ.: ხორბალს, ქერს, სიმინდს და სხ. აძლევს ცხრა შაურში იმ ფასად-კი არა, როგორც ბაზარში ფასობს, არამედ ნახევარ ფასად. ფუთი ხორბალი რომ თვრამეტ შაურად ღირდეს, ის ცხრა შაურად იღებს, მერე ჰყიდის ხშირად იქავე გლეხზედ თვრამეტ შაურად და ამ გვარად სამ-შაურიან ნივთში ექვსი შაურის მოგების მაგივრად თხუთმეტ შაურს იგებს.

ისაკა სოფელში სხვა მოვაჭრეებს თუ არ
გადააჭარბებდა ამგვარ მოქმედებაში, უკან არ
ჩამოურჩებოდა. ის, როგორც ვაჭარი, დღითი-
დღე ტყავს აძრობდა გლეხებს და მდიდრდებო-
და. მაგრამ ისაკას, ვაჭრობის გარდა, გლეხების
გასატყავებლად კიდევ სხვა გზაცა ჰქონდა. სხვა
ვაჭრები, რომლებიც შეხიზნულან სოფელში,
ვაჭრობის გარდა, სოფლის საქმეებში ვერ გაე-
რევიან, რადგანაც ისინი იმ საზოგადოების წევ-
რებად არ ითვლებიან. ისაკას საქმე-კი სულ
სხვანაირად იყო. ისაკა იმ საზოგადოებაში ვაჭ-
რობდა, რომლის წევრადაც ითვლებოდა, და
ამისთვის ნება ჰქონდა გარეულიყო სოფლის
ყოველ საქმეში. ასეც მოიქცა ისაკა. თითქმის
ყოველ სასოფლო საქმეში ძალითა თუ ნებით
ისაკა იყო თორმეტი კაცის რიცხვში, რომელ-
თაც, სხვა მოვალეობათა შორის, სახელმწიფო
ხარჯის გაწერაც ჰქონდათ მინდობილი. ისაკა
იყო მაწარმოებელი სასოფლო დავთრებისა, ისაკა
იყო მწერალიც, ისაკა აწარმოებდა სხვა ორ
კაცთან ერთად სასოფლო მაღაზიასაც. ერთხნო-
ბით მამასახლისადაც იყო ამორჩეული. რასაკვირ-
ველია, ისაკასთანა კაცები ამ გარემოებით ისარ-
გებლებდნენ და არც ისაკა აკლებდა. სადაც-კი
ისაკამ გამოსარჩენი რამ შენიშნა, იქ დააგო თა-

ვისი ფაცერი და დღე-მუდამ განუწყვეტლივ წვრილსა და მსხვილ თევზეს აბამდა.

ხარჯის გაწერის დროს ის ყოველთვის ერთ ორმოც თუმნამდის მაინც თავის სასარგებლოდ გააწერდა სოფელს. კერძო ჯარიმებს, რომელ-საც სოფლის მოსამართლეები ახდევინებდნენ რაიმე საქმეში დამნაშავე გლეხებს, თავის სა-სარგებლოდ აკრეფინებდა იასაულებს და დავთ-რებში სწერდა, რომ ეს ამაზედ დაიხარჯა და ეს ამაზეო. სასოფლო მაღაზია ხომ საკუთრებად გაიხადა.

ვინ ჩამოსკოვლის კიდევ, რითი არ სარ- გებლობდა ის. ისაკასთანა კაცი ყოველთვის დაინახავს სოფელში უპატრონოდ დატოვებულს რამ სარჩოს, რომელსაც თავის სასარგებლოდ ილებს.

ისაკა ხედავდა, რომ ხმის გამცემი არავინ იყო და ამისთვის თავისუფლად ფართაშობდა სოფელში.

მართლაც და ვინ გაუძალიანდებოდა? გლე- ხები, რომელთაც შეამჩნიეს ისაკას მრუდობა? გლეხებმა ყოველთვის იციან, ვინ ჰყვლეფავს იმათ, მაგრამ ხმას ვერ ილებენ, და ძალა-უნებუ- რად ხმის ამოუღებლად წინ უწვებიან ცხვრები- ვით, რომელთაც დუქარდით შიგ ძირში პარსავენ.

რამდენს სულ ტყუილად გადახდევინა
ვითომ-და იმისი მამისა ან ბიძის ვალი.

როდესაც მამასახლისად იყო, დასწერდა
თამასუქს და დაბეჭდავდა, მოწმეებად იმისთანებს
ჩასწერდა, რომლებიც უკვე გარდაცვლილები
იყვნენ, ან კიდევ თავის ერთგულ გიგოს და
ლევანს, რომლებსაც ცოტაოდენ წილს უდებ-
და, და სასოფლო კანცელარიაში უჩივლებდა
თავის ტყუილ მოვალეს, სადაც, რასაკვირვე-
ლია, საბუთების წინააღმდეგ ვერ წავიდოდნენ
და გადასწყვეტდნენ, რომ მოვალემ ნაღდად
ჩააბაროს ისაკას და ამით მშობლების ცოდო კი-
სრიდან მოიშოროსო.

გღერები ხმას ვერა სცემდნენ და სხვა მო-
წინააღმდეგე-კი არავინ იყო.

დუქნის საშუალებით და სოფლის საქმეე-
ბის წარმოებით ისაკა ისე გაიჭინა, რომ ახლო-
მახლო სოფლებში სიმდიდრით აღარავინა სჯო-
ბდა. ერთის აოხრებული აზნაურიშვილის მამუ-
ლი შეირჩინა თითქმის სულ მუქთად და ხვნა-
თესვის მიჰყო ხელი, „გადაჭვიმა“ ორ-სართული-
ანი სახლი, რომლის ოთახები ევროპულად
მოაწყო, და შიგ დაესახლა თავისი ცოლ-შვი-
ლით. ევროპულად მორთო თავისი ორი ქალი
და ორი ვაჟი-კი სასწავლებელში მისცა, საი-

დანაც უფროსი უკვე სწავლა დაუმთავრებლად დაუბრუნდა შინ და აგერ ჯერ-ჯერობით ნადირობას მიჰყო ხელი, თუმცა ხანდისხან სოფლის საქმეების წარმოებაშიაც ეშველებოდა ხოლმე მამას, რომელიც შემდეგში, რასაკვირველია, ამ საქმეების წარმოებას იმას გადასცემს, რადგანაც იმისთანებში დიდს უნარსა და ფხას იჩენს.

თუმცა ისაკას ეხლა იღარა უჭირდა-რა, მაგრამ მაინც წართმევის სურვილი უფრო უცხოველდებოდა და გაუმაძლრობა ემატებოდა.

წართმევის სურვილი თითქმის სენად გადაეჭცა ისაკას და ხანდისხან ეს უინი ისე მოუვლიდა, რომ მზად იყო ყოველივე საშუალება ეხმარა, ყოველისავე სისაძაგლისათვის ხელი ჩაევლო, ოღონდ-კი წაერთმია ვისთვისმე რამ.

აი ეხლა იმას თავისი წარსული მოგონებით გატაცებულს და სიამოვნებით მოცულს უეცრად წამოჰკრა ამ უინმა და მთელი ტანით შეარყია. მაშინვე მოტრიალდა და აივანზედ აჩქარებით გაიარ-გამოიარა.

უკვე დაბნელებულიყო. აქა-იქ ღრუბლებს შუადგან ვარსკვლავები მოწყენით გამოსცეროდნენ სოფელს, სადაც მიწყვეტილიყო ადამიანის ხმა და მარტო ხანდისხან ძალლების გა-



გრძელებული ყეფა-და მოისმოდა, და თავიანთ
მკრთალი შუქით მიძინებულს სოფელს უფრო
ძილს ჰგვრიდნენ.

— ბაბე! — წამოიძახა ისაკამ გაჯავრებული
ხმით და კარებს შეხედა, საიდგანაც ამ დროს
იმისი გასივებული ცოლი გამოვიდა.

— ადამიანო, ბალკონზედ რას აკეთებ და
შინ არ შამოხვალ?! — საყვედურის კილოთი უთხ-
რა ბაბემ და მიუახლოვდა.

— ბიჭი არ დაბრუნებულა? სად არის აქ-
ნობამდის ის ოხერ-ტიალი?!

— რამდენი ხანია, რაც დაბრუნდა!

— მერქ, რა თქვა, მოვლენო?

— რას არ....

— აუ-აუ-აუ! .. — ამ დროს წამოვარდა კი-
ბეზედ მწოლიარე ბროლია და თავ-პირის მტვრე-
ვით დაიწყო ბოხი ხმით ყეფა და გზისკენ გა-
დახტა, სადაც ორი კაცი გამოჩნდა.

— გადი, გადი! .. — დასძახეს იმათ და ჯო-
ხებით ძალლის გერება დაიწყეს.

— აი, შე ვერანავ, შენა! .. გამოდი, გა-
მოდი! .. — ყვიროდნენ ცოლი და ქმარი და იმა-
თკენ მიეშურებოდნენ.

ბროლია-კი არ ეხსნებოდა იმათ და ზედა
ვარდებოდა.



— რა კაპასი რამა გყავთ, კინალამ არ შე-
გვწამა!.. — წამოიძახა გიგომ, როდესაც ისაკამ
ქვის სროლით ძალლი წინ გაიგდო, და ბაბეს
ხელის ჩამოსართმევად თავისი გაუწოდა.

— ხანდისხან იცის ხოლმე მაგრე გაგიუება,
თორემ ისე კეკვიანია.

— რაღა ჩემზედ გაგიუდა! — ჩამოართვა სიტ-
ვა ლევანმა და იმანაც ხელი გაუწოდა ბაბეს.

— იმიტომა, ჩემო ლევან, რომ ძალიან
ძვირად მოდიხარ ჩვენსა!

— აზნაურის სტუმრობაო ნუ გვონია ხუ-
მრობაო, ხომ მოგეხსენებათ ქართული ანდაზა?
ხშირად რომ ვიაროთ, მაშინ...

— მაგისი ნუ გეფიქრებათ, გიგო, თქვენ
დასახვედრად კიდევ მოგვეპოვება რამ. — თავ-
მომწონედ გააწყვეტინა სიტყვა გიგოს ბაბემა.

— მოიწვიე, რაღა მანდ ებაასები? — უთხრა
ბაბეს ამ დროს მოსულმა ისაკამ და გიგოს ხე-
ლი ჩაავლო.

მასპინძელ-სტუმრები ერთად შევიდნენ მშვე-
ნივრად მოწყობილ სასტუმროში, სადაც ორი
თავშიშველა ქალი დაუხვდათ. ესენი მიესალ-
მნენ სტუმრებს, რომლებმაც მოწიწებით ჩამო-
ართვეს ხელი, და დედის გვერდით დასხდნენ.

— რატომ არ დაათხოვებ ე შენ ქალებს,

რალას ელი? — მიჰმართა გიგომ ისაკას, როდესაც
ქალებს ხელი ჩამოართვა და იმის გვერდით დაჯდა.

— იმას ველი, რომ კარგ კაცებს ვეძებ;
უბრალოს ხომ ვერ მივცემ.

— უბრალოს მიეციო, ვინ გეუბნება, განა
კარგები ცოტანი არიან?

— ჩემი ქალები სამსახურის კაცებს უნდა
მივათხოვო. თუ არ სამსახურის კაცს, არც თი-
თონ ნდომობენ სხვას მისთხოვდნენ ვისმე. — ჩაე-
რია ლაპარაკში ბაბე და თავის ქალებს შე-
ხედა, რომლებმაც დედის სიტყვაზედ თავები
ძირს ჩაჰკიდეს და გაწითლებულებმა რაღაც
წაიბუტბუტეს.

— სამსახურის კაცები რას დაგიუინიათ, აი-
ღეთ და მამული შვილს მიათხოვეთ, რომ...

— ის არა სჯობია, მამული შვილიც იყოს
და სამსახურისაც! — ჩამოართვა ბაბეშ გიგოს სი-
ტყვა: — დაიცათ, ჯერ ქალაქში გადავსახლდეთ,
მაშინ ნახავთ, როგორ სულ დაწკეპილ აფი-
ცრებს მივათხოვებ. ენაცვალოს დედა ჩემს სო-
ნას, შარშან რომ ჯარმა აქეთ გაიარა, აფიცრე-
ბზედ დარჩა თვალი და ერთი ამოიოხრა, რომ...

— კარგი, ერთი!... — წაპბუზლუნეს თავ-ჩა-
ლუნულმა ქალებმა დედას და საჩქაროდ მეორე
ოთახში გაცვივდნენ.



— ეი, ეი, რას გარბიხართ? შეგრცხვათ,
რომ თქვენი სურვილი დედამ გაგიმულავნათ?! —
სიცილით მიაძახა ლევანმა ქალებს.

— ძალიან მორცხვები არიან, ენაცვალოთ
დედა! — სიამოვნებით წამოიძახა ბაბემა.

— ოჰ, მონადირეს გაუმარჯოს! --- ლევანმა
და გიგომ ერთად მიაძახეს ილას, რომელმაც ამ
დროს შემოაღო კარები და ლიმილით სტუმრე-
ბისაკენ წავიდა.

— სად იყავი, შვილო, აქნობამდის? —
მზრუნველობით ჰკითხა დედამ ილას.

— დუქანში. ეხლა დაკეტა მიტრომ და
წამოვედი მეც.

— დუქანში კი არა, ნათლი-დედასთან იქ-
ნებოდი! — სიცილით უთხრა ლევანმა და ილა
გვერდით მოისო.

— ეე, ლევან, შენ ჩემი მტერი ხარ, — სიცი-
ლითვე უპასუხა ილამ, — ეგენი არ იყოს, თო-
რემ, ხომ იცი, მეც გაგიქვეყნებ!

— მაგას რაღა დამალვა უნდა, დღე თუ
ნადირობ, ლამე-კი არ გინდა ნადირობა? .. —
გაეხუმრა ეხლა გიგო.

— ლამე რაღ მინდა ნადირობა, როცა ნა-
დირი დაბმული მყავს!

— ვერ უყურებ ამას! — სიცილით წამოიძა-

ხა გიგომ: — მე მეგონა, ჯერ ისევ ნადირობს-მე-
თქი და შენ-კი თურმე კიდეც დაგიბამს?! მაშ
შენი საქმე კარგად იქნება!

— კარგად, კარგად, ლმერთმანი, წინ აღარა
გველობება-რა!.. ერთი ეს არის, რომ ნათლი-
მამაც შინ არის ხოლმე და ამისთვის ვერას ვა-
რიგებ...

— ეე, არ ვარგებულხარ, შვილო: მაშინ
მიღი ხოლმე, როცა ნათლი-მამა შინ არ იყოს!
— უთხრა ისაკამ და მერე ცოლს მიუბრუნდა, რო-
მელიც სიყვარულის ლიმილით თავის ილას შეს-
ცქეროდა.—აბა, ბაბე, ვახშმის თავ-დარიგს შეუ-
დექი!

— სუფრა გაშლილია, წამობრძანდით!

ამ სიტყვებზედ ყველანი მეორე ოთახში
გავიდნენ, საღაც გაშლილი სუფრა დახვდათ.

ვახშმად ყველაფერი ჰქონდათ: წვნიანიც,
შემწვარიც, ხმელიც და ნედლიც. ღვინო ხომ
უხვად იყო.

სტუმრები გამალებულები სჭამდნენ; რაც
მოჰქონდათ, შეუჭმელს და დაულეველს არას
უშვებდნენ. არც ლაპარაკს აკლებდნენ: ლაპა-
რაკობდნენ ამ მთისას, იმ მთისას; ძველისა და
ახლისას. ისაკამ და გიგომ თავიანთ ჯეელობის
ამბებიც მოიგონეს და ორნივე იმ დასკვნამდის

შივიდნენ, რომ „წახდა დროებაო... მაშინდელი ჯეელები სჯობდნენ ეხლანდელებსაო“.

ქალები-კი, ბაბეს გარდა, გაჩუმებულები ისხდნენ და მოწიწებით კიკნავდნენ საჭმელს. როცა მწვადები შემოუტანეს, თითო ნაკერი შეჭამეს და სტუმრებს დასაძინებლად გამოემშვიდობნენ. ბაბემაც ცოტა ხანს შემდეგ თავის ქალებს მიბაძა და ისიც მოშორდა იმათ. სუფრას შერჩნენ მარტო ისაკა, გიგო, ლევანი და ილა, რომლებმაც ლვინის სმით შუალამეს გადააცილეს.

ბოლოს ისაკამ ხერხიანად ჩამოაგდო დათუაზედ ლაპარაკი და გიგოსა და ლევანს აგრძნობინა, რომ იმათი მოწმობის იმედი არა აქვს.

— რაო? — იფეთქა წყრომით ისაკას ეჭვზედ გიგომ და გულზედ ხელი დაიკრა: — გიგო მოკვდეს, თუ ჩემ სიტყვას ვუმტყუნო, გინდაც ამისთვის თავს მჭრიდნენ!.. შენ, როგორც გეტუმბა, ჯერ კარგად ვერ მიცნობ!..

— არა, ჩემო გიგო, თავი მომიკვდეს, თუ მე ან შენზედ, ან ლევანზედ ეჭვი შემომეტანოს, — ასტატურადვე მოუქონა თავი გამწყრალ გიგოს-ისაკამ, როდესაც დარწმუნდა, რომ გიგო და ლევანი არ მიმტყუნებენო და მამასახ-

ლისზედ დაიწყო: — მე აი მამასახლისზედ ვამ-
ბობდი. ცუდად მოვიქეცით, რომ იმის სახელით
შევამოწმეთ.

გიგოსა და ლევანისთვის ეს საკმარისი იყო,
რომ ამათი თავმოყვარეობა დაკმაყოფილებუ-
ლიყო და ამ საქმეში ისეთი მონაწილეობა მიე-
ღოთ, თითქოს ეს იმათ ღვიძლ შვილს შეე-
ხებათ.

— ეგ-კი საფიქრებელია!.. — მზრუნველო-
ბით წამოიძახა ორმავე და ლრმად ჩაფიქრდნენ.

— მინდოდა, — დაიწყო ისაკამ ისევ იმ კი-
ლოთი, — ეხლა ისიც მომეწვია, მაგრამ გვერ-
დით რომ მოგვესო, ვაი თუ უფრო გატყლარ-
ჭულიყო.

— კარგი გიქნია, რომ არ მოგიწვევია,
თორემ, ხომ იცი, გლეხი-კაცის ამბავი: რაც
თავს გაუყადრებ და პატივსა სცემ, უფრო თავს
წამოგაჯდება. ეს მე კარგად ვიცი! — უპასუხა
გიგომ ისაკას ამ უკანასკნელის სიტყვებით უფ-
რო თავ-მობოხილმა.

— მამი, შენ მამასახლისისა ნუ გეშინიან! —
ჩაურთო სიტყვა ილამ, როცა მამას მართლა-და
შიში შეატყო: — როგორ შეუძლიან სთქვას რა-
მე და არ გიმოწმოს, ხომ ციმბირს იქით გააცი-
ლებენ! ჯერ შაამოწმა და ეხლა უარს იტყვის?!

შენ ციმბირით შეაშინე და მაშინ ნახავ, როგორ ფიცით ყბები ამოიგდებინოს, რომ შენი დათუას მართებს.

— მართალია, ეგ თავში სულ არ მომსულია ფიქრად? — სიხარულით წამოიძახა ისაკამ, მაგრამ უეცრად შუბლი ისევ მოეჭმუხნა და სიხარული მოსცილდა.

— ეგ-კი, — დაიწყო შუბლ-მოჭმუხნილმა ისაკამ, — მაგრამ იმან რო არ იცოდა, საქმე რაში იყო, როცა ბეჭედი დავასმეინეთ, და არც ეხლა იცის. იმას ხომ შეუძლიან თქვას, რომ მე სულ არ ვიცოდი, რას მამოწმებინებდნენო, რადგანაც კითხვა არ ვიციო.

— მით უკეთესი! რო სცოდნოდა, ხომ არც შეამოწმებდა! ეხლა გააგებინე და რას იზამს, თუ არ დაგემოწმება?! როგორ შეუძლიან გააცხადოს, რომ შევამოწმე და არ ვიცოდი, რას ვამოწმებდიო! იქნება იმას ხემწიფეზედ ამოწმებინებენ რასმე, უნდა შეამოწმოს ისე გაუგებრად?! აბა ეგა თქვას და მაშინ ნახავს, საით უკრავენ თავს!.. — ილამ დარწმუნებით წარმოსთქვა ეს მოსაზრებანი, გაბრწყინებულის სახით შეჰედა მამასა, რომელიც მაშინვე სიხარულით წამოვარდა და შვილს გადაეხვია:

— ღმერთმანი, შვილო, შენ ჩემზედ მო-

საზრებული ხარ!.. — შესძახა იმან და გატაცე-
ბით ჩაკოცნა.

IV

მაზრის სამსჯავროში დიდიხანია, რაც ხალ-
ხი შეიყარა და ადგილები დაიჭირა. მომეტებუ-
ლი ნაწილი გლეხობა იყო. ყველას თავ-პირი
ჩამოჰკიდებოდა და ნაღვლიანად შესცემეროდა
მომრიგებელ მოსამართლეს, მაუდის წითელ
სუფრა-გადაფარებულ ტაბლას, რომელზედაც
საწერ-კალამი და რამდენიმე წიგნი იდო.

დათუა შრომიშვილიც იმათ შორის იჯდა
და ხშირ-ხშირად გადაჭხედავდა ხოლმე ისაკასა
და იმის მოწმეებს, რომლებიც ხმა-დაბლა რა-
ღაზედაც ბაასობდნენ.

„ვაიმე!“ თავისთვის წამოიძახებდა ხოლმე
ბრაზ-მორეული დათუა ყოველ შეხედვაზედ და
თავისთვისვე განაგრძობდა: „რა უნდა მაგ კომ-
ლობა-ამოსაწყვეტს ჩემგან, რომ ტყუილ-უბრა-
ლოდ აქ ამომათრია! ვითომ რას წაილებს, რომ
მიჩივლა?!“

„ვითომ რას წაილებს, რომ მიჩივლა“-ო,
იძახოდა დათუა იმისთვის, რომ ის დარწმუნე-
ბული იყო თავის სიმართლეში და ვერ წარმოედ-

გინა, თუ ტყუილად გადაახდევინებდა ვინმე რასმე სამართლის ძალით.

როცა მღვდელმა უწყება წაუკითხა და გამოუცხადა, რომ ისაკა სამოც თუმანს გიჩივის და ამისთვის გიბარებენო, ის გაოცდა და კარგახნაგამდის გონს ვერ მოვიდა.

„მერე რას წაიღებს, რომ მიჩივის?! განადა ალალაობაა, რომ არ მემართოს და ისე წამართვას! სამართალი აღარ არის ქვეყანაზედ!“ დამშვიდებით წარმოსოდეს პირველი გაკვირვების შემდეგ იმან მღვდელთან. და შინ წამოვიდა.

მას შემდეგ დათუას ამაზედ აღარც-კი უფიქრია და დანიშნული დღისთვის არხეინად წამოვიდა მაზრის სამსჯავროში, სადაც აი ეხლა სხვებთან ერთად ელოდა, თუ მომრიგებელი მოსამართლე როდის გამოვიდოდა და დაიწყებდა იმის საქმის გარჩევას, რომ ის გამართლებული შინ გაესტუმრებინა.

აგერ ტაბლის იქით პირდაპირ კარი გაიღო და მომრიგებელი მოსამართლეც გამოვიდა, რომლის დანახვაზედ ყველანი ფეხზედ წამოდგნენ. ის ისე დაჯდა და ძეწკვი ისე ჩამოიქიდა, რომ ხალხისთვის არც-კი შეუხედნია. დაჯდომის უმაღალალდებს ჩერეკა დაუწყო, რომლებიც თოთონ შემოიტანა და ზოგი-კი მდივანმა მიაწოდა.

— დასხედით!.. — დაუძახა ხალხს კარებში
მდგომა მოსამსახურები.

ხალხი დასხდა. ამ დროს შემოვიდა ილ-
ლიაში პორტფელ-ამოჩრილი ახალგაზდა კაცი
და მოლიმარის სახით მოსამართლისკენ წავიდა,
რომელმაც ღიმილითვე ხელი გამოუწოდა და
ჩურჩული დაუწყო.

— ეგაა, რომ აქებენ?! — გაკვირვებით ჩაე-
კითხა ერთი გლეხი მეორეს და გიორგი „ადვო-
კატს“ ჩააკვირდა.

— სუდიასთან როგორ დაახლოვებული ყო-
ფილა, აგერ როგორ უცინიან ერთმანეთს!..
— განაგრძო ისევ იმ გლეხმა, როდესაც დას-
ხდნენ.

— მაშა, კაცო!.. ეგა და სუდია ესე არიან,
აი!.. — უპასუხა პირველმა და საჩვენებელი თი-
თები ერთმანეთს მიატოლა.

— ნეტავი მაგას!.. — წამოიძახა მეორემ და
გაჩუმდა.

მოსამართლის დანახვამ დათუა, ცოტა არ
იყოს, შეაშინა და იმისმა მოქუშულმა სახემ
იქვნეულებით გააფიქრებინა: „ვაი თუ გამამ-
ტყუნოსო.„ მაგრამ იმან ამ დროს სარკმლის
ახლო ჯვარსა და სახარებას თვალი შეასწრო და
იმედი ისევ მოეცა: „როგორ გამამტყუნებს, რო-

ცა მართალი ვარ!“ გაიფიქრა იმან და მოსამართლის მოძრაობას თვალყურის დევნა დაუწყო.

მოსამართლემ გაათავა გიორგი „აღვოკატთან“ ბაასი და პირ-და-პირ საქმეების ვარჩევას შეუდგა.

ამოიკითხა ჯერ ერთი, ახლა მეორე, მესამე და ასე რიგ-რიგად არჩევდა საქმეებს და ყოველ განაჩენის წაკითხვაზედ ხალხს ფეხზედ წამოაყენებდა ხოლმე.

მიღვა ჯერი დათუაზედაც.

ამოიკითხა მოსამართლემ ისაკა ჭამიაშვილი და დათუა შრომიშვილი, რომლებიც მაშინვე გავიდნენ.

— შენ, — უთხრა მოსამართლემ, — ისაკა ჭამიაშვილის სამოცუ თუმანი გმართებია და რატომ არ აძლევ?..

— რისა მმართებია, შენი ჭირიმე, ჩემ დღე-ში მაგისგან ვალი არ ამილია! ერთი სამიოდ თუმანი მმართებს, ისიც მამი-ჩემის აღებული, და შამოდგომაზედ გავუსწორდები.

— სამიოდ თუმანს კი არა, სამოცუ თუმანს გიჩივის და აი თამასუქიც აქ არის. ტყუილად ხომ არ დაუწერდნენ და შეუმოწმებდნენ!

— მაგისგან განა ძნელი მოსალოდნელია რომ ტყუილად დასწეროს.

— ბევრს ნუ ლაპარაკობ, აგერ მოწმეებიცა
ჰყავს.

— რაც არა მმართებს, როგორ არ ვილა-
პარაკო.

— ჩუმად, კარგი! — შეუტია მოსამართლემ
და მოწმები გამოიძახა. ისაკა-კი გაჩუმებული
იდგა ამ დროს და, როცა დათუა უარს ჰყოფ-
და, გაკვირვების ნიშნად იღიმებოდა.

— დაფაფიცო? — დაეკითხა მოსამართლე და-
თუას, როდესაც გიგო, ლევანი და მამასახლისი,
რომელსაც მკვდრის ფერი დაედო, გამოვი-
დნენ.

— დააფიცე და მაშინ როგორდა იტყვიან
ტყუილს! — უპასუხა დათუამ და მერე მამასახლისს
მიუბრუნდა: — როდის ვისესხე, რომ შაგიმოწმე-
ბია, ჰა?

ამ უეცარმა კითხვამ მამასახლისი სულ და-
აბნია და ჭირის ოფლი დაასხა, რისგამოც ის
კინალამ გადაიქცა.

— რა ვიცი, როგორ აიღე! — წაილულ-
ლულა თავისდა უნებურად და ისაკას ისეთი
თვალებით შეჰქედა, თითქოს ამისი თქმა უნდაო:
„შენი ოჯახი დააქციოს ღმერთმა, რომ ამ ცეც-
ხლში ჩამაგდეო!“

— თუ არ იცი, შე ოჯახქორო, და... ამ

ბეჭედს რაღას უცემდი?! — უფრო ხმა-მაღლა წამოიძახა დათუამ და თვალებში ჩაკვირდა მამასახლისს.

— თქვენი კანცელარია ნუ გგონია აქ, ნუ ჰყვირი! — შეუტია მოსამართლემ და შემდეგ დანარჩენებს მიჰმართა:

— წადით, დასხედით და მღვდელი ეხლავ მოვა.

ისინი ყველანი გამობრუნდნენ თავთავიანთ ადგილებისკენ. მოსამართლემ-კი სხვის საქმეების გარჩევა დაიწყო.

დათუას მღვდლის ხსენებაზედ გამართლების იმედი ისევ მოეცა, რომელიც მოსამართლემ სულ შეურყია და მოაშორა. მამასახლისი-კი უფრო შეაშინა და დააფიქრა. როცა ის მოსამართლემ გაიძახა, ეგონა, იქნება დაუფიცებლივ გადავრჩეო, რადგანაც იქ მღვდელს თვალი ვერსად მოჰკრა, მაგრამ იმედი გაუცრუვდა: ის უნდა დააფიცონ.

„ჯანი და სული-წაუვიდეთ, გამგზავნონ ციმბირს!“ დიდის ხნის ფიქრის შემდეგ წამოიძახა უსიტყვოდ მამასახლისმა; მაგრამ ამავე დროს თვალწინ ცხადად წარმოუდგა თავისი კარმიდამო, ცოლშვილი და ტანში გააურუოლა. „ღმერთო, რა ცეცხლში ჩამავდე!“ საყვედურის

კილოთი წაიჩურჩულა თავისთვის და ხელები წინ გაიშვირა, თითქოს უნდოდა ხელში აეყვანა ვინმე და გულში ჩაეკრა, რომ გამომშვიდებოდა. ყმაწვილის მაგივრად, რომელიც იმას მოელანდა, ხელები წინ მჯდომ კაცს წაავლო და ეს უკანასკნელი მოხედვის შემდეგ დაეკითხა: „რა გინდა“—ო. ამ კითხვაზედ ის გონის მოვიდა. ხელები გაუშვა და უთხრა: „არაფერი, მომიხვდა ხელი“—ო.

„ვერა, ვერ დავთმობ!“ გადაწყვეტით წამოიძახა იმან, როცა იმის წინ მჯდომმა კაცმა ისევ იქით მიიხედა, და გაოფლიანებული შუბლი მოიწმინდა.

ამ დროს მღვდელიც შემოვიდა და ის სხვა მოწმეებთან ერთად დასაფიცებლად გავიდა.

დაფიცების შემდეგ მოსამართლე ისევ დათუას საქმეს დაუბრუნდა და მოწმეებს სათითაოდ ჩვენება ჩამოართვა.

სამმავე მოწმემ ერთნაირად აჩვენა, რომ დათუას ისაკასი ნამდვილად ჰმართებს სამოცი თუმანი.

— ისე თქვენი ოჯახი აშენდეს, როგორც მართალს ამბობთ! — გულჩაწყვეტით, თითქმის ტირილით, წამოიძახა დათუამ და მუხლები ჩაიკეცა.

რაკი მოწმეებს ჩვენება ჩამოართვა და ხელი მოაწერინა, ცოტა ხნის წერის შემდეგ მოსამართლემ განაჩენი წაიკითხა, რომლის ძალითაც დათუა შრომიშვილმა უნდა გადიხადოს სამოცი თუმანი ისაკა ჭამიაშვილის სასარგებლოდ და იგრეთვე სამსჯავროში საქმის საწარმოებელი ფული რვა მანეთი.

— ღმერთი აღარა გწამთ, ტყუილად რად უნდა გადავიხადო?! — წამოიღრიალა დათუამ, განაჩენი რომ მოისმინა, და ჯავრისაგან ცრემლები გადმოჰყარა.

— როგორ თუ ტყუილად! — შეუტია მოსამართლემ და განაჩენი იქით გადასდო.

— ღმერთი, რჯული, არა მმართებს... დაიჯერეთ, ქრისტიანები არა ხართ?

— კარგი, წადი... თუ გინდა, აქედგან ასლი გაიტანე და სხვაგან გადიტანე საჩივარი.

— სხვაგან სადღა გადავიტანო? თუ-კი აქ არ მაძლევთ სამართალს, იქ-კი მამცემენ?!

— გაიყვანეთ ეგ დათვი!.. — წამოიყვირა მოსამართლემ და თავპირ-ანთებული ზეზე წამოვარდა.

V

ნენემა და იმისმა რვა წლის ვაჟმა გაბროშ დიდი ხანია, რაც დაიძინეს. დაიძინეს აგ-

რეთვე სხვებმაც სოფლებში, ან-კი აქნობამდის დაუძინებელი ვინ დადგებოდა სოფელში, სა-დაც მუშაობით მოქანულები შებინდებისასვე წვებიან და გარიურაუებამდის ფეხს არც-კი გაიქნევენ. დათუას თვალებს-კი ძილი არ ეკარებოდა. ის აგერ რამდენი ხანია დერეფანში თავის ცოლშვილის გვერდით შამფურივით ტრიალებს და ბოლმა აწვება გულზედ, ამას ვერ მოუნელებია, რომ დღეს ვენახი ისე უსინიდი-სოდ ჩამოართვეს და ისაკას გადასცეს.

მთვარე-კი შემოსციმციმებდა დათუას და თითქოს ამას ეუბნებოდა: „საწყალო, შრომი-შვილო, როგორც ვხედავ, შენ ბედი არ გაგილიმებს!.. რამდენი საუკუნეა, რაც შენ მონადა ხარ და შენი სარჩო-საბადებელი სხვას მიაქვს... წინად თუ ლუარსაბები, რევაზები და არჩილები გაცლიდნენ ხელიდგან შენ საცხოვრებელს, ეხლა ისაკები გიხდებიან ბატონად და... ეჭ, საწყალო, როდემდის უნდა ითმინო?!“ თითქო მთვარემ ვეღარ გაუძლო დათუას მზერას, ლრუბელს მიეფარა და დერეფანში ჩამოაბნელა.

„ღმერთო, დაილოცოს შენი სამართალი!..“ წამოიძახა დათუამ მთვარის მოფარებაზედ და წამოჯდა. იმან გადახედა ნენეს და გაბროს, რომლებიც დამშვიდებით ფშვინავდნენ, და ტი-

რილი ყელში მოებჯინა: „რითლა უნდა გაც-
ხოვროთ?!.. ან მტერს, ან მოკეთეს, ან ღმერთს
რითლა უნდა გავცე პასუხი!?!..“ აკანკალებუ-
ლის ხმით ჩასძახა ნენეს და იმისკენ უფრო გა-
დიხარა.

— დათო, დათო, გენაცვალე, ეგრე რო-
გორ წაგართვეს ვენახი, რომ ხმა არ გაეცი?!—
მიკნავებულის, მაგრამ სიყვარულით სავსე ხმით
წამოიძახა ამ დროს ნენემ.

ამ ხმამ დათუას სწრაფად დაურბინა ტან-
ში და მთლად შეარყია.

— ნენე!..—ჩასძახა მან ცოლს, მაგრამ პა-
სუხი ვერ მიიღო. ნენეს ღრმად ეძინა.—სძი-
ნავს, სძინავს!..—თავის ქნევით და მწარის
ღიმილით წამოიძახა და დიდხნობამდის თვა-
ლი ოღარ მოუშორებია ნენესთვის, როგორ
მძიმედ სუნთქავდა და ტუჩებს მალი-მალ ანძ-
რევდა, თითქოს რაღასაც ლაპარაკობსო.

„კაცი ვარ მეცა!?!..“ დაიძახა იმან კარგა
ხნის მზერის შემდეგ და ისევ მიწვა: „მამულს
გართმევენ, სულს გიხუთავენ და შენ-კი ცხვა-
რივით თავი ჩაგიღუნავს და ხმას არ იღებ!..
ვაიმე, შე ოხერო, ჩემო თავო!..“ წამოიყრანტა-
ლა იმან და თავში მაგრად შემოირტყა ხელი:
„სხვა უჩემო, სისხლს დალვრიდა, კარებში ჩაკ-

ვდებოდა, არავინ შეეშო, და მე-კი თითონ შევიყვანე და ჩავაბარე... თფუი!...“ სიბრაზით გადააფურთხა დათუამ და თვალები დახუჭა...“

— მე მაინც გამიშვი, კაცო, თუ შენ არას ეუბნები!...—იმავე კილოთი აჩქარებით წამოიძახა ნენემ და ხელები გააფათურა.

— დედაკაცის ლეჩაქი უნდა მეხუროს თავზედ, კაცის ქუდი კი არა!...—წამოილრიალა ნენეს ხმაზედ და ფეხზედ წამოიჭრა.

— ეეეხ!...—ლრმად ამოიხსრა ნენემ და გულ-ალმა გადმოტრიალდა.

ამ ლროს მთვარემაც გამოიხედა ლრუბლებიღვან და ნენეს მიაყენა შუქი.

იმის გამხდარ ფერ-მკრთალს ნაზ სახეს ამ შუქზედ სინაზე უფრო გაუორკეცდა, და ამან დათუა დაიმონავა. იმას ჯერ არ ენახა თავისი ცოლი იმისთანა მშვენიერი და ამ მშვენიერების დანახვაზედ იმან თავისდა უნებურად ჩაიჩოქა.

— ნენე, ნენე!...—ჩასჩურჩულა იმან ნენეს მოწიწებით:—გენანება განა, რომ ამისთანა ლაჩარ კაცს მისთხოვდი? განა, მე შენი ლირსი არა ვარ?!... არა, ნენე, მაგრე ლაჩარი არა ვარ, ნუ ნანობ...

— ჰა-რა-ლეეე, სუფ-რისა თავსა მჯდომარეე...—მოისმა ამ დროს სიმღერის ხმა.



დათუა საჩქაროდ წამოხტა ამ ხმაზედ და სმენად გარდიქცა. იმას ეგონა, რომ სმენამ მოატყუა, მაგრამ სიმღერა არა სწყდებოდა.

— ისაა... ისაა... ის ქეიფობს!.. უხარიან, რომ ვენახი წამართო!.. — დაბნეულად გაიძახდა ის და ხელებს აფათურებდა.

სუფრული სიმღერა-კი უფრო და უფრო მკაფიოდ მოისმოდა.

— ჩემი ბრალი არ არის, ღმერთო!.. — ჩა- ჩოქვით და ხელების მაღლა აპყრობით წამო აქახა დათუამ და ცრემლ-მორეულმა მერე თავისი მთრთოლვარე ტუჩები მოწიწებით ნენეს ჩა- ბუნებულ ტუჩებს შეუერთა, რომლებიც დათუას ტუჩების შეხებაზე ოდნავ შეთრთოლდნენ.

V1

ისაკა ჭამიაშვილის ბალკონზედ სანთლე- ბით გაჩაღებულ ტაბლას გარს შემოსხდომოდ- ნენ სტუმრები: სამსჯავროსა და პოლიციის ბოჭაულები მოაჯირებისკენ ისხდნენ, ტაბლის თავსა და ბოლოს — გიგო და ლევანი, ისაკა და იმისი შვილი ილა — ბოჭაულების პირდაპირ, კვ- დლისკენ.

ყველანი მომხიარულებულები იყვნენ, სტუ- მრებიცა და მასპინძლებიც. ნამეტნავად ისაკა

კელაპტარივით დნებოდა ამ საღამოს. დღეს ამას შეუსრულდა ამოდენა ხნის სურვილი და გაშ არ მოელნინა!!

ისაკამ, როცა ის კარგად შეზარხოშიანდა, სუფრულიც-კი შემოსძახა, რომელსაც გიგომა და ლევანმა მეორე და ბანი უთხრეს, და ბოლომდისაც შეუცდომლად გავიდა, თუმცა კარგა ხანია ეს სიმღერა იმას აღარ უთქვამს, რადგანაც, იმის ფიქრით, გლეხებს უნდა ემღერათ და არა იმისთანებს, როგორიც ისაკა იყო.

— ბრავო, ბრავო!... — ბოქაულებმა შეჰლრიალეს და ტაში დაპკრეს, როცა ისაკამ სუფრული დაათავა.

— ვერ უყურებთ ისაკასა, როგორ კარგად მღერის! — წამოიძახეს გიგომა და ლევანმა და სიცილი დაიწყეს.

— ექსტრა, ექსტრა!.. ისაკას სადღეგრძელოდ!.. — დასკურელა პოლიციის ბოქაულმა და ჭიქა აივსო.

სხვებმაც შეავსეს და ჭიქების ჭახა-ჭუხი ასტეხეს.

— ისაკა!.. — სახლის კარგა მოშორებიდგან დაუძახა ვიღამაც ისაკას ამ დროს. ჭიქების ჭახა-ჭუხი შესწყვიტეს და იქით მიიხედეს, საიდგანაც ხმა მოესმათ, მაგრამ სანთლიანის თვა-

ლით ვერა გაარჩიეს-რა. ისაკა-კი სავსე ჭიქით
წამოდგა და დაიძახა:

— ვინ არის?!

— აბა, ცოტა ხანს ეგრე გაჩერდი!...

— ვინა ხარ...

თოფის გრიალმა ისაკას სიტყვა გააწყვე-
ტინა.


სანთლები ჩაქრა. მოისმა ჭურჭლის ლაშ-
ლუწი, მაგიდების ბრახა-ბრუხი და რაღაც მძი-
მის და რბილის ზართხანი.

— უი, უი!... — კივილით გამოცვივდნენ
სახლიდგან ბაბე და იმისი ქალები.

— ვინ?!.. რა?! როგორ?!.. სადა?.. სან-
თელი! — ყველა იქ მყოფი უეცარის შემთხვევით
გულ-გახეთქილი გაიძახოდა დაბნეულად და გონს
ვერ მოსულიყო, თუ თავს რა დაატყდათ.

უმცროსმა ქალმა გამოარბენინა სანთელი,
რომლის შუქწედაც იქ მყოფთ შემდეგი სურა-
თი წარმოუდგათ:

მაგიდებს შუა, ჭურჭლის ნამტვრევებთან
ერთად, გულ-გაგმირული ისაკა ლვინოსა და
სისხლში დასცურავდა.



„ვაი ჩვენი ბრალი ყ!..“

მაისის მზე ისევ მაღლა იდგა. იმის სხივებზედ მთა-წმინდა მწვანედ ღადლადებდა და ქალა-ქიდან უივილ-ხივილით და სრიალით ყურებ-გამო-კედილს და მტვრით შეზავებულის ჰაერით სულ-შეხუთულ ხალხს თავისკენ იწვევდა, რომ იმის წვერსა და კალთებზედ, სადაც ყოველ ბალახს ენა ამოედგა და ნაზად გაიძახდა: „სიცოცხლე, სიცოცხლე და სიცოცხლე,“ სული მოებრუნებინა, სიტკბოებას მისცემიყო და სხვა ყველა დღიური ვარამი და ვაგლახი დაევიწყა. თითქოს ეს უსიტყვო მიწოდება შეესმინათ, რომ ქალი და ვაჟი ჯგუფ-ჯგუფად შემოუდგნენ იმის მიკლაკნილ-მოკლაკნილ გზას და სიცილით და ოხუნჯობით ზევით მიეშურებიან. აგერ, ზოგი კიდევაც ავიდა იმის მაღალ კალთებზედ და შესასვენებლად შესდგა; ზოგი-კი სხვა მხრით, უგზოდ, გაუკვერავ მწვანეზე მიდის და ზევითვე მიეჩარება. იმისი კალთები ჩქარა მოიფინა ქალითა და ვაჟით, რომელთაც იმან შთაპბერა უზენაესი გრძნობა და ყოველივე ბოროტი და-ავიწყებინა.

ყველა უზრუნველად მხიარულობს, დახტის
და თავის თავს ბედნიერად სთვლის; მეტის-მე-
ტის სიამოვნებისაგან ყველას მკერდი მაღლა
უღელავს, სახეზედ სიხარულის ალმური ასდის
და გული უფართოვდება, რომელშიაც ყოველი
მათგანი გრძნობს, რომ შეუძლიან მოათავსოს
მთელი სამყარო, განურჩევლად ყველა მიიწვიოს,
წინ სიყვარული გადუშალოს და, თუ-კი შემ-
თხვევა მოითხოვს, თავი მსხვერპლად შესწი-
როს...

გადახრილი მზეც სიხარულით გადასცე-
რის ამათ და, თითქოს ენანებაო, რომ ასე ჩქა-
რი უნდა მოაშოროს თვალი ამ ყოველისავე
მსხვერპლისათვის გამზადებულ საზოგადოებას,
რომელშიაც ამ წუთს არავითარი ბოროტი გან-
ზრახვა არ მოიპოვება, მძიმედ მიცურავს დასა-
ვლეთისკენ. იმან ქვეითკენაც გადიხედა და
სიხარული გაუათკეცდა, რადგანაც დაინახა, რომ
კიდევ, კიდევ და კიდევ მოდიან ამ წმიდა ად-
გილისკენ და ისინიც იმგვარივე გრძნობით იმ-
სჭვალებიან, როგორადაც წინად მოსულნი...
მაგრამ მზეს ამ დროს რაღაც უკმაყოფილება
შეეტყო. ის უეცრად შეკრთა. პირველი შეკრთო-
მის შემდეგ უეცრად სტყორცნა თავისი სხივები
ქვევით, თითქმის მთის ძირში, ბალახებსა და

ყვავილებს შუა მჯდომარე ხალვლიანიდ ჩაფიქრებული ქალისკენ და პირ-და-პირ თვალებში ჩაპედა, რომ იქ იმის მიზეზი ამოეკითხა, რატომ ესეც არ ადისო ზევით და სხვებივით სიხარულს არ ეძლევათ.

ქალმა მუხლებზედ გადაშლილი წიგნი აიღო, მზეს მოაფარა და თითქოს იმის საიდუმლოს შეტყობი დაუშალა.

— ლიზა, ეს რა კია?! — ჰკითხა ამ დროს ექვსი წლის ვაჟმა, რომელმაც, ის-ის იყო, მოირბინა თავის თთხი წლის დასთან ერთად და მუჭა გაუწოდა.

— აბა, სად არის? — ჰკითხა ლიზამ და იმის მუჭის სინჯვა დაიწყო.

— ვაი, სად წასულა? — წამოიძახა პატარა ქალმა და მაშინვე თვალების ძირს ცეცება დაიწყო.

ვაჟი-კი შეკრთა და გაკვირვებით ლიზას შესცეროდა. იმას ვერ გაეგო, თუ ისე როგორ გავარდა. ხელიდან, რომ ვერ შეიტყო.

— აი, შე უხეიროვ, შენა!.. — ლიმილით უთხრა ლიზამ და იმის გაოფლიანებულ ლოკას ალერსით ხელი ჩამოუსო.

— აქ ალის, აქ! — სიხარულით წამოიძახა ამ დროს ქალმა და თავის პაწაწინა ფუნჩუ-

ლა თითებით ლიზას კალთიდან მარიამ-ჭია აი-
ყვანა.

— ეს იყო, სიკო? — ჰქითხა ლიზამ და პა-
ტარა ქალს მარიამ-ჭია გამოართვა.

— ჰო, ეგ არის! — სიხარულით უპასუხა სი-
კომ და ხელი გამოსართმევად წაატანა, მაგრამ
ლიზამ არ მძღვა.

— ეს მარიამ-ჭია! — უთხრა ლიზამ და ხე-
ლის გულზედ დაისვა.

— აბა, აქ უცქირეთ, რას იზამს მარიამ-
ჭია! — უთხრა ყმაწვილებს, როცა მარიამ-ჭიამ
იმის ხელის გულზედ ცოცვა დაიწყო და მერე
მოსთქვა: — „მარიამ-ჭიავ, ნუცი საით გათხოვ-
დება?..“

— გადმოვალდება, გადმოვალდება!... —
გააწყვეტინა ნუციმ ლიზას სიტყვა და ხელი
წაატანა მარიამ-ჭიას, რომელიც ლიზას ნეკის
წვერზედ გადმოეკიდა.

— ხელს ნუ ახლებ, ნუ! არ გადმოვარდე-
ბა. — უთხრა ლიზამ და ისევ განაგრძო თავისი
ლექსი: — „მარიამ-ჭიავ, ნუცი საით გათხოვდე-
ბა?..“

ყმაწვილები გატაცებით შესცქეროდნენ
მოცუცუნე ჭიას, რომელიც რიგ-რიგად ცო-
ცავდა ხან ერთ თითზედ და ხან მეორეზედ,

და ხმას არ იღებდნენ. ლიზა-კი განუწყვეტ-ლივ იმეორებდა: „მარიამ-ჭიავ, ნუცი საით გა-თხოვდება,“ და თითონაც თვალს არ აშორებდა.

მარიამ-ჭიამ მოირიგა ყველა თითები. ბო-ლოს მეორედ გაცოცდა შუა თითზედ და ზედ წვერზედ ტრიალის დროს ფრთების რხევა და-იწყო. ცოტახნის შემდეგ ფრთები მთლად გა-შალა და ყმაწვილებს თავზედ გადააფრინდა.

— უი!... — ნუციმ და სიკომ უნებლიერ თითქმის ერთად წამოიძახეს და უნებლიერდვე ხელები წაატანეს დასაკერად, როცა მარიამ-ჭია გაფრინდა. ყმაწვილები მაშინვე ერთად დაედევ-ნენ უკან.

ლიზამ თვალი გააყოლა ყმაწვილებს და, როცა იმათ მარიამ-ჭია ისევ დაიჭირეს და დაიწ-ყეს თამაშობა, გულის ამოსკვნით წამოიძახა: „ნეტავი თქვენა“, და წიგნი ისევ გადიშალა მუხლებზედ; მაგრამ წაკითხვით-კი არც ერთი სტრიქონი არ წაუკითხავს, თუმცა წიგნს თვალს არ აშორებდა. ის სულ სხვაგვარ წიგნს კით-ხულობდა ამ დროს. იმის გონების თვალს მრავალ-გვერდიანი დიდი მატიანე გადაეშალა, რომელშიაც მოთხრობილი იყო იმისი წარსუ-ლი სიტყვებით კი არა, პირდაპირ ცოცხალი არსებებით, რომელნიც მოძრაობდნენ, ლაპარა-

კობდნენ, რაც იმას მკაფიოდ ესმოდა, და მოქმედებდნენ. გატაცებით უმზერდა მატიანეს და, თუმცა ის ელვასავით სწრაფად თავისთავად იფურცლებოდა, არც ერთი სურათი თავის დაწვრილებითი მოქმედებით შეუტჩნეველი არა რჩებოდა.

— ლიზა, რას ჩაფიქრებულხარ?! — მიმართა ამ დროს ვიღაცა ყმაწვილმა კაცმა, რომლის მოსვლა ლიზამ სულ ვერ შეამჩნია.

ის ამ ხმაზედ მთლად შეირყა და მაშინვე ფეხზედ წამოდგა.

— დათიკო!... — წამოდგომის უმალვე მიმართა იმნაირი ხმით, რომ შიგ სიყვარულიცა და საყვედურიც იხატებოდა და ნაღვლიანად დაუწყო მზერა დათიკოს, რომელიც ამ დროს ალერსიანი ლიმილით შესკეროდა ლიზას სიყვარულით სავსე თვალებს.

კარგახანს უმზერდნენ ასე ხმის ამოუღებლად ერთმანეთს; ბოლოს დათიკომ დაუჭირა ხელები და ძირს დასწია.

— დაჯექი, ლიზა!... — ალერსიანად უთხრა და ორმავე ერთად ჩაიკეცა.

დათიკომ დაჯდომისასვე თავი ლიზას მკერდს მიაყრდნო და ხელის გულზედ ხანგრძლივად აკოცა. იმან-კი მეორე ხელით თმა აუწია შუბლიდან და მთრთოლვარე ტუჩები შეახო.

— იცი, ლიზა, ხელის გულზედ კოცნა
რას ნიშნავს?

— რასა?

— იმას, რომ მკოცნელი ამით ეუბნება:
მე მსურს, რომ ჩემისთანად სხვას არავის უ-
ვარდეო.

— მაშ გინდა, რომ შენისთანად არავის
ვუყვარდე? — მომხიარულებული ღიმილით ჰკით-
ხა ლიზამ.

— მაშ არ იცი!?

— მერე, შენ რა დაგაკლდება, რომ სხვას
შენზედ ძალიან ვუყვარდე, თუ-კი...

— რაო?! — გველ-ნაკბენივით უეცრად მიბ-
რუნდა ლიზასკენ და თვალების კვესებით დაუ-
წყო მზერა.

ლიზას თვალები გაუბრწყინდა. იმის მაგი-
ვრად, რომ დათიკოს მრისხანე სახის დანახვა-
ზედ შიში აღძროდა, სიხარულით გულმა ფან-
ცქალი დაუწყო და ტუჩებზე სიამოვნების ლი-
მმა გადუქროლა.

„მაგ მრისხანებით უფრო დამიმტკიცე შე-
ნი სიყვარული, ვიდრე ხელის გულზე კოც-
ნით!“ — უსიტყვოდ უპასუხა ლიზამ დათიკოს
და უფრო მომხიარულდა.

ლიზა შესცემოდა სიხარულით მრისხანედ

მზერალ დათიკოს და ყოველივე ეჭვი, თუ-კი
რამდენისამე წუთის წინად იმის სიყვარულის შესა-
ხებ ეპარებოდა და სტანჯავდა, ახლა სულ მო-
შორდა და შორს, სადღაც შორს გადაიკარგა.

ის მზად იყო გადაპირევოდა და ამოეკოცნა
მრისხანედ მოელვარე თვალები, რომ დაემშვი-
დებინა და კოცნით დაემტკიცებინა, რომ ის,
მარტო ის არის იმისი სიცოცხლე და იმედი,
იმისი აწმყო და მომავალი, მაგრამ გვიანობდა
იმისთვის, რომ ცოტად კიდევ განეგრძო თავი-
სი სიამოენება.

— ლიზა!.. — წამოიძახა ამ დროს დათიკო
მრისხანედ კი არა, როგორც წელან, ლმობიე-
რად, ტანში მოშლილივით ჩაიკეცა და მწუხა-
რებით სავსე თვალები ისევ მიაპყრო ლიზას.
დათიკოს ამნაირმა უეცარმა ცვლილებამ ლიზაც
დაალონა, იმას უეცრად მოშორდა სიმხიარულე
და სულ რამდენისამე წუთის წინ შორს გაფან-
ტული შავი ფიქრები ისევ დაუბრუნდა.

— დათიკო!.. — გულის სიღრმიდან წამოი-
ძახა ლიზამ და იმავე კილოთი განაგრძო:
— რატომ არ მეტყვი, რას ნიშნავს შენი მაგ-
ნაირი ქცევა?!.. განა ვერ გამჩნევ, რომ ამ
ბოლო დროს რასლაც მიმალავ, გინდა მით-
ხრა რამ, მაგრამ არ მეუბნები!.. დათიკო,

დათიკო, მითხარ, ნუ მიმალავ, თორემ ლამის
არის გავგიუდე. იცი, შენი მაგნაირი ქცევა რა-
ნაირად გულს მიკლავს და მტანჯავს; რამდენ
ას მაფიქრებინებს და ეჭვს მიბადებს თავში,
როდესაც შენ მოგშორდები ხოლმე... იქნება
ალარ...

— ნუ გაათავებ, ნუ!.. ეგ ტყუილად
გვონია!

— მაშ რა ვიფიქრო, ჩემო დათიკო?

— ნურაფერს, ნუ!.. — არეულად უპასუხა
დათიკომ.

— სტყუი, სტყუი!!.. მითხარი, ნუ მიმა-
ლავ! — დაუინებით მიჰმართა ლიზამ და ხელები
დაუჭირა.

— მართალია, ჩემო კარგო, მე ამ ბოლო
დროს ჩემ ქერქში არა ვარ; მართალია, მინდა
გვითხო რამე, მაგრამ ვერ გამიბედნია... — არე-
ულად დაიწყო დათიკომ.

— რატომ, რატომ?!

— მე, — განაგრძო ისევ არეულად დათი-
კომ, — საქმე საქმეზედ მოვიყვანე და ამ ორი
კვირის შემდეგ ჯვარს დავიწერთ. ეს ხომ შენ-
თვის იხალი ამბავია?! შენ ასე აღრე არ მოე-
ლოდი.

— მერე, ეგ გაწუხებდა, ჩემო დათიკო?

— არა!.. ხომ ხედავ, რა ცოტა დრო-ღა
 გვაქვს ჯვარის წერამდის და... მე-კი შენი
 წარსულიდან არა ვიცი-რა. რატომ არას მეტ-
 ყვი?! შენი წარსულის გაუგებრობა მტანჯავს
 და მაფიქრებს...

— განა არ იცი ჩემი წარსული?! განა არ
 მითქვამს, რომ მე ჯერ ვსწავლობდი და როცა
 სწავლა დავამთავრე, რადგანაც დედა-ჩემს ჩემი
 შენახვა არ შეეძლო, მაშინვე აღმზრდელობას
 მივყავი ხელი, და, აი, ეს ორი წელიწადია,
 სხვის ოჯახში ვარ.

— ვერ მიმიხვდი! მე კარგად ვიცი, რომ
 შენ სხვის ოჯახში აღმზრდელად ხარ და კიდე-
 ვაც ეგ მაფიქრებს. სხვის ოჯახში დედი-შენის
 თვალი ყოველთვის ვერ გიცქერის, რომ გაგა-
 ფრთხილოს და ხიფათს მოგაშოროს, ხიფათი-კი
 სხვის ოჯახში მყოფ გამოუცდელ ქალს ბევრ-
 ჯერ ელობება და, არ ვიცი, იქნება თავი ვერ
 შეიმაგრე და შეგაცდინა ვინმე...

ლიზა ამ სიტყვებზედ სულ გაშრა. დათიკოს
 სიტყვებმა ამას გული გაუკაწრა და იმის უგრძნო-
 ბიერეს სიმს კლანჭი გაჰკრა, რამაც დიდხანს არ
 ალოდინა და გულის საკლავი ხმა გამოილო.

— დათიკო, დათიკო! — ტირილით დაიწყო
 ლიზამ და ცრემლები ლაპა-ლუპით გადმოჰყარა:

— ისეთი რა ნახე ჩემში, რომ ჩემ უმანკოებაზედ ეჭვი დაგებადა?! რომ შემცდარვიყავი და უმანკოება დამეკარგა, განა აქამდის არ გეტყოდი? თუ ვინმე შემაცდენდა, ჩემის მხრით ამ შეცდენას სიყვარული ედებოდა სარჩულად და მერე ამის შემდეგ შენ ესე განუსაზღვრელად შემიყვარდებოდი, როგორც ეხლა მიყვარხარ?! ის შეცდომა... — იმას გული ისე დაუოსდა, რომ ლაპარაკი ვეღარ შესძლო და სიტყვა შესწყვიტა. ის ტიროდა და გულს ვეღარ იბრუნებდა. დათიკო-კი უსიტყვოდ სწყევლიდა თავის თავს, რომ წინ დაუხედავი კითხვით ასეთი სატანჯველი მიაყენა იმას, რომელსაც თაყვანს სცემდა და ალმერთებდა.

— ლიზა, ლიზა, გევედრები, მაპატიე!.. მაპატიე!.. — ხვეწნით მიმართა დათიკომ და ლიზას ცრემლით დასველებულ ხელებს კოცნა დაუწყო.

— დათიკო! — გულ-ამოჯდომით უთხრა ლიზან, როცა დათიკო ეხვეწებოდა და ხელებს უკოცნიდა: — მე რომ მკითხავ, რატომ შენ თავზედ-კი არას მეტყვი? შენც ჩემსავით პირნათლად შეგიძლიან შეხვდე ჩვენს ცოლ-ქმრობას?!.

დათიკომ უეცრად კოცნას თავი დაანება და გაკვირვებით ლიზას შეხედა.

— რას გაჩუმებულხარ და არას მეტყვი?!

— მე მეკითხები?! — უფრო გაკვირვებით ჰკითხა დათიკომ.

— შენ, რას გაიკვირვე?! მითხარ, მითხარ, ნუ დამიმალავ?

— ლიზა, — ღიმილით უპასუხა დათიკომ: — ვაუებს მაგნაირ კითხვას არ აძლევენ. ვაუებს ცოდვად არ უთვლიან იმას, რაც ქალისთვის მომაკვდინებელი ცოდვაა და ამისთვის...

— ამისთვის შენც, შენც!.. ვაი ჩვენი ბრალიც!.. — წამოიძახა ლიზამ და თვალებზედ ხელის მიფარებით თავისთვის ჩაილაპარაკა: — ვაუებს აქვთ ნება მოსთხოვონ ქალს სიწმინდე და ქალს კი არა! რისთვის? რისთვის? ვანა დრო არ არის, ვაუებსაც ის მოეთხოვებოდეს, რაც ქალებს?! არა, წმინდასთან წმინდამ უნდა დაიკიროს კავშირი!..

უკანასკნელი სიტყვები თავის გაქნევით წამოიძახა ლიზამ და წასასვლელად წამოდგა...

ამ დროს მოირბინეს ბავშვებმა და დათიკოს უნდა მოხვევოდნენ, მაგრამ ლიზას ნამტირალევ სახეს რომ შეხედეს, იმას გვერდით ამოუდგნენ და მგლის თვალით დაუწყეს მზერა დათიკოს, რაღანაც იგრძნეს, რომ ლიზას ტირილის ჩაზეზი ის უნდა ყოფილიყო.



„ლმერთო, დაილოუოს შენი სამართალი!..“

დილა ადრიანად ვენახში რამდაც გააფაჩუნა. მაღაზიამ მაშინვე თავი წამოყო და თოფს ხელი წამოავლო. ის იყო მაშინ წასთვლიმა და ეხლაც არ დააძინეს. მთელ ლამეს ვენახს სულ გარს უვლიდა და თვალი ერთ წამსაც არ მოუხუჭავს. გარშემო მეზობლების ვენახები სულ დაკრეფილი იყო და ადამიანი თუ ნადირი სულ ამის ვენახს ეტანებოდა. იმისმა მეზობლებმა ენკენისთვის ოცამდისვე ჩაკრიფეს და იმას-კი, აგერ ლვინობისთვეც დაიწყო, რომ ვენახი ჯერ ისევ ისე მოსაკრეფი აქვს და დღე-ლამეს ასწორებს; მარტო ფარაჯის ამარა თოფ-მხარ-ილლივ გადაგდებული და კომბალ-დაბჯენილი ქარვასავით ყვითლად გამომლვივ მტევნებს შესკერის და ზედ დაკანკალებს...

„ნეტა, რისთვის?! — ბევრჯერ დაჰკითხებია თავის თავს მაღაზა, მაგრამ პასუხის მიცემა-კი გასძნელებია... — განა იმისთვის, რომ ბალომ გაიხაროს თავისი ცოლ-შვილით?!.. მე შავიმუშაო, ჩემი სისხლი შიგ ჩავლვარო ჩემ მამულში და... იმან წაილოს... ჰმ... მე-კი პერანგის ყიდვის

ილაჯიც არა მქონდეს, რომ ვიყიდო და გამო-
 ვიცვალო!..“—მწარის ლიმილით წამოიძახებდა
 ხოლმე მალხაზა, როცა კომბალ-დაბჯენილი ჩაუ-
 ფიქრდებოდა თავის თავს და შემდეგ ჩამობ-
 ლლერძილ პერანგის გულის პირზედ დაიხედე-
 ბოდა...

მალხაზა აბობლდა კაკლის ხეზედ, რომლის
 მაღალ ტოტებზედ ჭიგოებისაგან ჰქონდა გაკე-
 თებული, ფუჩეჩ-დაფენილი ტახტივით, და იქი-
 დან თოფის დაბჯენით ირგვლივ თვალი გადა-
 ავლო ოთხის დღის ვენახს... მერე გაგრძელე-
 ბით გაჰკივლა და, რაკი პასუხად ფაჩუნი არსა-
 იდგან მოესმა, გვერდზედ წამოწვა.

მზემაც ამოყო თავი ამ დროს მთის წვე-
 რიდგან და ილაზნის ველს ერთბაშად გადაავლო
 თვალი, სადაც ყველა სულდგმული, რომელიც
 კი გარედ იყო, სიხარულით მიეგება და მოძრა-
 ობა იწყო; ზოგმა გაინავარდა, ზოგი საზრდოს
 საშოვნელად გზას გაუდგა და ზოგი კიდევ მი-
 წაში ჩაძრა... ლამის მეხრეებმაც ზლაზნით შე-
 მოიგროვეს საქონელი და გუთნებისკენ გასწიეს.
 გუთნისდედები ჩეკით სწმენდავდნენ გუთნის
 ხმალას და სახნის-საკვეთს ამაგრებდნენ.

მალხაზა-კი მზის სხივის მოხვედრაზედ გაი-
 ზმორა და თავისი გაზები წინ გადმოაწყო, რომ

სითბოთი ესარგებლნა და ნამისაგან ჩატანული ლურჯი მიტკლის შარვლის ტოტები გაეშრო.

„დღეს-კი მეღირსა რთველი!..—კარგანის შემდეგ წამოიძახა მალხაზამ და გზისკენ გაიხედა.—მგონი ისინი არიან,“—წამოჯდომით წაიპუტბუტა, როცა ხევ-გალმა მომავალ გოდ-რებით დატვირთულ ურმებს თვალი შეასწრო.

ურმები თანდათან უახლოვდებოდნენ და მალხაზას-კი სახე თანდათან ეღრუბლებოდა. ის ხედავდა, რომ ბალოს ცოლშვილი ურმებს უკან მოსდევს და სხვა მუშად წამოყვანილ დედა-კაცებთან ერთად მხიარულად მუსაიფობენ... ავერ, იმათი სიცილიც ესმის...

„ნეტავი, ის ოჯახ-ქორი ჩემი დედაკაციც ჩამოვიდეს და ი ბალლები წამოასხას, რომ დღეს რთველში მაინც გაიხარონ და ისიამოვნონ რა-მე!..“—ნაღვლიანად წაილულლულა და ძირს ჩამოვიდა.

ურმები კიდევაც შემოვიდნენ ვენახში და ვენახი აახმაურეს.

— მაკუშ-ჯან, აპა, ჭამე! დილით ყურძნის ჭამა კარგია!..—ყურძნის ჭამით გაუწოდა მტევანი თავის გასათხოვარ ქალს ბალოს ცოლმა და ურმის თავზედ ჩამოჯდა.

— მე თითონ მოვსწყვეტამ! — უპასუხა გაკუშამ და ვაზებში შევიდა.

— ჰო, შვილო, მოწყვიტე! — უკან მიაძახა დედამ და ახლა თავის სერთუკლსან შვილს მიუბრუნდა, რომელიც ყურძნის ჭამით ხან დაიკუზებოდა და ისე გაპენედავდა გლეხის დედაკაცებს და ხან აიწეოდა:

— შენა, შვილო, რატომ უკან არ მიჰყები და თვალყური არ გიჭირავს, რომ ყურძენი არა ჭამონ დედაკაცებმა? ხომ მამა-შენმა დაგავალა.

— ჯერ იქედგან ვადევნებ, დედი, თვალს, და როცა შორს წავლენ, მაშინ უკან გავყვები.

— ჰო, ეგრე, შვილო! — მოუწონა დედამ, კლერტი შორს სტყორცნა, მეორე მტევანს წამოავლო ხელი და ახლა იმას დაუწყო ჭამა.

ბაღოს პატარა ყმაწვილები-კი ვაზებში დარბოდნენ და, თავს იყვნენ თუ ბოლოს, ამისი დედას არა ედარდებოდა-რა.

— დედი, დედი!.. — კივილით გამოვარდა სიმსუქნისაგან სახე-ჩარგვალებულ შვიდი-რვა წლის ყმაწვილი, რომელსაც თავის სიგრძე აკიდო ეჭირა ხელში.

— უი, შენ-კი გენაცვალოს დედა, შვილო მელქო, სად იპოვე? — ალერსიანად მიიკრა

გულში და გატკბილებული ტუჩებით გატკბილებულივე ტუჩები ჩაუტყოშნა...

— იქა, იქა!.. — სიხარულით ეუბნებოდა მელქო და თითს ვაზებისკენ იშვერდა.

— წალი, კიდევ მონახე და შავინახოთ!..

მაღალხაზა ხედავდა ამას, ყველაფერი ესმოდი და, რომ გული გაექარვებინა, საჭონელს ხან იქიდგან წაუვლიდა და ხან აქედგან...

— ჰკრეფენ?.. — რიხიანის ხმით დაეკითხა ბალო, რომელმაც თავისი ლურჯა შემოათქრიალა ვენახში და კინალამ მაღალხაზა არ გაატანინა...

— ჰკრეფენ. — ქუდის მოხდით უპასუხა მაღალხაზამ და ცხენს სადავე დაუჭირა, რომ ბალო ჩამომხტარიყო.

ბალო გახლავთ კახეთში სოფლად მოვაჭრე, შეა სოფელში აქვს დიდი დუქანი და, რას მოინდომებ გლეხის სულო და გულო, რომ იმას არა ჰქონდეს გამოკიდული, და იმისმა დახელოვნებულმა დახლიდრებმა, რაც არ გინდოდეს, ისიც არ მოგანდომონ!



„მერე, რიღათი იყვოვროს?!“

(სურათი სოფლის ცხოვრებისა).

I

— რას გაბარებდი, კნიაზო? — დაეკითხა რეზიკოს იმისი თვალებ-ჩასისხლიანებული მოურავი, რომელიც დაურიდებლად შემოვიდა ოთახში და მოალერსე ახალგაზდა ცოლ-ქმარს თავს წაადგა.

რეზიკო ამ ხმაზედ მაშინვე წამოდგა და ცოლის ალერსით გამოწვეული ლიმილით მიუახლოვდა მოურავს.

— ზალიკო, — მხრებზედ ორივე ხელის ალერსიანად დარტყმით მიმართა: — თელავს მინდა წასვლა და....

— კარგი, კნიაზო!

— მეც ვფიქრობ წამოსვლასა! — ნაზად წამოიძახა ტახტზედ წამოწოლილმა რეზიკოს ცოლმა და მუთაქა გაისწორა.

— რასაკვირველია, ჩემო სულიკო! .. — უპასუხა რეზიკომ თავის სულიკოს და მერე ისევ ზალიკოს მიმართა: — აბა, ეცადე, ჩემო ზალი-

კო, და, რაც შეიძლო... ბლომად; აი, ვარი-
ჩაც აპირობს წამოსვლას.

— ეგ ჩემ კისერზედ იყოს, კნიაზო, შენ
ფიქრი ნუ გაქვს!.. — უპასუხა ზალიკომ იმ კი-
ლოთი, რომ ბლომად იქნებაო, და დინჯად გა-
ვიდა გარედ.

— რა კარგი რამ არის!... — ლმობიერად
უთხრა ვარიჩამ რეზიკოს, როდესაც ყელზედ
ხელის გადახვევნით გვერდით მოუჯდა.

— შესანიშნავი კაცია!.. — იმავე კილოთი
უპასუხა რეზიკომ და ულვაშებზედ ხელის გა-
დასმით ვარიჩას მარწყვის-ფერ ტუჩებს დაე-
ტანა. — იცი, ვარიჩა, — ტუჩების ტკბანურებით
წამოიძახა, როცა ტუჩები ამოუწუწნა ვარიჩას:
ბედნიერებაა, როცა მოურავი ასეთი მიხვედრი-
ლია და ყოჩაღი. მე ზალიკო რომ არა მყავდეს,
სულ თავ-გზას დავკარგავდი.

— ჩვენც ეგრეთი ყოჩალი მოურავი გვყავ-
და...

— მართლა, ვარიჩა, შენ ხომ არ გინა-
ხავს, როგორ აძლევს განკარგულებას. წავიდეთ
ვნახოთ! — სიტყვა გააწყვეტინა და მორკალებუ-
ლი მკლავი გაუწოდა. ვარიჩამ თავისი მკლავი
გაუყარა და ასე აივანზედ გავიდნენ.

სიძველისაგან დაფუტუროვებულ აივანზედ

აყრილმა ფიცრებმა იმათ ფეხქვეშ გულსაკლა-
ვი ჭრაჭუნი მორთეს, თითქო ეუბნებოდნენ:
„ღმერთი არა გაქვთ, სიძველით მაინც შეგვიბ-
რალეთ და გაგვათავისუფლეთ ამ განსაცდელი-
საგანაო.“ მაგრამ რეზიკო და ვარიჩა ყურს
არ უგდებდნენ აივნის ამ სამართლიან საჩივარს
და შეუბრალებლად გაიარეს აივანი დასავლე-
თისკენ, საიდანაც ზალიკოს ხმა მოისმოდა,
მიეყრდნენ მოაჯირს, რომელმაც ერთი „ვაი“
შეჰქივლა და საჩქაროდ ისევ მიჩუმდა, თითქოს
პირდაპირ გულში ლახვარი დაჰკრეს და სიცო-
ცხლე სწრაფად მოუსპესო.

— გიო, — ეუბნებოდა ამ დროს ზალიკო
დაგლეჯილ ჩოხაში განვეულ გლეხს, რომელიც
სულ ერთი თვე იყო, რაც მოჯამაგირედ დაი-
ყენეს: — წადი ეხლავე და ჭალია და გელა შე-
იარალებულები აქ მომიყვანე. უთხარი: „იალალს
მივდივარ-თქო“. იმათ რომ დაუძახებ, შენ და
პოლესოვჩიკი წახვალთ და ნამკალშიაც რომ
მოასწროთ საქონელს, დაუშინეთ კეტები და
აქ მომირეკეთ. გეყურება თუ არა?

უკანასკნელი სიტყვები მკაცრად წამოიძახა
და ცალი თვალით გვერდზედ, აივნისაკენ თავ-
შომწონედ შეიხედა.

— მეყურება, შენი ჭირიმე!... — უპასუხა გიომ და ძუნძულით ვიშკრისკენ წავიდა.

— ჰო, საუცხოვო რამ არის!.. — ამის მეტი ვერა სთქვა-რა ვარიჩამ, როდესაც ზალიკო ძირს სახლში შევიდა ბრძანების გაცემის შემდეგ, და ქმარი იქით გაითრია.

— ეს კიდევ არაფერი!.. შენ უნდა ნახო, ხანდახან რანაირ ბრძანებას გასცემს ხოლმე! — უპასუხა რეზიკომ და ცოლთან მკლავ-გაყრილმა აიგანზედ სეირნობა დაიწყო.

დიდხანს, დიდხანს დადიოდნენ გაჩუმებულები და ყურს უგდებდნენ იმათ ფეხ-ქვეშ მოკრაჭუნე ფიცრების ტირილს. სოფელიც გაჩუმებულიყო და ხმა არსაიდგან მოისმოდა. გლეხობა სოფლის კარგად მოშორებით კალოებზედ გასულიყო და სხვა-კი ვინ იმოძრავებდა. მარტო ხანდისხან დიდ ეზოს რომელსამე კუთხეში შეიბერტყებოდა ქათამი და თავის გასართობად სიმღერით კაკანს მოჰყვებოდა. ვარიჩაც პირ-მოკუმული ხმას შეუწყობდა ქათმის კაკანს, და თუ რეზიკოც ხანდისხან ამასვე არ ნებულობდა, თავისებური დუეტი გამოდიოდა...

— ღმერთო ჩემო, რა მომეწყინა! — წამოიძახა ვარიჩამ, როდესაც ქათამმა შესწყვიტა

კაკანი და ოლარ დაიწყო სიმღერა, რომ იმასაც
ხმა ისევ შეეწყო და თავი გაერთო.

ვარიჩკა შესდგა და პირდაპირ მწვერვალს
შეჰქედა, რომლისათვისაც ზევიდგან მხეს სხივე-
ბი დაეშო და როგორც სვეტებზედ, დანდო-
ბოდა ზედ.

— შეხედე, რა სანახავია!... — წამოიძახა ვა-
რიჩკამ და რეზიკოს გვერდში ხელი შემოჰკრა,
რომ იმისი ყურადღებაც მიექცია ამ სურათის-
თვის.

— ჰო, ლამაზი სანახავია!... — შეუხედავად
წამოიძახა რეზიკომ და აივნის ბოძების გვერ-
დით რამდენსამე ხე-ყვავილს დაუწყო უაზროდ
მხერა.

— ეს კატუშა მაინც მოვიდეს, თორემ
ძლიერ მომწყინდა, — ისევ ვარიჩკამ დაარღვია
სიჩუმე და რეზიკო გაითრია.

— გუშინ აკი იყო.

— რა ვქნათ, რომ გუშინ იყო? როცა
თელავში ერთად ვწავლობდით, სულ იმას მეუ-
ბნებოდა, თუ რეზიკოს შეირთავ, მუდამ თქვე-
ნთან ვიქნები ხოლმეო, ისე გვიყვარდა ერთმა-
ნეთი.

— იმას ეხლაც უყვარხარ?

— მე კი მიყვარს და ის რომ ოლარ და-

დის ჩვენსას? ახლა ჩვენ უნდა წავიდეთ იმასთან
ვიზიტით. მართლა, მოდი ეხლავ წავიდეთ.

— წავიდეთ! — გადაწყვეტით უთხრა რე-
ზიკომ და ორნივე სადარბაზო ტანისამოსის
ჩასაცმელად შევიდნენ ოთახში.

სულ არ გასულა რამდენიმე წუთი იმათ
შესვლის შემდეგ, რომ კიშკარი გაქრიალდა და
სამი ევროპულად ჩაცმული ქალი შემოვიდა
ეზოში, იმათ შემოჰყვა ორი ხმალ-ხანჯლით
შეიარაღებული ახალგაზრდა ყმაწვილი.

ვარიჩკამ კიშკრის გაქრიალებაზედ ქვედა
ტანისამოსით გარედ გაიხედა და, სტუმრები რომ
დაინახა, რეზიკოს დაუძახა:

— რეზიკო, გახედე, სტუმრები მოდიან!
— ეხლავ! — უპასუხა რეზიკომ და გარედ
გამოვიდა.

ვარიჩკა-კი მაშინვე დაიმალა და აჩქარე-
ბით ტანისამოსის ჩაცმა დაიწყო.

— გთხოვთ მობრძანდეთ! — აივნიდგანვე
გადასძახა რეზიკომ და კიბეებზედ საჩქაროდ
ჩაირბინა.

— ეს არის ეხლა ჩვენ თქვენსა ვაპირებ-
დით წამოსვლას, — უთხრა რეზიკომ კატუშას,
როდესაც სხვებს ხელი ჩამოართვა და მერე
დაუმატა:

— ჩემი ვარიჩკა ძალიან მოწყენილია და
გვინდოდა პატარახანს გაგვევლო.

— მანდ რასა დგეხართ? რატომ აიგანზედ
არ მობრძანდებით? — კაბის დუგმების შეკვრით
გადმოსძახა ვარიჩკამ აიგნიდგან, რაკი დაინახა,
რომ რეზიკომ სტუმრები შეაყენა და ადგილიდ-
გან აღარ იძროდნენ.

— ეხლავე, ეხლავე!.. როგორა ბრძანდე-
ბით, ვარვარა მიხაილოვნა? — თითქმის ერთხმად
შესძახეს ყმაშვილებმა და გზა მისცეს ქალებს.

— როგორ არა გცხვენიანთ, კნიაზო ილი-
კო, რომ ეგრე დაგვივიწყეთ! — საყვედლურის კი-
ლოთი უთხრა ვარიჩკამ, როდესაც ყველანი
ალაგდნენ აიგანზედ და ფიცრები ააჩხავლეს.

— რა ვქნათ, ვარვარა მიხაილოვნა...

— წარმოიდგინე, ვარიჩკა, ილიკო აღარსად
დადის! — გააწყვეტინა კატუშამ ილიკოს სიტყვა.

— რა ამბავია?

— საქმეები აქვს ბევრი.

— საქმეები კი არა და, აბა რა საქმეები
ექნება, შეყვარებულია და კრუხივით სულ
შინა ზის და გულის ვარდზედ ფიქრობს! ვერ
ატყობთ, რანაირი დაფიქრებული სახე აქვს? —
ჩაერია ისევ კატუშა ლაპარაკში და ილიკოს
სიტყვა კიდევ ჩამოართვა.

— ნუ თუ მართლა! ვინ უყვარს განა?

— არ ვიცი, არ ამბობს! — ხელების გაფა-
თურებით წამოიძახა კატუშამ და თავისი მოჟუ-
შუნე თვალები ილიკოს მიაპყრო. სხვებმაც შე-
ხედეს ილიკოს და უსიტყვოდ თვალებით ეკი-
თხებოდნენ: ვინ გიყვარსო?

ილიკო მიხვდა იმათი თვალების მეტყველე-
ბის აზრს და პასუხი არ დაუგვიანა.

— ვინ უნდა მიყვარდეს კატუშას მეტი? —
სიცილით წამოიძახა ილიკომ და ხელი კატუ-
შასკენ მიიღო.

— ხა, ხა, ხა!.. აი ეგ მოგვწონს!.. — გა-
დიხარხარეს ყველამ და კატუშას შეხედეს.

კატუშა-კი გაწითლდა და სიცილითვე წა-
მოიძახა:

— როგორ არა გცხვენიანთ, კნიაზო, რომ
დამცინით?!

— მე არა ვხუმრობ, — დაიწყო ისევ ილი-
კომ, როცა ქალებმა სიცილი შესწყვიტეს: —
დრო არა მაქვს, რომ წავიდე საღმე; ან სულ
ტყეში ვარ, ან იალაღებზედ, ლამის გავგიუდე,
არ ვიცი, რა უნდა ვუყო ამ წყეულ გლეხკა-
ცებს. ვერ წარმოიდგენთ, რა ავაზაკები არიან,
თავხედები. მზად არიან გაგუვლიფონ და გაგგ-
ლიჯონ. წარმოიდგინეთ, ტყე სულ გაჩეხეს...

— მართალს ამბობ, მეც მავ ყოფაში ჩამაგდეს! — კვერი დაუკრა რეზიკომ და ამის შემდეგ, ვინ იცის, რა სიმურტლე და სისაძაგლე არ მიაწერეს გლეხებს.

— უნდა სულები ამოვხუთოთ, — გადაწყვიტეს ბოლოს ერთად.

დასასრულ დაასკვნეს, რომ „მამულ-დედულის მოვლა“, თუ კი რამ „მამულ-დედული აქვთ“ და ან კიდევ იმისი ჯავრი აწუხებთ, „სრულიად შეუძლებელია ამ დაწყევლილ გლეხების გამო.“

იმათ ლაპარაკში მზეც მოეფარა მწვერვალს, თითქოს მოსწყინდა იმათი მზერა და ყარყატის ყურის გდებაო და ცის სივრცეში აქა-იქ გაფანტული ღრუბლები იმათ მაგივრად სირცხვილის ნიშნად გააწითლა. სალამოს ნიავმაც დაპერა და ლაპარაკით გაცხარებულები და აღელვებულები გააგრილა.

ამ დროს შეიარაღებული ჭალია და გულა შემოვიდნენ ეზოში და აივანზედ მობაასეთ ქუდების მოხდით მიესალმნენ.

— კარგია მოხვედით!.. — აივნის ქვეშიდგან გამოსძახა ზალიკომ ახლად მოსულებს და თითონაც შეიარაღებული იმათ გვერდში ამოუდგა.

— საით მიემართებიან, კნიაზო? — დაეკითხენ სტუმრები, როდესაც თვალი შეასწრეს შეიარაღებულებს.

— იალალზედ.

II

სოფლის განაპირებით, ზედ ხევის პირას, დიდი დაცუმული მოედანია, სადაც გლეხობა მოიყრის ხოლმე თავს და ამ მოედანზედ განმარტოებით მდგარ დიდ დაბურულ ჭანდრის ქვეშ ყაყანობს თავის გაჭირებისა და დალხინების შესახებ. ვინ იცის, ეს ჭანდარი რამდენი ყრილობის მოწამეა! ვინ იცის, რამდენჯერ მიუშურებიათ მის ტოტებ ქვეშ, რომ ეთათბირათ იმის შესახებ, თუ როგორ დაეცვათ სოფელი განსაკლელისაგან, რაც ხშირად ეწვეოდათ ხოლმე უწინ. ეხლაც კიდევ, ვინ იცის, რამდენი გლეხის გულის სიღრმიდგან ამონახეთქი კვნესა შესმენია ამ ჭანდარს, რამდენი ტანჯული უნახავს...

აი სწორეთ ამ ჭანდრის ქვეშ მეორე დღეს ზალიკო, ჭალია და გელა ისხდნენ და წინ მოედანზედ-კი ორმოცამდის ჩამწკრივებული ფურმოზვრობა სიცხის გულზედ ეყარნენ და მოლე-

შილად კუდია და თავს ფშუილით იქნევდნენ
ბუზების მოსაგერებლად.

— არა, ი თოფებს რომ გვესროდით, მი-
თომ შაგვაშინებდით და საქონელს იქვე დაგვა-
ყრევინებდით?! — ნიშნის მოგებით უთხრა ზა-
ლიკომ გუდიან მწყემს, რომელიც ის-ის იყო
რამდენისამე ვლეხით მოვიდა და ჭანდრის ქვეშ
ზალიკოს წინ ქუდ-მოხდილი დადგა.

— მაშ არ მესროლა, რომ თულებივით
დამტაცეთ საქონელი?!

— რას მიედებ-მოედები, როგორ თუ თუ-
ლებივით? — შეუტია ზალიკომ და ზეზე წამო-
დგა.

— თულებივით თუ არა, მა რა იყო? ჩვენს
საქონელს თქვენ იალალზედ რა უნდოდა! თქვე-
ნი იალალი რო გვდომოდა, მაშინ სოსიკოს-კი
ალარ მივცემდით საბალახეს.

— კიდეც მაგაშია საქმე, რომ საბალახეს
სოსიკოს აძლევთ და ჩვენ იალალზედ-კი და-
გიდით.

— სოსიკოსი ვერ დაგვიტევს, რო თქვენ-
საზე არ ვატაროთ? ან თქვენი მობალახე მწყემ-
სები რად გადაგვიშვებენ.

— ღმერთმა ნუ იცის თქვენი თავი და ტა-
ნი, რა ვიცი, რად გადაგიშვებენ?! თქვენ აი

ესა ხართ, აი! — ორივე მაჩვენებელი თითი ერთ-მანეთს მიატოლა ზალიკომ და მერე ისევ განა-გრძო: — განა ძალლი ძალლის ხორცს შესჭამს? თქვენ ბატონს რას დაინდობთ!.. თუ ერთმანე-თში პირობა არა გაქვთ, მაშ რად გადუშვით ჩვენი მობალახე მწყემსები სოსიკოსაში, რო იმ დღეს იმან მაასწრო და ოცამდის სული საქო-ნელი აქ ჩამოლალა?

— იმანაც ისე მაასწრო, როგორც შენ ჩვენსას მოასწარი. მე ჩემი თვალით დავინახე, რო სოსიკოს მოურავი გადმოვიდა თქვენს ია-ლალზე და იქიდგან გადმოლალა საქონელი.

— ე მაგეების ლაპარაკს, გირჩევნიან დაი-სნა, თორემ ხომ იცი ჩემი ამბავი, ეხლავე ყე-ლებს დავჭრი. ე საქონელს და ძალლებს გადვუ-ყრი! — ბრაზ-მორევით შეუტია ზალიკომ და რამ-დენჯერმე გაიარ-გამოიარა.

— სუ, ბიჭო, ნუ იცი ხოლმე ატორლია-ლება! თუ დაპარვა არ გინდოდა — ფხიზლად იქ-ნებოდით!.. — მუჯლუგუნის წაკვრით ურჩიეს სა-ქონლის პატრონმა გლეხებმა.

— რას ამბობ, კაცო, ერთი პირი ძილი წყალ-საც მოუვა ხოლმე და ჩვენ ხომ ადამიანიშვილე-ბი ვართ! ვაი მაგათ დედი-ლმერთსა, რო დროით გადაგვასწრეს, თორემ ჩვენ ვუჩვენებდით სეირს!

— რაო? — შესჭყივლა ზალიკომ და მწყემ-
სისკენ გაიწია.

— კარგი, შენი ჭირიმე ზალიკო, ამის ყბე-
დობას რა ყურს უგდებ, პატრონები ჩვენა ვართ.

მწყემსი მართალს ამბობდა. იმ ღამეს ზა-
ლიკო, ჭალია და გელა მუცლით ჩაცურდნენ
მწვერვალიდგან, რომელიც რეზიკოს და სოსი-
კოს იალაღებს ჰყოფს და, რაც-კი ბინიდგან
კარგა მოშორებით საქონელი ეყარა, სულ ერ-
თიანად დაირეკეს იმ დროს, როდესაც მწემ-
სები ოდნავ მბჯუტავ ცეცხლს ფარაჯებში გახვეუ-
ლები გარს შემოსწოლოდნენ და ხვრინავდნენ.
ძალლებიც იქვე მორკალებულიყვნენ და მაშინ
გაიგეს, როდესაც ზალიკოს ნახევარი საქონელი
მიჯნას გადაცილებული ჰყავდა. ისინი გაცო-
ფებულები ყეფით დაედევნენ; მათ ყეფაზედ
მწყემსები წამოცვივდნენ და მაშინვე თოფები
დაახალეს, მაგრამ გვიან-ლა იყო. ზალიკომ გა-
დასწრო და თოფის სროლითვე გასცა პასუხი.

— პატრონები ხართ და მაშ რატომ არ
იხსნით? — უკან დაწევით წამოიღრიალა ზალი-
კომ, როცა გლეხები წინ ჩაუდგნენ და ხვეწნა
დაუწყეს.

— დახსნით-კი დავიხსნით, მაგრამ რო არ
ვიცით, რამდენსა გვთხოვ?

— რამდენსა გთხოვთ რა, არ იცით, სულზე რა არის? იანგარიშეთ სულზე მანეთნახევარი და გაიგებთ, რასაცა გთხოვთ. აქ ორმოცი სულია. — ცოტა მორბილებულის კილოთი უთხრა ზალიკომ და ქვაზედ ჩამოჯდა.

— მანეთ-ნახევარი რო ვიანგარიშოთ, ვინ იცის, რამდენი შედგება! — უპასუნეს დალონებულმა პატრონებმა.

— რაღა რამდენი შადგება: ორმოცი მანეთი, ოთხი თუმანი, და ორმოცი ნახევარ მანეთიც... არ თუმანს შაადგენს, ექვსი თუმანი გადმომითვალეთ და თქვენი საქონელი წაასხით.


— არა, შენი ჭირიმე, ზალიკო, ექვსი ძალიან ბევრია, აბა ეხლა ექვს თუმანს ვინ მოგვცემს?..

— არავინ მოგცემთ და ეგრე იყავით! სანამ არ გადმომითვლით, აქ ე თქვენ საქონელს რო სულებიც დასცვივდეთ, ერთსაც არ მოგცემთ.

— სულზედ მანეთი იქმარე და ის ათ-ათი შაური გვაპატიე. — ერთმანეთში მოლაპარაკების შემდეგ სთხოვეს გლეხებმა.

— რას ამბობთ, ეი, რეზიკომ რო ენგრე ათ-ათი შაური აპატიოს, მერე რითღა იცხოვ-

როს?! — გადაწყვეტით წამოიძახა ზალიკომ და
 ფეხზე წამოდგომით ხელი გაუწოდა მღვდელს,
 რომელიც პანდრის ქვეშ მოვიდა და იქ მყოფთ
 მიესალმა.



„ო... ყუ... ჩე!..“

(მონოლოგი)

„...რაღას გავჩუმდი და ენა მუცელში ჩა-
მივარდა, როდესაც ის საზიზღარი ისეთის ბილ-
წი ღიმილით იმის სურათს გვაჩვენებდა და თა-
ვის გამარჯვებას შემოგვკვეხოდა?!.. რატომ მა-
შინვე ყელში არა ვწვდი, ის ბილწი გული არ
ამოვგლიჯე და იატაკზედ არ დავანარცხე?!

„ახ, რა ნეტარებას ვიგრძნობდი, როდე-
საც იმისი გვამი ჩემ ფეხთ-წინ კრუნჩხვა-გრეხ-
ვას დაიწყებდა და თბილი სისხლი-კი ჩქეფით
იქაურობას მორწყავდა და იმისი შხეფები ჩვენ
შეგვწინწკლავდა!..

„...ნეტარებავ, ნეტარებავ!.. თითქოს
გრძნობდა იმის სიტყვებს, რომ სურათში შე-
ნი თვალები იქ მდგომთ ნაღვლიანად, ლმობი-
ერად შემოგვცეროდა და შველას გვთხოვდა...“

„მე-კი, შენი მაღმერთებელი, სხვებთან
ერთად, ხა! ხა! ხა! უშნოდ ვიღრიჯებოდი და
ვცდილობდი, რომ ჩემი მღელვარება არ გამომ-
უდავნებულიყო...“

„ის-კი, საზიზღარი, ხან ერთს გადმოგვ-

ცემდა შენს სურათს და ხან მეორეს... ვხედავ-
დი, ყველა სტკბებოდა შენის სიმშვენიერით და...

„როცა შენი სურათი ხელთ ვიგდე, მინ-
დოდა დამეხია, კბილით დამეფლითა, რომ იმ
ბილწს ბინძურს უბეში არ ჩადო და შენის
სახელისათვის ჩირქი არ მოეცხო...“

„მაგრამ კიდევ იმ შიშმა, კიდევ იმ მოკრ-
ძალებამ შემაყენა...“

„მაპატივე, ჩემო ღვთაებავ, უკანვე გარდა-
ვეცი და ისევ ლრეჯა, უშნოდ კრეპა და-
ვიწყე...“

„...განა, ჩემო წმინდათა-წმინდავ, სტყუ-
ოდა, სრულს სიცრუვეს ამბობდა... იმის სიტ-
ყებს ნიადაგი არა ჰქონდა?! შენ გულთმისანი
ხარ, შეიტყობდი, რა განზრახვითაც გევლება
ის თავს. იმის სიცბიერე შენთვის ცხადი იქნე-
ბოდა და სურათს-კი არ მისცემდი, ახლოსაც
არ მიიკარებდი...“

„ხა, ხა, ხა!.. როგორ უსინიდისოდ სტყუ-
ოდა!.. საზიზლარს, შენი სურათი სადმე მოუ-
პარავს და დასამტკიცებელ საბუთად დააჭვს...
უთუოდ შენ განდევნე და ეხლა ის სამაგიეროს
გიხდის... ცილს გწამებს...“

„მაგრამ... ახ... ზედ-წარწერა?!..“

„შენის ხელით იყო ზედ წარწერილი, შე-

ნის... მაშ... მაშ სუკველაფერი მართალი იყო?!
ვერ მიხვდი იმის ცბიერებას და....

„რად მიენდე იმ...

„მაგრამ რას ვძოდავ?.. გულო ჩემო, რის-
თვის ჰუფოთავ? რა იცი, რომ ყოველივე ეს
იმან არ იცის და კიდეც არ ესიამოვნა... განა
შენ რომ წმინდად, უბიწოდ, ციურ არსებად
გეჩვენება, ეს მართალია?.. იმისი თვალები რომ
უბიწოდ გამოიმზირებიან, განა ცბიერებით არ
მოსდის?. ხომ შეუძლებელია შენთვის ეს შეი-
ტყო და მაშ რად ბრმავდები? იქნება იმისი სიმ-
შვენიერე, თვალთ-მაჭცი სიმშვენიერე წუმპის
ფსკაა, და შენ-კი ბუდიდგან გადმოვარდნას ლა-
მობ, როდესაც ის წარმოგიდგება თვალ-წინ...

„არა, იყუჩე, გულო, იყუჩე... დასცხრი,
ო... ყუ...ჩე!..“



„გმადლობ, უფალო, გმადლობ!..“

(ეტიუდი)

— გმადლობ, უფალო, გმადლობ... სიხა-
 რულისაგან ლაშის გადავირიო... მადლობის გა-
 დახდა ვერც-კი მომიხერხებია.

„ღმერთო, ღმერთო, რითი დავიმსახურე
 შენი ყურადღება, რომ... რომ ლირისი გამხადე,
 რჩეულად მყავი და... ახ, გმადლობ, უფალო,
 გმადლობ... ადამიანის სული, გული, აზრი...
 ღმერთო, გულთა-მხილავი ვარ... ადამიანის გუ-
 ლი ჩემთვის დაფარული აღარ არის... სულ
 ულრმესი, მისთვისაც-კი დაფარული და უჩინა-
 რი, თვალ-წინ გადამეშალა, გონების თვალი
 ელვასავით სწრაფ გაიკლაკნება ადამიანის გუ-
 ლის უფსკრულ ადგილებში და ყოველსავე სა-
 იდუმლოებას, სჭიდუმლოთა საიდუმლოებას...
 გმადლობ, უფალო, გმადლობ...“

„აგერ ის მხევალი... ბედშავი, რა დალო-
 ნებული შემოვიდა შენს წმინდა ტაძარს... ფე-
 ხები უკან რჩებოდა. ვერა ბედავდა შემოსვლასა.
 თვისი საქციელი ჰქენჯნის, ბავშვს დასრულება

არ დააცალია, ძალად დაპებადა და, უჰ, წყალში გადააგდო... საზიზღარმა მოატყუა, შეაცდინა და... აგერ, როგორ მდუღარეს აფრქვევს: „შე-მინდე მე, უფალოო...“ გეხვეწება უსიტყვოდ.

„აპატიე, უფალო, აპატიე... გამოუცდელი იყო. საზიზღრის ცრუ სიტყვები სიმართლედ მიიღო და...“

„იმ საზიზღრისათვისაც ლოცულობ?! გი-ნდა იმასაც აპატიოს უფალმა? ახ, რა კეთი-ლი არსება ყოფილხარ...“

„ლმერთო...“

„რაა?.. პატივებას კი არა, სამაგიეროს გადახდას ეხვეწები?.. სთხოვ უფალსა, დასტან-ჯოს, არ მოასვენოს?.. შეგაძლებინოს, შენის ხე-ლითვე ჯავრი ამოიყარო?..“

„ახ, მეგონა იმასაც ავედრებდი უფალს. ეხლავე სიძულვილი, სამაგიეროს გადახდა... როდის-ლა იქნება შენი გული თავისუფალი მაგ სენისაგან, თუ-კი ეხლავე ნიადაგს აძლევ...“

„მაგრამ გეპატივება, ადამიანი ხარ, მოგატ-ყუეს და შენც...“

„ზარსა რეკენ!.. დღეს ბედნიერი დღეა. მრავალი მოაწყდება, ეკლესია არც-კი დაიტევს. აგერ იქ, გალავნის კუთხეში, დავდგები. იქი-დან არავინ გამომეპარება. მე-კი ვერავინ დამი-

ნახავს. ყველას გული, ოხ, ღმერთო, წინ გა-
დამეშლება!.. გმადლობ, უფალო, გმადლობ!..
მე... სსს!.. მოდიან კიდეც!.. აგერ დედაბერი
ყავარჯენის ბჯენით მიუახლოვდა ეკლესიის კა-
რებს, პირჯვარი გადიწერა... ოი, ოი, მოხუცო
მანდილოსანო!.. თითქოს ღვთის-მოსავი აღამი-
ანის სახელი გაქვს მოხვეჭილი! პატიოსანისა და
მართალი აღამიანის ჯილა დიდი ხანია საზოგა-
დობამ თავს დაგადგა... მაშ გიცრუვია, საზო-
გადოებისათვის თვალები აგიხვევია... ღმერთო,
რა გაიძვერად უმოქმედნია!.. აი, ეხლაც წმიდა
ადგილას, შენ წინაშე სცრუობს!.. არ გინდა,
მოხუცო, სიბერის დროს მაინც გულწრფელი
იყო და ქვეყანას არ ატყუებდე?! პირჯვარს
იწერ, სიტყვებს გაიძახი და გული-კი, ოი,
საით გაგირბის?!.. შედექ, შედექ!.. ლირსი არა
ხარ მანდ... არ გამიგონე და შეხვედი?!.. შენი
სისაძაგლე არ დამავიწყდება, შენ...

„ოხ, რა დალონებული, რა სათნოებით
სავსე მოდის!.. მშვენიერო არსებავ!.. თითით
საჩვენებელი ხარ, შენი სიკეთე, ზნეობის სიმ-
ტკიცე, სიფაქიზე სამაგალითოდ გამხდარა. მშვე-
ნებავ, რამდენი, შენს მეუღლეზედ უკეთესი შე-
ნის სიმშვენიერით გადარეული უნუგეშოდ გა-
გისტუმრებია! რამდენი თაყვანის-მცემელი ოხ-



რავს და ვერ გაუბედნია თავისი გრძნობა გა-
მოამჟღავნოს?! ახ, რა ბედნიერია შენი მეულ-
ლე!..

„რანაირად გეძნელებოდა გუშინ მეულ-
ლის გასტუმრება?! გამხნევებდა, „ერთ თვეზედ
დავბრუნდები“-ო, მაგრამ მაინც გეძნელებო-
და განშორება, გული თან გააყოლე. ერთი
თვე საუკუნედ მიგაჩნდა. ნეტარი! რა დამშვი-
დებული წავიდა. ან-კი რად უნდა ედარდნა,
როდესაც შენი სიფაქიზე სწამს?!.. იცის, შენ
სახელს, ოჯახს არ შეუბლალავ.

„აი, ეხლაც მოსულხარ, რომ შეავედრო
უფალს იგი. „ნუ სწუხარ, ნუ!.. ის... მაგრამ
რას ვხედავ?!.. ვინ ის?! განა ეხლა მეულლე-
ზედ არ ჰეთიქრობ?!.. განშორება კიდევაც გიხა-
როდა?!.“

„ოი, წყეულო თვალთმაჭული!.. შედექ,
შედექ! სხვისთვისაც გიცემს გული?!.. მოტყუ-
ებულო მეულლევ?!.. აი, შენი გულწრფელი
გრძნობა!..“

„არ შეხვიდე, შე მატყუარავ, არა!.. შენი
ადგილი...“

„ოხ, თქვენ ხომ შეყვარებულები ხართ?!..
ბედნიერებო, ერთმანეთისათვის გიცემთ გული,
სული და გული გაგიერთებიათ.“

„კარგია, თქვენ შემოხვედით იმ წყეულის შემდეგ. დამამშვიდეთ. თუ ეს აქ ატყუებს, არც ის დაკლებს იქ. ორსავე ერთმანეთისა სწამთ, ორნივე-კი ერთმანეთს ატყუებენ. ლირსნი არიან ორნივე ერთმანეთისა, თქვენ-კი...

„სულ სხვაა თქვენი კავშირი. ძლივას გაბედეთ ერთმანეთისთვის გაგემულავებინათ თქვენი გულისცემა. სულ ერთი კვირაა მას აქეთ. გინდათ სამუდამოდ ერთად იყვნეთ?! კიდეც მაგაზედ გაქვთ ლაპარაკი. ოხ, რა გრძნობით გამსკვალულა თქვენი თვალები! თვალებით გინდათ ერთმანეთი ჩანთქათ, რომ ერთ არსებად გარდიქმნეთ... ბედნიერებო, შედით, შედით. უფალი აკურთხებს თქვენს გრძნობას, გულწრფელს გრძნობას... სულ ცოტა ხნის შემდეგ მანდვე ერიც იქნება მოწმე თქვენის შეუღლებისა. შედით, შედით!.. თქვენისთანებისათვის არის ეგწმინდა ტაძარი და არა იმ...

„მო...ი...ცადეთ, მოიცადეთ!.. თქვე... ნუ თუ თქვენც სათავეში დაიწყეთ ცრუობა?!.. რად, რად ატყუებთ ერთმანეთს?!.. ვინ გატანთ ძალას?!.. რატომ გულ-ახდით არ უამბობთ ერთმანეთს გუშინდელს ამბავს?!.. ხომ არც ერთს ერთმანეთი არ გახსოვდათ გუშინ, როდესაც სხვადასხვებთან იყავით?! შედექით, არ შე-

ხუიდეთ, ვიდრე ერთმანეთს გულ-ახდით არ
უამბობთ გუშინდელს ამბავს... ეხლავე ნუ დას-
დგომიხართ სიცრუვესა, ნუ, ნუ!.. ახ, არ გინ-
დათ, მოისმინოთ?!.. მაინც სცრუბთ და... ახ,
ერთმანეთისა რაღად გჯერათ... ნუ თუ ვერა
ხედავთ ერთმანეთის სიტყვების უშინაარსობას?!..
შედექით!. შე...დე...ქით!..

„კეთილო მწყემსო!.. შედი და შენის
შეერ-მეტყველებით, შენის გულ-წრფელის სიტ-
ყვით გამოსდევნე ყველა. მანდ ყოფნის არც
ერთი ლირსი არ არის. არც ერთი არ მოსულა
სალოცავად. ყველა გამოსდევნე, შედი, შედი,
ნუ ყოყმანობ! ხომ კეთილი ხარ? ხომ შენი სი-
კეთე, გულწრფელი მოქმედება ქვეყანამ იცის?!
ხომ გრწამს კიდეც, გულწრფელად ემსახურები
შენს ერს? როგორ გეხვევა ხალხი?!.. ყველა
მოწიწებით შემოგცერის... მაშ...

„მოიცა, მოიცა!.. შენ... ლმერთო!.. ნუ
თუ ესეც... შევიდა კიდეც, თან ბრბო შეჰყვა...
მისდევს... ქალი, კაცი, დიდი, პატარა, ერთმა-
ნეთს მოება. აგერ, აგერ მოეშურება ყველა მანდ!.
თან მოაქვს გულწრფელობის გარდა, ყველა-
ფერი. რა გვარი სისაძაგლე არ არსებულა ადა-
მიანის გულში!.. ლმერთო, შენ ხომ ხედავ ყვე-
ლაფერს, შენ ხომ ხედავ ყველაფერს, შენ ხომ...

„ოხ, პატიოსანო არსებავ, მოხველი? გულწრფელო, მამულიშვილო... უკანასკნელად შენ მოხველი.

ნუ შეხვალ მანდ. ყოველმა სისაძაგლებ მანდ მოიყარა თავი. უმწიკვლო ხარ. მაგათან ერთად არ უნდა იდგე, არა. შენი მოღვაწეობა, შენი გულწრფელი, თავდადებული მოქმედება გამოისყიდის მთელი ერის უნდობლობას, გაუტანლობას. იყავ კელაპტრად. კეთილო მამულისშვილო, შორს დადექ. ნუ შეუერთდები მაგ სისაძაგლის მორევს, ნუ. შედექ, შედექ!..

„უანგარო მოღვაწევ, შედექ! მინდა გიმზირო, მინდა შენის მზერით დავტკბე და თავი ვინუგეშო. იქნება აგერ იქ მოთავსებული სისაძაგლე დამავიწყდეს და დავმშვიდდე... შე... შედი, შედი... არა, შესდექ, შე საზიზლარო, თვალთმაქცო, ბილწო! ყველაზედ საზიზლარი შენ ჰყოფილხარ, ყველაზედ...

„ახ, ღმერთო, სადღა, სად მოვძებნო წმინდა გრძნობა, წრფელი და უანგარო, როდესაც უწმინდესის საგნის სახელითაც ასე სარგებლობენ, როგორც ეს უმსგავსი?!.

„ახ, რა დიდის ამბით, რა გრძნობით ახ-სენებ ხოლმე წმინდა სამშობლოს... ღმერთო, ნუთუ შესაძლებელი ყოფილა მაგრე ხელოვ-

ნურად თვალები აუხვიოს საზოგადოებას და დაპტაროს ადამიანმა ნამდვილი მოძრაობა გულისა?!

„რაღას ყოყმანობ და არ შეხვალ, შე საზიტლარო?!.. შედი, შედი და ყველაზედ წინ წარსდექი! შეუერთდი იმათ და ატყუე, ატყუე, ვიდრე... ღმერთო, რად აბოგინებ ამათთანას?!.. რატომ...“

„ახ, თქვენ მაინც იყავით მაგრე. მუდმივ ეგ წრფელი გრძნობა გაკავშირებდეთ... აი, ვერა მხედავთ, რა სიხარულით ვეგებები თქვენს წმიდა, წრფელ გრძნობას იმ საზიტლარის შემდეგ?!.. ერთმანეთისათვის თქვენ თავს გასწირავთ: გიყვართ ერთმანეთი მეგობრულად. მეგობრები ხართ!.. შემომხედეთ, მეც თქვენთან ერთად ვხარობ. ღმერთო, გმადლობ!.. აი, ესენი... შედექით კია!.. ნუ მიხვალთ იქ. შე...“

„შედით, შედით... თქვენც, თქვენც, ორგულებო, ერთმანეთს ატყუებთ... მოიგონეთ გუშინდელი ამბავი, როგორ კილავდით ერთმანეთს, რომ თქვენი პიროვნება ამით აგემალლებინათ?.. ახ, საზიტლრებო, აღარც-კი გრცხვენიანთ, ერთმანეთს ეგრე ღიმილით ეგებებით და შეუვარებულებივით მილაპარაკობთ... ფუი, ფუი, თქვე... შედით, შედით...“

„ლმერთო!.. ვიღა დარჩენილა?! უფალო, შეარყიე ტაძარი, შემუსრე მისი მკვიდრი კელები, როგორც შიგ მყოფთ შემუსრეს ყოველი ადამიანური გრძნობა და...

„უფალო, უფალო... ნუთუ აღარავინ დარჩა?!.. ერთი, ერთი ადამიანი მაინც ვნახო, რომელსაც თავისი თავი არ გაელმერთებინოს და გულწრფელად მოქმედებდეს... ლმერთო...

„რა გინდა აქ?! წადი, წადი!.. დედი, დედი ერთ ნაბიჯსაც ნულარ წარმოსდგამ!.. წადი დაიმალე!.. ახ, არ გეყურება, წადი!.. ლმერთო, ლმერთო, ნინოც თან მოჰყავს, ჰა, ჰა, ჰა!..

„დედი, შეიბრალე წამებული შენი შვილი!.. დაიმალე, ნუ მოხვალ!.. წაიყვანე ეგეც, ნინოც! ნურც მაგას შემოიყვან, წადი, წადი!.. ნინო, ნინო, ნინო, დედი, წადით, წადით!.. აი, მუხლ-მოდრეკით გევედრებით! ვერა ხედავთ, რა მდუღარებას ვაფრქვევ! წადით, წადით!..

„ახ, არ გეყურებათ?!.. მოდიხართ!.. ლმერთო!.. დაბრმავდი, გონების თვალო, დაჩლუნგდი, გონებავ!..

„გული მაინც დამალეთ!.. არ მინდა ოქვენ გულს შევხედო... ოქვენი საიდუმლო გავიგო...“

„მინდა, ეგ ორი გული მაინც არ ვიცოდე!.. ეგ ორი გული მაინც მაკავშირებდეს ადამიან-

თან... მინდა ადამიანის გულწრფელობა მწამ-
დეს!.. მაგრამ...

„ააახ, ხა, ხა, ხა!.. თქვენი გულიც მეშ-
ლება თვალ-წინ!..

„არ მინდა, არა, არა და არა!.. დაჩლუნ-
გდი, გეუბნები, გონებავ!.. თვალო, დაბრმა-
ვდი!.. ადამიანის გულ-წრფელობა მინდა მწამ-
დეს, მინდა!.. მინდა!.. არ ჩლუნგდები! ეპო-
ტინები მაგ ორ გულსაც? ძალად დაგაჩლუნგებ,
დაგაბრმავებ! ნებას არ მოვცემ, შეეხო მაგ ორ
გულს, ჩემ წმიდათა-წმიდას!..

„აი, ეს დამბაჩა მოგიღებს ბოლოს!..

„ჰა!.. დედი... ნინო... მშვიდობით!..

— შვილო, რა დაგემართა!..

— ჰა?!

— საშინლად ბორგავდი, სტიროდი.

— დედი, შენ?!.. ნინო?!..

— ჰო მე, ვიღა ნინო?

— გენაცვა, დედი, დედი!.. სიზმარი ყო-
ფილა!..

— ჰო, ძილში სტიროდი...

— გმადლობ, უფალო, გმადლობ... სიხარუ-
ლის ცრემლის ფრქვევით წამოიჩოქა ლოგინში და
მხურვალედ უფალს მადლობა შესწირა, რომ სიზ-
მარში ყოფილა გულთამხილავი და არა ცხადად.

„მმულხართ!“

(საახალწლო ეტიუდი),

— ეს პირველი! — წამოიძახა ქალწულმა და გვერდზე კისრის მიგრეხით სარკეში ჩაიხედა... ოდნავ შეპარებული სიწითლე იმის ნაზს, სპეტაკ სახის ფერს აშვენებდა და ცისფერი თვალები და ოქროსფერი თმა ხომ უათკეცებდნენ სიმშვენიერეს. ნეტოს თითონვე მოეწონა თვისი მინაზებული სახე და სარკისკენ მთლად მიტრიალდა. სარკეშ უტყუვრავ გამოაჩინა იმისი მოხდენილი ტანი და...

— მოდის!... — ღიმილით წამოიძახა, კიბიდან ფეხის ხმა რომ შემოესმა, და მოწყვეტით სავარძელში ჩაესვენა.

— ლეგაა!... — შემოვიდა დედაკაცი და მოხსენა ნეტოს.

— სოხოვე!... — უპასუხა ნეტომ და წამოდგა. ლეგამ კარიბჭეში გვაბანაკი გაიძრო, თმა გაისწორა და... — მოგილოცავთ ახალ-წელს!... — უთხრა, შემოვიდა თუ არა დარბაზში და ნეტოს მხურვალედ ჩამოართვა ხელი.

— პირველად თქვენკენ წამოვედი...

— გმადლობთ! თითქმის მეკვლეც თქვენა ხართ! — უპასუხა ნეტომ და სთხოვა, დამჯდარიყო.

— ახ, რა ბედნიერი ვარ, რომ თქვენი მეკვლე მე ვარ! .. — შეუხამებელი სიხარულით წამოიძახა ლეგამ და ნეტოს გვერდით მიუჯდა ...

— განა ჩვენი მეკვლეობა მაგრე საინტერესოა, რომ ბედნიერებად სთვლით?! — ღიმილით დაეკითხა ნეტო და ცოტათი ლეგასკენ გადმოიხარა.

— ნეტო! — ხმის კანკალით წამოიძახა და ხელი დაუჭირა: — ეს დღე ჩემთვის სანეტარო იყო და მოუთმენლად მოველლოდი, რომ... რომ... ახ! .. ნეტო, მიყვარხართ! ..

— ხა, ხა, ხა! .. — გადიხარხარა ნეტომ და ხელი გამოჰველიჯა ...

მდუღარე გადაესხა ლეგას, ნეტოს დაცინვითი ხარხარი რომ შემოესმა და წამს მოსაზრება დაეკარგა ...

ვერც ხელი, ვერც თავი ვერ გაენძრია და გაშტერებით ნეტოს მისჩერებოდა.

რად? .. არ იცოდა.

ხარხარი კიდევ შემოესმა, თუმცა-კი ნეტოს



მეორედ არ გადუხარხარია, და მაშინ-ლა გამოფხიზლდა.

უეცრად მოუდუნდა ტანი, ძლივს წამოდგა და ოვალ-ცრემლიანმა წაილულლულა:

-- მშვიდობით ბრძანდებოდეთ!..

— როგორ, მიღიხართ?.. — წამოდგა ნეტოც და ოვალთ ჩააცქერდა.

— საკაა, დედა-ჩემიც გამოვა, ძალიან ეწყინება, იმის უნახავად რომ მიღიხართ!..

— ბოდიშს ვიხდი... არ შემიძლია!..

* * *

ლეგა გაეთრია. დიალ, გაეთრია, რადგან თავის თავს ძალად მიათრევდა. ფეხები ალარ ემორჩილებოდნენ.

რა სიხარულით, რა სიამით მოეშურებოდა ნეტოსკენ?!.. რა ლიმი უკრთოდა ტუჩებზე, როდესაც აქეთ მოესწრაფებოდა, და რას არ ოცნებობდა!.. მაგრამ რა სასტიკად დასაჯეს, დასკინეს და წმიდათა-წმიდა შეულახეს!..

მერე ვინ?..

ნეტომ... ნეტომ... იმ ნეტომ, რომელიც ანგელოზად მიაჩნდა და რომლისაგანაც სრულებით არ მოელოდა ამგვარ შეურაცყოფას...

ნეტო ხორც-შესხმულ ციურ არსებად მია-

ჩნდა ლეგას და როგორ წარმოიდგენდა, რომ
 ის...: ის... ისე ხარხარით მიიღებდა იმის წმინ-
 და გრძნობას და...

— ახ!.. შესდექ!.. — მეტოჯეს ყავარჯენი
 ზურგში წაჰავი და შეპყვირა:

— გადახადე!

— როგორ, ბატონო, სთოვს!..

— გეუბნები, გადახადე!.. — მოკლედ უპა-
 სუხა და გვაბანაკი გადიღელა...

ცხელოდა. საკირეში ეგონა თავისი თავი.
 იმის შუბლს, სახეს უხვად ეფერტლებოდა თო-
 ვლი, მაგრამ ამით არაფერს გრძნობდა და ქუდ-
 მოხდილი გადახდილი ეტლით მისრიალებდა უმ-
 თავრეს ქუჩაზე. რამდენმა შეხედა და გაიფიქრა:
 „მთერალიაო.“ სხვა დროს თითონვე დაითაკი-
 ლებდა ამას, მაგრამ ახლა... ახლა, როდესაც
 ნეტოს დაცინვით ხარხარის. მეტი არა ეყურე-
 ბოდა-რა, ვეღარაფერს ამჩნევდა...

— გეყურება, არავინ მიიღო, ვინც უნდა
 იყვეს... შინ არ არის-თქო, ასე უთხარ! — სას-
 ტიკი ბრძანება მისცა მოსამსახურეს და ლოგინზე
 გულდაღმა მიეგდო...

* * *

— ვინ იყო, შვილო?.. — დაეკითხა დედა, როდესაც ლეგა წავიდა, და დარბაზში გამოვიდა.

— ლეგა.

— როგორ?! მერე ჩემ უნახავად წავიდა?.. რატომ სანამდის მე არ გამოვიდოდი, ტკბილეულობაზე არ მოიწვიე?!.

— მიეჩქარებოდა... — უპასუხა ნეტომ დედას, მაგრამ ტანში გააურჟოლა.

იგრძნო, რომ იმტყუვნა, რომ იმისმა ხარხარმა აიძულა ლეგა ჩქარა წასულიყო და ასე რომ არ მოჰქცეოდა, იქნება ის მთელი დღე ამათთან დარჩენილიყო. თვალ-ცრემლიანი ლეგა უეცრად წინ წარმოუდგა და...

. — გენაცვა, დედი, ცუდადა ვარ, მე ველარავის ვეჩვენები...

გული ამოუჯდა და ქვითინი მორთო.

— რა დაგემართა, რა იყო?!

— არ ვიცი... მაპატივე!.. — წამოიძახა და თავის თთახში შევარდა...

— რა უზრდელი, საზიზლარი რამა ვარ!.. ასე როგორ მოვიქეცი და...

ახლა-ლა იგრძნო თავის ხარხარის მნიშვნელობა და ტანმა ჩხვლეტა დაუწყო.

ლეგას ცრემლ-მორეული თვალები-კი ჩაუ-
ნებული შეჰყურებდნენ და, თითქოს მომაკვდავი,
უკანასკნელად საყვედურს ეუბნებოდნენ...

— ლმერთო, ლმერთო, ხომ მოვკალი!.. —
წამოიძახა თვალებზე ხელის მიფარებით, რომ ლე-
გას თვალები მოეშორებინა და ლოგინზე პირ-
ქვე მიწვა...

ლეგა კუბოშია. შავით შემოსილი მღვდე-
ლი წინ მიუძღვის და საუკუნო სამყოფელისკენ
მიაქვთ. მგალობელთა გუნდი-კი სამგლოვიარო
„წმიდაო ლმერთოს“ გალობს...

დედა?!

ლეგას დედაც უკან მისდევს და იმას...
ნეტოს... საყვედურით უმზერს...

— ახ!.. — მწარეთ ამოიკვნესა ნეტომ და
თავი ბალიშში უფრო ღრმად ჩაფლა, რომ ეს
სამწუხარო სურათი თავიდან მოეშორებინა...

* * *

„საზიზლარი!.. — შებლავლა ლეგამ და ლო-
გინიდან წამოვარდა: — არ მეგონა, რომ ის... ის
ასე უზრდელად მომექცეოდა და პირში დაცი-
ნეით მომახარხარებდა... ოხ, რა თვალების ამ-
ხვევი ყოფილა გარეგნობა!..

„წავიდა... განქრა ჩემი ოცნება... რა ნა-

ზაღ, სათუთად ვკვებავდი და ის-კი რა სასტი-
კაღ მომექუა?!..

„ახ!.. რომ ქალწული არ ყოფილიყო,
რომ სხვას მოეყენებინა მაგეთი შეურაცხყოფა,
დავგლეჯდი, დავფლეთდი და მიწასთან გავას-
წორებდი...“

„როგორ, როგორ?!.. თუ უარის თქმა
უნდოდა, განა ზრდილობიანად ვერ მეტყოდა?
განა არ შეეძლო, სხვანაირად უარი ეთქვა და
მაგრე მასხარად არ აეგდო ჩემი გრძნობა?!..

„საზიზლარი!..“

— ბატონო, ვიღაც ქალწულს უნდა თქვე-
ნი ნახვა.—მოახსენა მოსამსახურებ და წინ გა-
მოეჭიმა.

— მე აკი გითხარ, ნურავის მიიღებ-მეთქი!
— წყრომით შეუტია ლეგამ და ისევ ლოგინზე
მიწვა...“

— მისთანა მშვენიერია, რომ უარი ვეღარ
ვუთხარი, როდესაც მკითხა: „ბატონი შინ არი-
სო...“

— გასწი, გაეთრიე!.. უთხარ, სძინავს-თქო...“


— ლეგა, მე ვარ!..—უეცრად კარი შემო-
ილო და იქიდან მოესმა ხმა.

— შენ?!.—სიჩქარით წამოიჭრა და ნეტოს
პირ-და-პირ დაუდგა.—ხა, ხა, ხა, ხა!.. შეგე-

ცოდეთ და იმისთვის მოხვედით?... — მწარედ დაეკითხა და თვალი თვალს გაუყარა.

— ლეგა... მომიტევე! — წამოიძახა ნეტომ და ლეგასკენ აჩქარებით წამოვიდა.

— შორს!.. მძულხართ!..



წერილის ნაგლეზი

(ეტიუდი)

„... ვუკვირდები, ჩემო კარგო, ჩემ გრძნობას და თმა ყალყაზე მიღვება. ნუ-თუ ყოველივე, რაც გითხარი ჩემ გრძნობაზე, ტყუილი უნდა გამოდგეს?!.. რა მემართება? არ ვიცი. წინადაც ესევე მემართებოდა, მაგრამ არა მჯერა, თუ ეს მემართებოდა. ჩემ გრძნობას არ ვენდობოდი... აგერ ერთი წელიწადია, რაც სიყვარული გამოგიცხადე და ქმრობის პირობა მოვეცი. მგონი ერთი წლის დაკვირვება საკმარისია, რომ ასე თუ ისე შენი გრძნობა ასწონდასწონო და რაიმე დასკვნა გამოიყვანო. რა-საც იმ წამს ვერდნობდი, როდესაც პირველად გითხარ: „მიყვარხარ,“ ახლაც იმასვე ვერდნობ. მართლადაც მიყვარხარ, მიყვარხარ, თავ-დავიწყებამდის მიყვარხარ...“

„მინდა ახლა გულში ჩაგიკრა, სულში ჩაგიძვრინო, რომ განუშორებელნი ვიყვნეთ და საფლავშიაც ასე, ერთ არსებად გარდაქმნილნი, ჩავიდეთ... ახ, რა ნეტარება იქნებოდა, რომ ამ გრძნობით ჩავესვენო საუკუნო სამყოფელს!..“

„ხომ შორსა ხარ, ხომ მარტო წერილით
გესაუბრები ამ წამს, მაგრამ შენ ცხადლივ თვალ-
წინ მიღვეხარ და გეამბორები, გეხვევი და უკი-
დურეს ნეტარებას ვგრძნობ, იმაზე მეტს, რო-
გორსაც, ხომ გახსოვს, შენი მშობლები რომ
დასაძინებლად წავიდოდნენ და ჩვენ მარტოკებს
ოთახში დაგვტოვებდნენ... ჩაკონებულნი, რა
ნეტარებით ვიყავით მოცულნი!.. მაშინ აღარ
გვესმოდა შენი მშობლების მძიმე ქშინვა, აღარც
კედლის საათის შეუწყვეტელი კაკა-კუკი და...

„ახ, რა სანეტარო გრძნობით ვიყავით
შეპყრობილნი!..

„იმაზე მეტ ნეტარებას ვგრძნობ ამ წამს,
როდესაც გონების თვალით გეხვევი. შენს
მეტი ამ ქვეყნად არავინ არის ჩემთვის, შენა
ხარ ჩემი ყველაი; მაგრამ... წყეულიმც იყ-
ვეს ეს „მაგრამ“, რომ დაუპატიჟებელი სტუ-
მარია...“

„მაგრამ მხოლოდ მაშინ ხარ ჩემი ყველაი,
როდესაც გხედავ ან მაგონდები. როდესაც-კი
შენს მაგივრად სხვასა ვხედავ ან მაგონდება სხვა
ქალი, რომლის წინააღმდეგ არა მაქვს-რა, მა-
შინ... მაპატივე, ჩემო კარგო, შენდამი სიყვა-
რული აღარ არსებობს, შენ აღარ ხარ ჩემი
ყველაი. ჩემი ყველაი ის... ის არის, რომელ

მშვენიერსაც ვხედავ და რომელი მშვენიერიც
 ჩემ წინ დგას იმ ჟამად.

„ის მიყვარს იმ ჟამად, მხოლოდ ის მი-
 ყვარს, გაგიუებით მიყვარს ის, და ეს გრძნობა
 ისეთივე გულწრფელია, როგორც შენდამი,
 იმაზედაც ისევ იმას ვფიქრობ იმ ჟამად, იმასვე
 ვნატრობ და გავიძახი: „ახ, ნეტარება იქნება,
 რომ ერთად ვიყვნეთ დღე-მუდამ, ერთ არსე-
 ბად გარდეიქმნეთ, რომ სიკვდილსაც ვერ შე-
 ეძლოს ჩვენი განმორება, რომ საფლავშიაც
 ასე, ერთ არსებად გარდაქმნილნი, ჩავესვენოთ.“
 იმ ჟამად „ის“ „შენ“ არის და ახლა-კი, რო-
 დესაც შენ გესაუბრები, „შენ“ „ის“ ხარ...
 შენ იმასთან არ გახსოვხარ და მივიწყებული
 მყევხარ, როგორც შარშანდელი თოვლი, და
 შენთან კიდევ ის, „ის“, ვინც უნდა იყვეს,
 მხოლოდ მშვენიერი-კი. „შენ გეამბორებოდი,
 გეხვევოდი, როდესაც შენთან ვიყავ, და, გე-
 ფიცები ყოველსავე წმიდას, თუ-კი რაიმე წმი-
 დაა, ჩემი მოქმედება გულ-წრფელი იყო. მხო-
 ლოდ გრძნობა მოქმედებდა და სხვა არაფერი.
 მოქმედება სრულებით მთლად ვერა ჰხატავდა
 ჩემს გრძნობას. გრძნობა უფრო დიდი იყო,
 ვიდრე მოქმედება, და ახლაც, არ ვიცი, ისე-
 თი რა უნდა ჩამედინა, რომ ჩემი გრძნობა ამ

მოქმედებას გამოეხატნა... საალერსო სიტყვა მეთქვა? — არა. არც ერთი საალერსო სიტყვა არ არსებობს ჩვენს ლექსიკონში, რომ მთლიად ჩემი გრძნობის დამახასიათებელი იყვეს... ხვევნა, კოცნა, ხელების ფათური და... და სხვა?.. ვერც ეს გამოხატავს ჩემ გრძნობას...


„გეგურება, რასა ვგრძნობ და ვგრძნობდი შენდამი?.. ყოველივე ეს მემართება და მემართებოდა, როდესაც შენა გხედავ და გხედავდი.

„მოგშორდებოდი თუ არა და ახლა სხვა მშვენიერს შევხვდებოდი, მაშინ ისევ იმ გულწრფელ, წმიდა გრძნობას, გამოიწვევდა და გამოიწვევს ის ჩემში, რომელსაც ვერც საალერსო სიტყვა და ვერც რომელიმე მოქმედება ვერ დაახასიათებს.

„რად მემართება ეს? — არ ვიცი. პირველში ვფიქრობდი, ვითომ ჯერ გამოურკვეველია ჩემი გრძნობა და ამისთვის მემართება ეს. იმის გამო გაგშორდი, რომ გამომერკვია და ჩავკვირვებოდი, მაგრამ, რაც ბევრს ვცდილობ გამორკვევას, უფრო გამოურკვეველად მრჩება და ჩემთვის გაუგებრად რჩება ის იდეალური სიყვარული, რომელსაც პოეტები გვიხატავენ. მე მგონია, იმათი ოცნების ნაყოფია ის სიყვარული და ცხოვრებასთან არავითარი კავშირი არა

აქვს. ან იქნება მე ვარ ამ გვარი ბუნებისა და
სხვები-კი არა. ნეტავ მაგრე იყვეს, მაგრამ...
ფუი, კიდევ „მაგრამ“ წამოიჩირა!.. ყველამ
რომ ასე გულ-წრფელად ილაპარაკოს, როგორც
მე შენ გელაპარაკები, მაშინ, მგონია, ყველა
ამას იტყოდა...

„ახ, ნეტავი ვცდებოდე!.. მაშინ მეც შე-
მეძლება შევიყვარო ვინმე ისე, რომ... რომ
მარტო ის იყვეს საუკუნოდ ჩემი სული და
გული...“



*) ეს წერილის ნაგლეჯი ქუჩაში ვიპოვე. რაღანაც დეტორი არა სჩანს, ამისთვის გამოვამყლავნე.

„ბაზდო-კი...“

(სააღდგომო ეტიუდი)

სტირის მაია, სტირის, ცრემლები ვეღარ
 შეუყენებია, ან კი როგორ არ უნდა იტიროს,
 როდესაც თავის საყვარელ ბაბდოს, თერთმე-
 ტი წლის უმანკოს, ბალიშედ უგრძნობლად
 გადასვენებულს, დასკერის!..

— ბიჭებო, მაგათ ძარს*) თავი დაანებეთ,
 შინ მწუხარე ჰყავთ.— შემოესმა გარედან ხმა.

— ვინა ჰყავთ მწუხარედ?— დაეკითხა მეო-
 რე ხმა.

— ვინა და საწყალი ბაბდუა!..

— საწყალი!...

ამ ლაპარაკზე მაიას გული უფრო აუდუღ-
 და და ცრემლებმა თვალთაგან ნიაღვარსავით
 დენა დაუწყო.

— მაშ ვისი ძარი წავიღოთ?.. — ალაპა-
 რაკლნენ ისევ გარედ.

— ვისი და ბერუკაანთ ძველი ძარი უდ-
 გიათ გარედ და ის წავიღოთ.

*) ლილი გოლორი, რომელსაც დაუცეხვავ სიმინდის შე-
 სანახავად ხმარობენ.

— ჩემი ძარი წაიღეთ, ჩემი!.. თუ ჩემი
ბაბდო არ მეყოლება, გინდ ე ქოხიც დაწვით!..
— წამოიძახა თვალურემლიანმა მაიამ, მაგრამ გა-
რედ ხმაურობა შესწყდა.

დარჩა მაია ისევ ყრუდ თავის ოთახში.
ხმის გამცემიც აღარავინ არის. ან-კი ვინ მო-
იცლიდა აღდგომა ღამეს მაიასთან მისასვლელად,
ხმის გასაცემად? ყველა აღდგომისთვის ემზადე-
ბა, ყველა....

— ო-ო-ო-ო!... — ყრუდ შემოესმა მაიას
ეკლესიის გალავნიდან ყიჯინი.

— შვილო, შვილო, რატომ შენ-კი იმათ-
თან არ ხარობ? — ჩასძახა მაიამ ბაბდოს და მუხ-
ლებზე ხელები დაირტყა.

ჩქარა ეკლესიის გალავანი მთლიად განატ-
და. ცეცხლის ალი ეკლესიის წვერს სწვდებო-
და*); ცოტაოდენი შუქი მაიას ოთახის სარკმე-
ლისაც მოხვდა და იქ ხატის წინ მბჟუტავ კან-
დლის შუქს შეუერთდა. ამ გარემოებამ მაია გა-
მოარცვია და სარკმლისაკენ მიახედა.

— და, და, და, რასა ვხედავ, შვილო, რა-

*.) ბევრ სოფელში ქრისტეს აღდგომა ღამეს ეკლესიის
გალავანში ლიტანიისათვის ზარების დარეკამდის დიდი ცეც-
ხლი უნთავ, გარს თითქმის მოელი სოფლის ახალგაზღო-
ბა—ქალი და ვაჟი—ეხვევა, მღერიან და ლხინობენ, როგორც
დღეობაში.

სა?!.. შენც ხომ გიყვარს, შვილო აღდგომა და-
მეს ცეცხლის გარშემო სირბილი, შენს ტოლ-
ამხანაგებთან ცელქობა, მაშ ეხლა სახლში რას
აკეთებ?! — სიმწვავით ჩასძახა მაიამ ბაბდოს და
გულში ჩაეხუტა.

— ჭოონაა!.. — შემოსძახა პირველმა ხმამ
შიგ კარებში, მეორემ და ბანმა ხმა შეუწყენ
პირველ ხმას და მწყობრად, დიადი ჰარმონიით
განაგრძეს ერთად:

— „ალათასა, ბალათასა,
ჩამოვკიდებ კალათასა;
ქალო, ერთი კვერცხი ჩადე,
ლმერთი მოგცემს ბარაქასა...“

— ჩემო ბაბდო, ადე, კვერცხები გაუტა,
შენ გენაცვალოს დედა, შვილო! — სიყვარულით
ჩასჩურჩულა მაიამ ბაბდოს და იმის გაელვარე-
ბულ ტუჩებს თავისი შეახო.

მომღერალთ უეცრად შესწყვიტეს სიმღერა.
ცოტა ჩურჩულის შემდეგ ფეხ-აკრეფით წავიდ-
ნენ.

— სად მიხვალთ, სადა? — მაიამ თავი კარე-
ბისკენ მიიღო და მიაძახა, მაგრამ მომღერლებმა
ვერ გაიგეს. — ყველა თავს გვანებებს... — მწარის
ლიმილით წარმოსთქვა და თავისი მორღვევული
თვალები ბაბდოს მიაპყრო, რომელიც ამ დროს

ტუჩებს აცმაუნებდა და დრო გამოშვებით გაუგებარ სიტყვებს გაიძახოდა.

მაია არა შორდებოდა გვერდიდგან. მალი-
მალ შუბლზედ, გულზედ, ხელებზედ წყალსა
და ძმარს უსვამდა. ბაბდო-კი მაინც ბორგავდა,
სიცხე არ ნელდებოდა.

პირველად მამლებმა რომ იყივლეს, ბაბდო
დამშეიდდა, სიცხემ დაუშო. მაიას გაუხარდა.
ბაბდოს სუნთქვას თვალყურს აღევნებდა. თვალ-
ყურის გდებაში თავი ჩამოეკიდა, თავის უნე-
ბურად იქავე, ბაბდოს გვერდით, მიწვა და
უნებურადაც ჩაეძინა...

— დედი, დედი!... — შემოესმა მაიას ხმა
და დაფეთიანებული წამოვარდა.

— შვილო, რას შვრები?. — წამოვარდნის
უმაღლ მოჰევია ხელები წამოჩოქილ ბაბდოს და
გულში ჩივკრა.

— გამიშვი, გამიშვი, მინდა წავიდე!

— სადა?...

ჩამოჰკრეს ამ დროს დიდ ზარსა*). ააყო-
ლეს წვრილი ზარებიც.

— აგერ იქ!.. მეძახის, ვერა ხედავ?..

*) სოფელში ღამის 12 საათზედ-კი არა რეკვენ ზარებს აღდგომა ღამეს, განთიადისას.

— ვისა, შვილო? აქ არავინ არის... აღ-
დგომაა, ზარებს რეკენ.

— აღდგომაა... — თვალები მაგრად ჩახუჭა
და შუბლი შეიჭმუხნა, თავი დედის კისერს მი-
აჭდო და...

დიდხანს იყო ასე. ზარების რეკა შესწყდა.
გალავანში მღვდლის წინამძლოლობით ხალხი
სიხირულით ეკლესიას გარს უვლის. მრავალი
სანთლის შუქი აჩირალდნებს ეკლესიას და მის
არე-მარეს. მღვდელი და მეფსალმუნე „ქრისტე
აღსდგას“ გალობენ. ხალხი ხარობს, „ქრისტე
აღდგას“ გაიძახის...

— დედა, ვერა ხედავ იმას?

— არავინ არის, შვილო.

— შენ გენაცვალე!.. — თითქოს გული თან
ამოატანაო, ისე წარმოსთქვა ბაბდომ.

— მე უნდა გენაცვალო, შვილო, შენ-კი
არა...

— დედი, გამიშვი...

— სადა?..

— ვერა ხედავ, მეძახის? აგერ, როგორ
ბრწყინავს, აგერ... აგერ!.. ქრისტე აღსდგა!..
ბრწყინავს... ის მეძახის... აგერ!.. — წამოიწია და
თითი მაცხოვერის ხატისკენ გაიშვირა, რომე-
ლიც მარჯვნივ აღმოსავლეთის კუთხეში ესვენა.

— რას მომცემს ის ქრისტე, რომელიც
მე ჩემს ნუგეშს მართმევს...


— სსს... — მწარედ წაისისინა და დედას
ტუჩებზედ ხელი მიაფარა.

— აბა სად ირის?.. მე იმას...

— სსს... — კიდევ წაისისინა და უფრო მაგ-
რად დააფარა ხელი. — შეევედრე... შეევედ-
რე... ის... ის... განუ... გე... შეპს... უკა-
ნასკნელი ასოები სულ მკრთალად წარმო-
სოჭვა და მოლეშით დედას მიესვენა...

გათენდა. ფრინველთ შესწყვიტეს დიდე-
ბული ჰიმნის გალობა, კერძოდ თვითეული სიმ-
ხიარულეს მიეცა. მზემ ნაზი სხივები უხვად უძ-
ლვნა ადამის შთამომავალთ, რომელნიც მხია-
რულებით ერთმანეთს ქრისტეს აღდგომას ულო-
სავდნენ. მღვდელიც ფსალმუნით შევიდა: „ქრი-
სტე აღსდგა მკვდრეთით...“ და ბაბდოს რომ
თვალი შეისწრო, გალობა შესწყვიტა...

„ქრისტე აღსდგაო...“ — ყველა მეტყველი
იმას გაიძახის... ქრისტე აღსდგა, მაგრამ ბაბ-
დო-კი...



„გ უ ლ-ც ი ვ თ ბ ა მ!..“

(ეტიუდი)

კოდა-ხევის შესართავთან პატარა კლდე-ზედ მოთავსებულმა გაბრომ ყურებამდის მხრები აიწურა, შუბლი დაინაოჭა და მწარის ლიმილით, ჩიუინებით მზერა დაუწყო იქავე, ფეხთ ქვევით, განრისხებულ არაგვს.

სჩექეფს, ღრიალებს არაგვი... მთლიად ზვირ-თებად ქცეული, იერიშით მოდის პატარა კლდის შესამუსრავად, რომელიც თითქოს დარაჯად ჩასდგომიაო უპატრონოდ მიტოვებულ „ბებრის ციხეს“, რომ გაცოფებული არაგვი აუცეროს იმ ფშხვიერ გორაკს, რომელზედაც ჩვენ წინა-პართ არსებობის დასაცველად აუშენებიათ ეს ციხე.

მაგრამ პატარა კლდე მწუხარებით უმზერს და თავის მკერდს უშვერს მედგარ ტალღებს, რომელებიც შუილ-ხუილით ეკვეთებიან და იმავე წამს დანაწილებულნი, შხებებად ქცეულნი კვნე-სით უკუ გარბიან.

გაწმილებული არაგვი ნაზად ჩაუდის „ბებ-რის ციხეს“, მაგრამ პირ-ქაფ მოსულობა-კი ამ-

ხელს, რა ძალდატანებითი სინაზეც არის, რა-
ნაირი შხამითაც არის აღვსილი მისი სინაზე.

„ბებრის ციხეს“ ჩატილებული არაგვი ძა-
ლას იკრებს და მხიარულის ღრიალით მუქა-
რას უთვლის პატარა კლდეს. ემუქრება და მიე-
შურება...

საით!?

„არაგვო, არაგვო!..—გულის ტკენით ჩას-
ჩურჩულებს პატარა კლდე:—რას ამოგილივარ
თვალში, რისთვის მოვინდომებია ჩემი შემუ-
სვრა!? ნუ-თუ უპატრონოს დარაჯობისთვის?!
ეჭ, ჩემო კარგო, რადა ხარ მაგეთი ხარბი?..
აბა მიიხედ-მოიხედე: რა დიდია შენი კალაპო-
ტი. რო გაიფანტო, ვერც-კი დაპუარავ. კარ-
გი, მეც შემმუსრე, გააფართოვე შენი კალაპო-
ტი. მერე? ჰმ... ვისთვის გინდა? მაგრე სისწრა-
ფით რომ გარბიხარ და თან მუქარას მითვლი,
თუ გვონია გიძმოს, რომლის იმედითაც მემუქ-
რები?.. ნუ სტყუვდები, ჩემო კარგო არაგვო,
ნუ... იმისი ტკბილი ხმა ნანად ნუ შემოგეს-
მის. ის პირველში ძმურად გიხუტავს გულში;
დინჯი, მეტის-მეტად დინჯი შენს ფეხს იდგამს
და მკლავ გადახვეული მოვიხტის გვერდით და
იმას-კი ვეღარა ჰქედავ, თუ თან-და-თან ბურუს-
ში როგორა გხვევს და...

„სადღაა შენი ხსენება?..

„დიდებული მტკვარი მოდისო, გაიძახიან
ქვევით და შენი სახელი-კი...“

— ეეხ!.. — გულ-ამოსკვნით წამოიძახა
გაბრომ და შუბლზედ ხელი გადისფა.

მწერალებამ ისე მიასუსტა, დაუჩლუნგა გო-
ნება, რომ დიდხანს, დიდხანს შუბლ-შეკრუ-
ლი და მხრებ-აწურვილი გაქვავებული იჯდა.
ამ დროს განმავლობაში არავითარ აზრს არ
გაუვლია მის თავში.

გზა-დაბნეულ ცხვარსავით მოვიდა და კლდე-
ზედ მოლეჭით ჩამოუდა. არ შეუმჩნევია გაბ-
როს არც არავის ბრძოლა კლდესთან, არც ეტ-
ლების ტრიალი იქავე გზა-ტკეცილზედ და არც
ის, თუ თან-და-თან როგორ მისწყდა ფეხის
ხმა და მხოლოდ არაგვი-ლა ქუხდა. ვერც მოვა-
რის ამოსვლა შენიშნა გაბრომ, და ეხლა, რო-
დესაც თავისდა უნებურად გულის სიღრმიდან
კვნესა აღმოხდა და ცივი ოფლი შუბლიდგან
მოიწმინდა, მთეარეს შექხედა, რომლის დანახვა-
ზედაც გული მოეკუმშა, ყელში მოებჯინა.
თვალი საჩქაროდ მოაშორა და არე-მარეს გა-
დაავლო, მაგრამ იქაც, იქაც იგივე შენიშნა:
მთა, ღრე, მდინარე მთვარესავით გულცივად
შესცეკროდა გაბროს.

აგერ, გაღმით ჭალიდანაც ბულბულის აღგზნებული ყეფა „ტია-ტია“ ოდნავ გამოისმა და არავის მოთქმას შეუერთდა.

„ეგ... ეგ მაშინაც ჰყეფდა, მაგრევე გა-ტაცებით, როდესაც მე აქვე... ახ!..“

საფეთქლებზედ ხელი მიიფარა და მწარედ ქვითინი მორთო.

სწრაფად გადაეფურულა მისი ცხოვრების მატიანე და სანუგეშო ვერა ჰელია-რა, მხო-ლოდ ერთ გარემოებას მოჰკრა თვალი, რომ-ლის იმედითაც ლამობდა შელიანული ძალის აღდგენას და ისიც ხომ...

„ღმერთო, ღმერთო!..—წამოიკვნესა გა-ბრომ და უფრო მაგრა მოუჭირა თავს ხე-ლები.—წავდიადში ხეტიალი, ხელების ფათური, —ქვითინებდა გაბრო:—როდემდის უნდა გა-გრძელდეს?.. ან-კი რად უნდა ხელი აფათურო, რას ელტვი, რისთვის ან ვისთვის სცხოვრობ?..“

— რას სულელობ, რას?.. სადაური კით-ხვაა: „ვისთვის ან რისთვის?“—ეკითხება იდუმა-ლი ხმა.

— რომ. მავრე მკიცხავ, გეცოდინება რის-თვისაც. — გაბრომ შესწყვიტა უეცრად ქვითინი და თვალები მოიწმინდა.

— ვიცი და ამისთვის გეუბნები.

— ომხ, მითხარ, მითხარ!.. ოღონდ ეგ გამაგებინე და... ვფიცავ ჯოჯოხეთს, რომელ-საც ჩემ გულში დაუბუდნია, გაგალმერთებ, გე-თაყვანები! - გაბრწყინვებული თვალებით შეე-კითხა ზეცას.

— ვისთვის და საზოგადოებისთვის.

— ჰა!.. მეც არა ვსთქვი, მართლა იცი! — გულნატკენად წამოიძახა გაბრომ და თვალები მჩქეფარე არაგვს მიაპყრო.

— რატომ მაგრე მწარედ ილიმები?.. შენ გეკითხები! მაშ არ უნდა ემსახურო იმას, ვინც დაგბადა, აღგზარდა?!.. ვალს გადახდა არ უნდა?

— შეგნებულად მეუბნები მაგას?

— შეგნებული რომ არა მქონდეს, არც გეტყოდი.

— მაშ კარგი, ყური დამიგდე: საზოგადო-ებამ დაგბადაო, მეუბნები, ეგ ტყუილია. მე, არ ვიცი კია რა განზრახვით, ბუნებამ გამზარ-და, ხოლო საზოგადოებამ წამართვა ის, რაც ბუნებამ მომანიჭა, ან კიდევ, თუ არ წამარ-თვა, დამიმახინჯა, გამირყვნა და შემილახა. იგერ, არ გეყურება, როგორ გატაცებით გა-ლობს ბულბული?! ეგალობება და გალობს. როდესაც გეტირება, იცინო, და იტირო, რო-დესაც გეცინება! საზოგადოებას რომ ის მივუწ-

ყო, რაც მე იმან, მაშინ ის, აი, წინ უნდა გა-
 ვიმძღვარო და ჯერ ის მივანდო არაგვს და მე-
 რე მე მივეცე. გულქვა, გულცივი, თავის წევ-
 რის ფეხის დამჭირებელი საზოგადოება მოდის
 და გეუბნება: „შენ ჩვენი მოძმე ხარ, ესა და
 ეს ჩვენთვის უნდა გააკეთო... გვანაცვალე
 ჩვენ, ვინც-კი გყავს, ან გაქვს რამე. შენ მო-
 ვალე ხარ...“ კარგი, პატიოსანი. თუ მე ვარ
 მოვალე, პატივცემულო საზოგადოებავ, შენც
 მოვალე ხარ; თუ მე შენ გეკუთნი, შენ კი-
 დევ მე უნდა მეკუთნოდე.. საზოგადოება
 მსხვერპლს გთხოვს, ძალას გატანს. შენ-კი და-
 ნა ყელთან რომ გქონდეს მიტანილი, ხელს გა-
 მოგიწვდის საშველად?.. როდის გაუწვდია თა-
 ვის წევრისთვის ძმურად ხელი, გაუმხნევებია
 სასოწარკვეთილი, აღუდგენია სულით დაცემუ-
 ლი? გეყურება? შენ გეკითხები, შენა, რომ სა-
 ზოგადოების ვალს თავს მახვევ!

— სტყუი, საზოგადოება ყოველთვის გლო-
 გობს, როდესაც მის წევრს უბედურება რამ
 ეწევა.

— ხა, ხა, ხა, „გლოვობსო“!.. დიალ,
 გლოვობს, სწუხს, სტირის, მაგრამ, აბა ჩაუ-
 კვირდი, რას წარმოადგენს ეს გლოვა, ტირი-
 ლი, მისი ცრემლი? დაკარგულ წევრს გლოვობს

თუ თავის თავს, დაკარგული წევრისთვის აფრ-
ქვევს ცრემლს თუ თავის თავისთვის? აბა, შენ
იყავ მხოლოდ ადამიანი, უჩინარი, თუ შენ
გიგლოვოს, ცრემლი აფრქვიოს. იმას ჰგონია,
რომ შენის დაკარგვით არა დააკლდება-რა. შენს
უბედურებას ვერც-კი შეიტყობს. თუ მასხარა
ხარ, საზოგადოება გიგლოვს, ცრემლს დააფრ-
ქვევს, რადგანაც მოაკლდება შენი მასხარაობა,
ვეღარ იმხიარულებს შენის მასხარაობით. შენ
გიგლოვს, როგორც მასხარას და არა როგორც
წევრს-ადამიანს. მწერალი ხარ ან სხვა რაიმე
ხარ, რითაც შენ საზოგადოებას ამხიარულებ,
ასარგებლებ, გიგლოვს, რადგანაც შენის უბე-
დურებით აკლდება მას სიამოვნება, სარგებლო-
ბა. შეიგნე, რომ თავის სიამოვნების შემცირე-
ბას გლოვობს და არა დაკარგულ წევრს! მაშ...

„ეპე, რაებს მალაპარაკებ?! რაც ცხადია,
რაც ნათელია, იმას ახსნა, განმარტება უნდა?

„თვით მონა, ყურმოქრილი მონა ძლიე-
რისა ცდილობს დაგიმონავოს, გაგანადგუროს,
სისხლი გაგიშროს, და ამ საზოგადოებისთვის
მირჩევ კიდევ ვიცოცხლო, ვალი გადავუხადო?

„ახ, რომ შემეძლოს მისი ვალის გადახდა?!
მაგრამ არა!.. არა!.. არ მინდა მეც ის საძაგ-
ლობა ჩავიდინო, მოღალატობა, სუსტის განად-

გურება, ძალმომრეობა და ფეხ-ქვეშ დაგება მე არ შემიძლიან. და თუ ასე არ მოიმოქმედე, მაშინ ადგილი არა გაქვს საზოგადოებაში. იმის-თვის მეც...

— კარგი, მაგას თავი დავანებოთ, ვსთქვათ. შენ მართალი ხარ...

— როგორ თუ ვსთქვათ?!: მაშ დარწმუნებული არ ხარ?

— როგორ არა!.. დარწმუნებული ვარ. დავანებოთ თანამედროვე საზოგადოებას თავი. სიძულვილის ლირსია. აბა, ახლა გაიხედ-გამოიხედე: ხედავ, აგერ იქ ზედაძნის საბეროს მთის წვერზედ, ქვევით კიდევ, ჯვარ-პატიოსნისას, მცხეთის ტაძრებს, ნანგრევებს და, აი, შენს გვერდით „ბებრის ციხეს“?! ვერ ხედავ, როგორ გამოკრთიან მთვარის შუქზედ? ნუ-თუ შენს სულს და გულს შენი დიდების მოწმენი არას ეუბნებიან?! განა ყოველივე ეს შენ წინაპართ არ გაგონებს, როდესაც მათი სიცოცხლე დუღდა და გადმოდიოდა ამ მხარეს?! განა....

— კმარა!.. ვხედავ, კარგად ვხედავ ჩვენ წინაპართ დიდებას და იმასაც კარგად ვხედავ, რომ ამ დიდებას ჩვენი გათახსირება, არარაობა მოჰყვა. რას წარმოადგენს ის დიდება, რომელ-

საც შედეგი ასეთი ექმნება? ჩვენი არარაობა იმ ღიღების შემდეგ უფრო მწვავია, უფრო...

— აი სწორედ ამ გათახსირების დროს უნდა ბრძოლა.

— ოხ, მომეც რწმენა მომავლისა და, აი, ამ მთას მეორე ნაპირას გადავდგამ, თავს შევაკლავ...

— მშვენიერ არსებას შეუძლიან მოგანიჭოს რწმენა, გამოგარკვიოს და...

— სსი!.. — მწარედ წაისისინა გაბრომ ამ სიტყვებზედ და დალრეჯით თავი გაიქნ-გამოიქნია.

— რა იყო?

— ნულარას მკითხავ, მომშორდი!

— ვარგი. ყოველისფერში მართალი ხარ. მაგრამ ერთ კითხვაზედაც მიპასუხე: მაგრე რამ გამოგაშტერა?..

— საზიზლარო, მომშორდი, არ გეყურება? ადამიანი უკიდურეს მდგომარეობამდის მისულა და შენ გულ-გრილად მასხარად იგდებ!.. აი მაგ გულცივობამ გამიტეხა გული, გულცივობამ!..

— ნუ-თუ გულშემატკივარი არავინ გყავს, რომ თავს იმეტებ?!.. განა შენის სიკვდილით არავის აატირებ, გულწრფელად ცრემლი არავის არ წამოსცვივა?!.

— წყვილი ცრემლიც რომ გადმოაგდოს ვინმემ გულ-წრფელად, ვფიცავ თუნდ ამ ნან-გრევებს, ამ „დიდების მოწამეთ“, — როგორც შენ მონათლე, — ავიტანდი ყოველგვარ ტანჯვას, ოლონდ თბილი, გამაცოცხლებელი ცრემლი მოხვდეს ჩემს მკერდს და მე შკვდარიც გავ-ცოცხლდები. მაგრამ სადაა, სად?!.. ვეძებდი, მაგრამ...

„მხოლოდ არაგვი ვიპოვე. აი, ვერ ხედავ, თავისკენ მიმიწვევს, მეალერსება... ცრემლები მზადა აქვს... ყველას მკერდს აპკურებს, დააღ-ბობს თბილი, გამაცოცხლებელი ცრემლებით-კი არა, ცივი, მომაკვდინებელით. აი ესე, რო-გორც ჩემ მკერდს...

„აახ!..“

არაგვი ოდნავ შეჩქაფუნდა, შეშოშმინდა და სწრაფ ისევ ისე ჩვეულებრივი დენა დაიწ-ყო; მთა, ლრე, „დიდების მოწამენი“ ისევ ისე გულ-გრილად, ცივად გადმოსცეკროდნენ პა-ტარა კლდეს, რომელიც უკვე განთავისუფლე-ბულიყო ზედ მოთავსებულ გაბროსაგან, და მთვარე ხომ...

ბულბულიც ისევ აღგზნებით ჰყეფდა „ტია-ტიასა.“



„რა ზიმბლით მიუქერის!“

(ეტიუდი)

I

ცხელა, საშინლად ცხელა. ჯერ თორმეტი საათიც არ არის და კაცს გარედ აღარ გამოესვლება. ამისდა მიუხედავად მაინც ტფილისის მტვრიან ქუჩებში მოძრაობა არ შეწყვეტილა. აგერ, გაქაფებული ცხენები ეტლს. მიაგრიალებენ და შიგ მჯდომი-კი ქოლგას ეფარება. მეჯაგვე ცხენს გვერდით მოსდგომია და რაც ძალი და ლონე აქვს უფაპუნებს, მაგრამ ცხენი ადგილი-დგან არ იძვრის. ველარას ხედავს. ცხენსაც და პატრონსაც ლვართქლი ჩამოსდით.

— კუდზედ უკბინე, კუდზედ? — გაეხუმრა კინტო და ხმა-მალლა ყვირილი მორთო: — კიტრი, კიტრი, შუშა კიტრი... პა, პა, პა... რა გრილი კიტრია... ლმერთმანი, კოხტა ვირის მოტანილია... აბა, აქეთ, კიტრი, კიტრი...

— აი, შენი... — აღარ დაათავა მეჯაგვემ-სიტყვა, შოლტის ტარი მოაბრუნა და ბრაზ-

მორეულმა ისე მაგრა დაარტყა ცხენს, რომ
შოლტის ტარი შუაზედ გადატყდა.

ცხენმა უეცრივ გაიწია, მაგრამ ჯაგვა მხო-
ლოდ ააჭრიჭინა და ადგილიდგან-კი ვერ და-
ძრა. ცხენს დაჭიმული კუნთები მოუდუნდა,
თრთოლამ აიტანა და უეცრად მუხლები მოეკეცა.

— წკრრრ.—ააწკრიალეს ტრამვაის ზარი
და მხარ-თეძოზედ წამოწოლილ ცხენს ვაგონი
გვერდით აუსლიკინდა...

— აი, შე...—ყვირილით გადმოვარდა ვა-
გონიდგან ერთი ჩასუქებული კაცი და მეჯავვეს
ჟელში სწვდა.—გოროდოვოი!..—ყვიროდა ჩა-
სუქებული კაცი და თან მეჯავვეს ანჯლრევდა.

იმის ყვირილზედ ასასიც მოვიდა და წინ
გამოეჭიმა.

— ოქმი, ოქმი!.. ეხლავე ოქმი უნდა შე-
ვადგინოთ ამ საზიზლარზედ, რომ ასე სტანჯავს
ცხოველს! იმოდენა ტვირთს უდებს, რომ...

— შევადგინოთ, თქვენო კეთილშობილე-
ბავ, შევადგინოთ!..—გულწრფელად ეუბნება
ასასი.

— შენ იცი, მე ვინა ვარ?..

— ვიცი, თქვენო კეთილშობილებავ...
თქვენ ცხოველთა მფარველი საზოგადოების წევრი
ბრძანდებით...

— პო და... ოქმი!..

მეჯაგვეს გამოაშვებინეს ცხენი, ტვირთი გაუნახევრეს და შემდეგ გამგზავრების ნება მისცეს.

— რა კეთილი კაცი ყოფილა!.. — გულის სილრმიდგან ამოსკდა გიგლას, რომელიც აგერ კედელს აყუდებია და ამ სურათს თავიდგანვე თვალ-ყურს აღევნებს.

ეს სამი დღეა ტფილისში ჩამოვიდა გიგლა სამუშაოდ, მაგრამ ჯერაც ცის ქვეშ ათენებს და ალამებს. რამდენიმე პური ჩამოჰყვა თან, ის გუშინ დილითვე შემოელია. მას შემდეგ გემოდ არა უნახავს-რა. ნაცნობი არავინ. ვის მიმართოს?.. არ იცის. საცა სამუშაო იკითხა, ყველგან უარი უთხრეს. შინ დაბრუნდეს?.. მერე რა გააკეთოს? ხომ იმისთვის წამოვიდა, რომ სახლში საქმე არა ჰქონდა?!.. ყანები მოუცდა, იქ ახლომახლო სოფლებშიაც მოსცდა მოსავალი. ორმოცარიელი და ფქვილის გოდორი ხომ დიდი ხანია ვამოებერტყა. რამ უნდა დაიოუკს ამოდენა ჯალაბობაო, — იფიქრა შინ და ქალაქში ჩამოსვლა არჩია ერთი ორი გროშის საშოვრად. „ესაც ქალაქი!..“ — წამოიძახა გიგლამ ორი დღის სიარულის შემდეგ, ტფილისს რომ მოაჟღა და უეცრად მძიმე სუნმა სუნთქვა შეუხუთა. „ესაც

ქალაქი!..“—იმეორებს ამ სიტყვებს ეს საში
 დღეა, და კუჭი უკაკანებს. ეს ოხერი, მცვალი
 რალის გადაეკიდა?!.. რიგიანად ვეღარ უსუნ-
 თქავს, გვერდში ისე მაგრად სჩევლეტავს. თი-
 თქოს სიცხეც თან-და-თან უმატებს, მაგრამ რა
 სიცხე, „მზე მახურებსო“, — ინუგეშებს თავს გი-
 გლა. წყალი-კი უხვად აქვს. იქავე ახლოს მი-
 ლის წყალს იღებენ კოდებში. ისიც ყოველ ხუ-
 თი წუთის განმავლობაში წყალს ეწაფება...

— შენი ჭირიმე, ბატონო!.. — ნაბდის ქუ-
 დი მოიხადა და ძალ-დატანებით მიმართა ჩასუ-
 ქებულ „ცხოველთა მფარველი საზოგადოების“
 წევრს, როდესაც ის გიგლასკენ მოტრიალდა.

— რა გინდა?.. — მკვახედ დაეკითხა ჩასუქე-
 ბული წევრი და ცოტა ხანს შესდგა გიგლას
 წინ.

გიგლას ენა დაება. რა უნდოდა?.. ეხლა
 გიგლამ აღარ იცოდა. აგერ მეორე დღეა ესე
 წვალობს, უნდა ითხოვოს, მოწყალება მაინც
 სთხოვოს ვისმე, მაგრამ ყოველ ხელის გაწვდა-
 ზედ უცბად ედუნება მკლავები, ენა უდამბლავ-
 დება და მისი განზრახვა ისევ განზრახვად რჩე-
 ბა. ვერა ბედავს. „სირცხვილიაო“, ამბობს და
 ადამიანისადმი მისამართ თხოვნას ზეცისკენ გზა-
 ვნის. იმისი არა რცხვენიან.

ეხლაც მხოლოდ ჩასუქებულს მიმართა იმი-
სთვის, რომ მისმა საქციელმა აღტაცებაში მოი-
ყვანა, მაგრამ ჩასუქებულის მკვანე კითხვამ და-
ამუნჯა.

— რა გინდა?... — გაუმეორა ჩასუქებულმა
იმავე კილოთი კითხვა და თავით-ფეხებამდის
აათვალიერ-ჩაათვალიერა.

მიწა რომ გახეთქილიყო, ის ერჩივნა გი-
გლას, ვიდრე ამ კაცის წინ ქუდ-მოხდილი დგომა.

— მე.... სამუშაოდ ჩამოვედი. ვერა ვი-
შოვე-რა.... არაფერი მაქვს... მჭვალიც....

— ჰომო!... ჩაიარე!... — ზიზღით უთხრა ჩა-
სუქებულმა და ბურტყუნით მნარი აუქცია.

— ჰმ!... — ჩაიცინა და მწარე ლიმი ტუჩე-
ბზედ აუთამაშდა.

ტყვიასავით მოჰკვდა ჩასუქებულის სიტყვა
გიგლას და მუხლები დაუდამბლავდა, მუხლე-
ბის თახთახით იქვე ჩაჯდა და შუბლზე ჭი-
რის ოფლი მოიწმინდა...

— რადა ვთხოვე, რადა?! — თავის ქნევით
და მწარის ლიმილით ეკითხებოდა თავის თავს
და ჰკიცხავდა თავის საქციელს...

— ვა, რა გზაში ჩაგდებულხარ?!... — ფე-
ხის წამოკვერით ზედ გადაალაჯა ერთმა კინტომ
და დაიყვირა: — მწვანილი, მწვანილი!...

ხმის ამოუღებლად წამოდგა გიგლა. ქალა-
 ქის იმედი გადაუწყდა. არჩია ისევ სოფლად
 წასვლა. იქნება აქეთ სოფლებში ვიშოვო რა-
 იმე სამუშაოო, გაიფიქრა და ვერის გზას ლა-
 სლასით გაუდგა.

მზე-კი უხვად უგზავნიდა სხივებს, თავს
 დასტრიალებდა ქალაქს და სულდგმულთ ტვინს
 უდუღებდა.

II

— ლმერთო, ან მომკალი და ან კიდევ ერ-
 თი ცვარი წყალი ჩამაყლაპე!.. — პირ-გამომშრა-
 ლმა წამოიძახა და ანთებული თვალები ზეცას
 მიაჰყრო.

გიგლას უნდა წამოდგომა, მაგრამ სხეული
 ოლარ ემორჩილება. იცის, რომ სულ ორი ვერ-
 სი არ იქნება მტკვრამდის; იცის, კარგად იცის
 და იგერ პირდაპირ მტკვარსაც ხედავს, ბუნდად
 ხედავს და წყურვილიც უათკეცდება. სწყევლის
 თავის თავს, რომ მტკვარს დაშორდა და ხელ-
 მარცხნივ სოფელს თვალი მოჰკრა და იქით გაე-
 შურა. იქნება იქ მაინც ჩქარა მივიდე და ცო-
 ტათი სული მოვიბრუნოვო, გაიფიქრა, მაგრამ
 იქამდის ვეღარ მიაღწია და ამ ხესთანაც ძლივს

მოვიდა. მზის სხივებს ვეღარ გაუძლო და აქ
ჩრდილოში წამოწვა...

მკვალი?!.

მკვალს ვინდა ნაღვლობს, თუმცა სუნთ-
ქვას უხუთავს, რომ წყალი, ერთი ცვარი წყა-
ლი ჰქონდეს!..

— ღმერთო!... — წამოიძახა სასოწარკვეთი-
ლებით და უნდოდა თავისი თხოვნა გაემეორე-
ბინა, მაგრამ მოაგონდა, რომ რამდენჯერმე მი-
მართა და მისი სიტყვები უპასუხოდ რჩებოდნენ.
ლმობიერებით აღვსილი თვალები მოუკრიალ-
დნენ და სწრაფ უნუგეშობით აღივსნენ. გიგ-
ლამ არე-მარეს-ლა გადაავლო თვალი და, დახე
მის განცვიფრებას, მზის სხივები ვეღარ დაინა-
ხა. საჩქაროდ ცას შეხედა. ნუ თუ შეისმინა იმისი
ვედრება?!.. ცა წაფერფლილა! მის სიხარულს არა
აქვს საზღვარი. „ღმერთო, ღმერთო!..“ იძა-
ხის სიხარულით გიგლა და პატიებას შესთხოვს
ეხლა ღმერთს, თავის უნუგეშობით თუ აწყე-
ნინა...

ცა იქუშება, ცა ინაბდება. ჩამობნელდა.
სუნთქვა გაძნელდა. განრისხებული ცა ბრძო-
ლის სამზადისშია და თითქოს ფიქრობს ისეთი
რამე ჩაიდინოს, რომ უეცარის თავის მოქმედე-
ბით ქვეყანას თავ-ზარი დასცეს.

თუმცა ძნელი იყო გიგლასთვის წამოწევა, მაგრამ მაინც წამოიჩოქა, გვერდით ხის ძირს მიეყრდნო. ტკბილმა, ტკბილმა უფლისადმი სასოებამ შეიპყრო და, მთლად სასოებად გარდა-
ქმნილი, მადლობის ჰიმნის წარმოსათქმელად მოემზადა მისი არსება...

ერთი კიდიდგან მეორემდის ცაზე ცეცხლის ხაზი გადიკლაკნა და ამ გარემოებამ გონება მი-
სი თან გაიყოლა. ვეღარ მოასწრო სიტყვის წარმოთქმა.

ელვას თან მოჰყვა საშინელი ცის ხმაურო-
ბა. ყველა შეძრწუნდა, ვისაც-კი ოდნავ შეუ-
ძლიან შეძრწუნება, და თვით დედამიწაც შეფი-
ქრიანდა...

III

— გული გამისივდა!.. — წამოილაპარაკა თა-
ვისთვის ტფილისისკენ მიმავალმა ბაყალმა და
ჩოხის კალთები შემოინაოჭა, შეათამაშა და მარ-
ცხენა მხარზედ გადაიფინა. — მეგონა, — განა-
გრძო, — წარლვნა იქნება მეთქი და თურმე-კი... ამ
ცასაც როგორი მასხარაობა სკოდნია, „პუსტო

ტრევოგა” ჰქონია!.. დედამიწა არც-კი დაასვე-
ლა. ერთი ბეჭოდ წამონამა. აბა ერთი ე ცას
შეხედე, რა უეცრივ მოკრიალდა... ჰმ!...—
ჩაიცინა ბაყალმა და, თითქოს ვერა გაუგია-
რაო და თან კიდევაც არ უნდა ამაში გამო-
ტყდესო, ისე გაღააქნივ-გადმოაქნია თავი. ამა-
ვე დროს შესდგა და მიიხედ-მოიხედა....
— ვააა!.. დიდება შენთვის ღმერთო!— განცვი-
ფრებით ხუთი თითით პირჯვარი გადიწერა და
ურუოლით განაგრძო:— რაზე მე დამეცემო-
დაა!... ამოდენა ხე შუაზე გაუხეთქია და მე
რალას მიზამდა?!.. მგონი... ჰო, მართლა, მე-
ხის ნატეხი კარგიაო, ამბობენ. მოდი ვნახამ,
იქნება, ვიპოვო...— სთქვა ბაყალმა და ხესთან
მივიდა.

— ე, შე ცინგლიანო, შენ კიდევაც გი-
პოვია მეხის ნატეხი,— წამოიძახა, როდესაც ხის
ქვეშ მიმჯდარ გლეხს თვალი მოჰკრა.

— ძმობილო!— წამოუარა წინ და დაუძახა,
მაგრამ უეცრად ბაყალს ფერი ეცვალა.

ხის ძირში მიმჯდარი გლეხი ქანდაკებასა-
ვით გაშეშებულიყო.

ბაყალმა ერთი კიდევ შეხედა, შიშმა აი-
ტანა და გლეხის სახის გამომეტყველებას ვე-
ლარ გაუძლო.

მხოლოდ ზიზღი, ზიზღი და ზიზღი შეგეძლოთ ამოგეკითხათ გლეხის ოდნავ გახელილ თვალებში და მოლიმარ ტუჩებში....

— ვა, რა ზიზღით მიცემის?!.— წამოიძახა ბაყალმა კანკალით და რაც ძალი და ღონე ჰქონდა ტფილისისკენ გაჰკურცხლა...

„ვ ც ხოვ რობთ!..“

I

— ჩხირი კედელს, ჩხირი კედელს! — წა-
 მოიძახა გულ-წრფელის სიმხიარულით ერთმა
 ჩემმა კარგმა ნაცნობმა, როდესაც მე და ვანო
 ცხენებით კარს მივადექით, და საჩქაროდ აივ-
 ნიდან კიბის საფეხურები ჩამოთვალა.

— ძლივას არ იკადრე ჩემი ქოხი და მო-
 ხვედი! — ამ სიტყვებით მარცხენა ხელი ცხენს
 სადავეში წაავლო და მარჯვენა-კი მე გამომი-
 წოდა.

— ჩამოხტი, რაღას უყურებდე?! — შემომძახა.

— მეჩქარება, ფეხად მინდა გავბრუნდე, —
 გავეხუმრე და ცხენის გაბრუნება დავაპირე.

— შენ არ მოუკვდე შაქროს, რომ იმან
 დღეს აქედან არ გაგიშვას! — ბიჭო, ბიჭო, სად
 ჯანაბას დაიკარგე?! — მიტრიალდა და ბიჭს ძა-
 ხილი დაუწყო. ამ დროს ცხენის სადავეს-კი
 ხელს არ უშვებდა.

— გაგეხუმრე, თორემ ჯოხითაც რომ გა-
 გდება დამიპირო, მაინც აქედან არსად წავალ, —

ვუპასუხე სიცილით და საჩქაროდ ცხენიდან ჩამოვხტი.

ვანოსაც უკვე გაეთავისუფლებინა ცხენი, მათრახის ტარს ნალის ყელს უბარტყუნებდა და ძირს ჩაიცქირებოდა.

— მართლა, შაქრო, ე კაცს-კი ვერ იცნობ, რო ყურადღებას არ აქცევ?! — მივუთითე ვანოზედ, თვალი რომ მოვკარი.

— შენზე ადრე ვანო გავიცანი, — მკვანედ მიპასუხა და ბოდიშის მოხდით ვანოს ხელი ჩამოართვა.

შაქროს ყვირილზედ ბიჭი ჩოხის-ძველით გამოვიდა ძირის სახლიდან შმუშნით და ცხენები ჩამოვკართვა. ჩვენ-კი შაქროს წინამძლოლობით კიბეს შევუდექით და საფეხურების ჭრიჭინით და წრიპინით ჩქარა აივანზე მოვექეცით. აივანმაც აგრეთვე ჭრიჭინ-წრიპინით მიგვილო. შაქრო თავისებური ხმაურობით ოთახში შევიდა, ჩვენ-კი აივნის მოაჯირს მივეყრდენით და, ჩვენდა უნებურად, აივნის პირდაპირ ამართულმა კლდემ თვალი მოგვტაცა.

— რა კაი სანახავი რამ არის! — აღტაცებით წამოიძახა ვანომ და გაჩუმდა.

მეც ეგევე უნდა მეთქვა, მაგრამ იმან დამასწრო.

მართლაც, კედელივით ჩამოლესილი კლდე, უზარმაზარი კლდე, რომლის წვერიც ტყითა და მოლით იყო შემოსილი, საუცხოვო სანახავს წარმოადგენდა. შიგ ძირში კიდევ არაგვის ყვირილი ხომ სულ ამშვენებდა.

— პოეტნი ყოფილან ჩვენი წინაპარნი, რომ ამისთანა მშვენიერ ადგილას ეკლესია აუშენებიათ! აგერ, ვერ ხედავ, აი, იმ ხის იქით, კლდის კალთაზედ ეკლესიას? აგერ გამოქვაბულებიც! უთუოდ საბერო იქნებოდა.— ჩაილაპარაკა ვანომ ცოტა ხნის შემდევ.

— არც ეხლანდელი ჩვენი გლეხები ყოფილან ნაკლები. ვერ ხედავ, იქავე ახლოს, ველზედ, როგორ მოთავსებულა პატარა სოფელი?— ვუპასუხე მე და ხელით ტყეში გამნასკულ გლეხის სახლებზე მივუთითე.

— ღმერთმანი, შალვა!— მომიბრუნდა ვანო და თვალებში შემომაჩერდა:— აღტაცებაში მოვდივარ, როდესაც ამისთანა სურათს ვხედავ და მთლად მადლობად გარდვიქმნები ხოლმე ჩვენი წინაპრებისადმი. მინდა მუსლის თავებზედ დავეცე და თაყვანი ვცე იმათ, რომ ეს მშვენიერება, ეს დიდება ჩვენვე გადმოგვცეს.

— უკაცრავად, უკაცრავად!— გამოვიდა ამ დროს შაქრო და ლაპარაკი შეგვაწყვეტანა:

— თავი მიგანებეთ, მაპატივეთ! ჩემი კნეინა კოტა შეუძლოდ არის და მე ვდიასახლისობ. უთუოდ გეშიებათ?

— არც უმაგისობაა, — ვუპასუხე მე: — ამ მშვენიერმა ბუნებამ მშვენიერი მადა მომვარა.

— ვაი, გამიწყრა ღმერთი!.. მაშ რითლი დაგაძლოთ?

— მე ჩემი მხრით, — მიუბრუნდა ვანო შაქროს: — პირობას გაძლევ, ერთი გოჭისა და ნახევარ ინდოურის მეტს არ შევჭამ.

— სვავი ხარ, შე ოჯახქორო, თუ რა?!

— დალევით-კი თუნგ-ნახევარზედ მეტს ვერ დავლევ.

— ღმერთი გამიწყრეს, ვანო, თუ თუნგ-ნახევარზედ მეტი ლვინო მქონდეს!

— მაშ, ჩემო შაქრო, სხვა მასპინძლის მოძებნა დამჭირდება! — ვუთხარი მე და ხელი გავუწოდე: — რაც ვანომა სთქვა, ორი მაგდენი მე დამჭირდება.

— ოი, ჩაგექცეთ მუცლები!.. თქვე ოჯახ-ქორებო, წინად მაინც შემატყობინებდით, რომ მომემზადებინა რამ. აბა, ახლა რა თავში ქვა ვიცე?

— არა უშავს-რა, შენ ვანო დაიტოვე, მე-კი ჩემ თავს მოვუვლი.

— ჰაი, დედასა!.. მაშ შაქრო მოგიკვდეს,
თუ ლვინოში არ ჩაგახრჩოთ!

— დახრჩობა რომ მინდოდეს, აგერ არა-
გვი აქ არ არის!.. ჩვენ მხოლოდ ლვინის და-
ლევა გვინდა, — ვუპასუხე მე და ისევ ჩვენ პირ-
დაპირ კლდეს მივუბრუნდი.

— მოგწონს, შალვა, ეგ ადგილი?! ამას
წინად ერთი ფრანგი მეწვია და კინაღამ გადი-
რია, ისე მოეწონა.

— მე ფრანგი არა ვარ, მაგრამ მეც ლა-
მის არის გადამრიოს.

— საქართველოს ყველა კუთხეები რომ
დაიარო, ამისთანა სიმშვენიერეს ვერსად ნახავ!..

— მაგას ნუ იტყვი, ჩემო შაქრო! მე და-
მივლია ქართლი, კახეთი, იმერეთი და ამ არა-
გვის ხეობას ხომ ჩემ ხუთ თითხავით ვიც-
ნობ და, სწორედ გითხრა, დაბეჯითებით ვერ
გიპასუხებ, რომელი უფრო მშვენიერია. ყველ-
გან არის საუცხოვო ბუნების სიღიადენი, ყვე-
ლას თავისებური სიმშვენიერე აქვს და არ
იცი, უპირატესობა რომელს მისცე. ის გხიბ-
ლავს, გიმონავებს, რომლის წინაც სდგეხარ და
შესცემერი და გავიწყებს დანარჩენებს.

— ეგ ტყუილია. ამისთანა მშვენიერება
არსად არის! ეს თითონ ფრანგმა ალიარა...

— ფრანგმა ეგ/ალიარა, მე კიდევ რაც გითხარ, იმას აღვიარებ. ეხლა შენ იცი, რომელსაც ამოირჩევ, — ცოტა დაცინვის კილოთი ვუთხარი და აივნიდგან გადავავლე თვალი კარმიდამოს.

სათონე, ბოსელი, ბაკი, ბოსტანი, ურემი, შეშა სულ ერთმანეთში იყო არეული. ჩვეულებრივი, ქართველური უწეს-რიგობა ეტყობოდა ყოველსავე ამას.

შაქრომ და ვანომ მგონი საქართველოს ბუნების სიმშევნიერებები განაგრძეს ბაასი. არა გამიგია-რა. მე-კი შაქროს კარმიდამოს დათვალიერების დროს, ჩემდა უნებურად, წარმომიდგა თვალ-წინ ჩემი, ჩემს მოგონებასთან შესისხლ-ხორცებული, კარმიდამო. ცხადად ვხედავდი ასეთსავე კარმიდამოს, ასეთსავე ალუფხულს, როგორც შაქროსი იყო, და შიგ კიდევ მოთამაშე, მოხითხითე და-ძმათ. ახ, რა ნეტარი, გულ-წრფელი სიცილი მომესმა!. არავითარი ზადი მას არ ეტყობოდა. პატარა შალვა ემასხარებოდა თავის დას.

სურათი სურათით იცვლებოდა. მომქმედ პირებად და-ძმანი იყვნენ. ვხედავდი იმათ, ხან ცეცხლის მფრქვეველთ, ხან მთლად სიყვარულად გარდაქმნილთ, ხან კიდევ რწმენით ალ-კურვილთ და კიდევ სასოწარკვეთილთ.

მთლად წინ გადამეშალა პატარა შალვას წარსული და ვხედავდი, როგორ თან-და-თან იმედი იმედზედ უცრუვდებოდა, როგორ თან-და-თან ეჭვი ეპარებოდა, სახე ელარვოდა და ბოლოს მომიახლოვდა, შაქროს კარ-მიდამო შე-მოლახა, აივანი ააჭრიალა და მთლად განადგუ-რებული უეცრივ შემომიერთდა.

— ფუუ! — გველსავით დავიკლაკნე ამის შემდეგ და უეცრივ მოვტრიალდი, თითქოს მინდოდა ის შალვა განმედევნა, რომ იმედი, ძა-ლა ჩემთან შემოერთებით ცოტად კიდევ მბუ-ტავი სულ არ ჩაჰქრობოდა.

— გეყოფა ამ სიმშვენიერის კვრეტა! ეხ-ლა დროა ჩვენი მოვალეობის ალსრულებას შევუდგეთ! — მიტრიალების უმაღლ მკლავში ჩა-მავლო ხელი შაქრომ და ოთახისკენ გამ-წია.

— ჰა!.. რა მოვალეობისა? .. დაბნევით შე-ვეკითხე.

— რა მოვალეობისა და... რასაც კუჭი გვავალებს. სანამ შენ ამ სიმშვენიერით სტკბე-ბოდი, მე და ვანომ სადილი მოვამზადეთ.

— ჰოო! .. — არ ვიცი კია რად წამოვიძახე „ჰოო“ და ოთახში შევყევი. ვანო და ერთი უცნობი გლეხი უკვე მოსხდომოდნენ გაშლილ

სუფრას, გლეხი ჩემ შესვლაზედ ფეხზე წამოდგა
და მომექსალმა.

— იცი, შალვა, ეს განგებ მოვიპატიუე,
მშვენიერი სიმღერა იცის.

— ერთმა რა უნდა გააწყოს? ერთს ორი
კიდევ სხვა უნდა, ვუპასუხე მე.

— აქ არა ვართ?.. — წამოიძახა შაქრომ.

— ჩემი იმედი-კი ტყუილად გქონია და
ვანოსი-კი არა ვიცი-რა.

— ცოტათი შენ ამოიღებ ხმას, ცოტათი
მე, ცოტათი კიდევ ვანო და ამით საქმეს წინ
წავწევთ.

— აკი გეუბნები, ჩემი იმედი ტყუილად
გაქვს. მე რომ ხმა ამოვიღო, მაშინ ან თქვენ
გახვალთ გარედ და ან კიდევ მე.

— აგერ შაქროს წითელი ლვინო იგემე
და მერე ნახავ, რა ხმაც მოგივა. — წაილაპარა-
კა გლეხმა და ულვაშებში ჩაიცინა.

— ჰა, ჰა, დაიწყე, „ხორველის ანგელო-
ზო?!“ — სიცილით ჰკითხა შაქრომ.

მალვით შევხედე ჩემ პირ-და-პირ მდგომ
გლეხს, ავათვალიერ-ჩავათვალიერე და მთლად
კითხვის ნიშნად გარდვიქეცი. ცოტა მაღალი
შუბლი, კლასიკური ცხვირი, დიდრონი გონივ-
რული თვალები და ჭალარა თმა და წვერი ამ-

შვენებდნენ გლეხის სახეს. ამას ნამდვილი ან-
გელოზი უფრო უნდა უწოდონ, ვიდრე ხორ-
ველისა, — გავიფიქრე ჩემდა უნებურად და პუ-
რის ჭამას შევუდექი.

პირველში მოწყენილი სუთრა თან-და-თან
გამხიარულდა. მართლა და შაქროს მშვენიერი
გემოს წითელმა ღვინომ ზედგავლენა იქონია.
ყველას გული სასიამოვნო გრძნობით აავსო და,
რასაკვირველია, შესაფერი ხმები გამოაცემინა.
მე-კი, ლეთის წინაშე, ვშიშობდი ხმის ამოლებას,
რაღანაც ჩემი ხმა ჩემ გრძნობებთან შემომწყრა-
ლია. რაც უნდა სპეტაკი, დიალი გრძნობით
ვიყო გამსკვალული, მაინც ჩემი ხმა შესაფერად
არ მოეწყობა. თუ ხმა ამოვილე, მაშინვე მსმე-
ნელმა, თუ პირ-და-პირ არ წამოიძახა: „რას
ყროყინებსო“, გაიფიქრებს მაინც. ამას გაიფიქ-
რებს და, აბა, ყროყინით-კი შენი გრძნობის
სინაზეს როგორ გამოსთქვამ?!.

სუფრული, მრავალ ჟამიერ და მრავალი
სხვა არაგვისპირული სიმღერები საუცხოვოდ
შეასრულა „ხორველის ანგელოზმა“ თავის ნა-
ზი ტკბილი ხმით. შაქრო და ვანოც კარგად
უწყობდნენ ხელს. ბოლოს ჩაახველა, ხმა ამოიწ-
მინდა „ხორველის ანგელოზმა“ და „მთაო, გად-
მიშვი, გადმიშვი...“ ტკბილად, გრძნობით აღ-

სავსე ხმით ნიავივით შემოგვეპარა და უეცრივ
 მთლად შემბოჭა, შემიპყრო. ვანო და შაქრო
 • დაბალ, სულ დაბალ, უჩინარ ბანს ეუბნებოდნენ
 და უერთებდნენ „ხორველის ანგელოზის“ ხმას.
 ახ, რა ტკბილი და ამასთან მწვავი, ჯოჯოხეთის
 ცეცხლი ამენთო გულში?!

ის მღეროდა გულ-ამოსკვნით, გულ-ამოს-
 კვნით ევედრებოდა მთას, რომ გადეყარა ნის-
 ლი, გზა გადაეწმინდა, რომ მთის რქით გადასუ-
 ლიყო და დაენახა თავისი სატრფო, რომელიც
 სხვის მკერდს დაჰკროდა. მეც ამავე დროს ვე-
 ვედრებოდი ზეცას, განგებას, ბუნებას, ვევედ-
 რებოდი გულ-ამოსკვნით, რომ მთლად გრძნო-
 ბად, სიყვარულად გარდავქმნილიყავ და შევერ-
 თებულიყავ ჰაერს, რომ გადამელახა მთა, ღრე,
 ტყე და ველი; ყველა გამეთბო, მკვდრეთით
 ალმედგინა და მის გულსაც შევხებოდი. იქნება
 გაციებული, გაყინული გული მაშინ მაინც
 გალხვოდა და...

მაგრამ ვხედავდი: ზეცა, განგება, ბუნება
 დამუნჯებულიყო, გული გაყინვოდათ ისე,
 როგორც იმას და ჩემ მხურვალე ვედრებას,
 სასოწარკვეთილებას ყურადღებას არ აქცევდნენ.
 ვხედავდი ჩემს უძლურებას, სიმჩატეს და ჩემი
 თავი მევე შემეზიზლა, გაცავამტვერე და... ნიავი-

ვით მისუსტდა, მისწყდა „ხორველის ანგელოზის“ ხმა და მასთან მობანეებისაც.

— ჰოო, გიშვერელი ღმერთმა, ჩემო „ხორველის ანგელოზო“! — წამოიძახა შაქრომ და ჭიჭები შეავსო.

შაქროს სიტყვებმა გამომარკვიეს. მეწყინა, რომ შაქრო ამისთანა მომღერალს და მშვენიერი სახის აღამიანს „ხორველის ანგელოზს“ ეძახდა.

— თუ ძმა ხარ, შაქრო, — მივუპრუნდი იმას და ნალვლიანი ხმით მივმართე: — აბა, რა საკადრისია, ამისთანა აღამიანს „ხორველის ანგელოზს“ უწოდებ?!?

— ხა, ხა, ხა!... — პასუხად გულწრფელი ხარხარი მომახალი პირში და განაგრძო: — ჩემი რა ბრალია, კაცო, როცა თავის თავს თითონვე „ხორველის ანგელოზს“ უწოდებს?!

დაგვიანებულმა სადილმა დიდხანს გასტანა. ბიჭმა რომ სანთლები შემოიტანა, მაშინ-ლა მივაჭიე ყურადღება, რომ შებინდებულიყო და სუფრას ძლიერს-ლა ვარჩევდი.

— დროა სადილი გავათავოთ! — წამოვიძახე და ადგომა დავაპირე.

— მოიცა, თუ ღმერთი გწამს, რა დროს ადგომაა! ჯერ, აი, სიმონას ვაამბობინოო, რო-

გორ დაერქვა „ხორველის ანგელოზი“. სიმონა! მიუბრუნდა ახლა სიმონას: — ერთი ამათ უამბე შენი თავგადასავალი!..

— შენ თითონ უამბე, ხომ იცი, — უპასუხა სიმონამ და თამბაქოთი ჩიბუხს ტენა დაუწყო.

— არა, სიმონ, შენ კარგად მოჰყვები ხოლმე.

მე ძალიან მინდოდა გამეგო, თუ რად დაერქვა „ხორველის ანგელოზი“ ამ სიმპათიურ ადამიანს და ამისათვის მეც ჩემის მხრით ვთხოვე.

II

სიმონამაც აღარ გაგვამეორებინა თხოვნა. ჩიბუხი სანთლით გააჩალა, რამდენჯერმე ტუჩები შეაწყაპუნა, ბლომად კომლი გამოუშვა და ჩახველების შემდეგ გულიანად ჩაიცინა.

იმის გულიან ჩაცინებაზედ ჩვენ ყველას გაგველიმა, ისე გადამდები იყო იმისი ჩაცინება, და მთლად სმენად გარდვიქმენით, როდესაც სიმონამ ჩაცინების შემდეგ დაიწყო:

— ხორველობა ხომ გახსოვთ?.. აი, სულ ოთხი-ხუთი წლის წინად. ჰო და... მაშინ ჩვენ სოფელშიაც გახდა ერთი ავად. ისეთი ზარი ჰქონდა იმ ოხერს, ხორველითაც რომ არ ყოფილი-

ყვნენ ავად, მაინც იკრუნჩხებოდნენ. ჰო... ისიც დაიკრუნჩხა. „ხორველა, ხორველა!...“ — გამვლელი და გამომვლელი ყველა იმასლა გაიძახდა. როგორც ეხლა, მაშინაც ნაცვლად ვიყავი. „აბა, ლეპორტიო!“ მომაძახეს და მეც მაშინვე შაქროსკენ გამოვსწიო. „წრიპ-წრიპ-წრიპ!“ ააწრიპინა იმანაც კალამი და თან მეკითხება:— რამდენი ავადმყოფი დავნიშნოვო. „ერთია ჯერ ავად და მაშ ხუთი დასწერე, იქნება დოხტური უფრო ჩქარა მოგვაშველონ მეთქი.“ — ვუპასუხე მე. ამანაც კიდევ ცოტახანს აწრიპინა და ხელში აჭრელებული „ლეპორტი“ მომაჩეხა. მეც ავაჭრელე, ვთხლიშე ბეჭედი და...

„აბა, სიმონა, შენ იცი როგორც მალე გავგზავნი ამ ლეპორტსაო,“ — მეხვეწებოდა ფერმიხლილი შაქრო.

— ხა, ხა, ხა... მაგოდენა კაცს მაგრე როგორ შეგეშინდა? — ხარხარით სიტყვა გააწყვეტინა ვანომ სიმონას და შაქროს შეეკითხა.

— რას ამბობ, კაცო, ხორველის გაგონენებაზე დავთრები სულ დამეფანტა?! — ლრეჭით უპასუა შაქრომ.

— მერე, სიმონი?. — დავეკითხე სიმონას.

— მერე და... — განაგრძო სიმონამ: — იმ დღეს არაფერი. იმ ღამეს კი... ხი... ხი... ხი!...

ვხედავ ამ ხალხს, როგორ ფეხ-აკრეფით საით-კენლაც მიეშურება. ჩურჩულით ფეხ-შიშველა დედაკაცები, ამათ კიდევ ხევსურის ჯორები-ვით დატვირთული კაცები მისდევენ. თუ ვინმე ხმა-მაღლივ დაიწყებდა ლაპარაკს გზა-და-გზა „სუუუ!“ — მაშინვე პირზედ ხელს მიაფარებდნენ, თითქოს ეშინოდათ, ხორველამ არ გაგვიგოს და უკან არ დაგვედევნოსო.

„მეორე დღეს, ვხედავ, ჩემს მეტი ძე ხო-რციელი სოფელში არ მოიპოვება. ის ხორვე-ლიანიც-კი გაპარულა. დავიარე მოელი სოფე-ლი და ვერავინ ვიპოვე: ძალლებისა, კატებისა, ქათმებისა და სხვა ცხოველების მეტი ვერავინა ვპოვე. „რა ვქნა-მეთქი?“ დავეკითხე ჩემ თავს და მეც გაპარვა დავაპირე...“

— ვის უნდა გაპპარიყავ, კაცო? — სიცი-ლით დაეკითხა ვანო.

— ხი, ხი, ხი!.. რა ვიცი ვის? ძალლებს თუ? — გულიანის ხარხარით უპასუხა სიმონამ.

„მაგრამ ვთქვი: მოხელე ვარ, ლეპორტი გა-ვგზავნე და მეც რო გავიქცე, მაშინ, რო მო-ვიდეს ვინმე, ვინლა დაუხვდება? ავიღე და დარ-ჩენა ვარჩიე. იმისთვის უფრო ვარჩიე, რომ ხო-რველიანიც გაქცეულიყო და მაშ რისლა უნდა მშინებოდა.“

„დავრჩი მარტოდ მე სოფელში და კიდევ
ოთხფეხნი და შინაური ფრინველნი. პირველ
დღეს არაფერი. მეორე დღეს-კი შევუდექი საქ-
მეს. ამოდენა ქათამი, ბატი, ინდოური სულ აქ
გაეშოთ. ვითიქრე: მაინც ტურა და მელა და-
სჭამს და ისევ მე შევჭამო, ის არა სჯობია-მეთ-
ქი?! გავითიქრე და კიდევაც ავასრულე. სადი-
ლად, სამხრად და ვახშმად ბატი, ქათამი და ინ-
დოური არ მომიკლია. განა თითო, ოროლი და
სამსამი!! აბა, ამისთანა სადილ-ვახშამი ულვინოდ
რად ევარგებოდა?! მეც დავშინჯე ჭაშნიკები მა-
რნებში და სულ თავი და თავი ლვინოები ვსვი.

„სოფლის მოხელეს ხომ ძალლები ემტერე-
ბიან. წინად სოფელში ისე არ გავივლიდი, რომ
ჩემთვის არ გამოეტიათ. ახლა კი, შენ ნუ მო-
მიკვდე, ისე დამიმეგობრდნენ, რო სულ უკან
დამდევდნენ. განა მარტო ძალლები, კატებიც.
მთელი ხროვა ძალლებისა და კატებისა უკან და-
მდევდა, და, უნდა გენახათ, როცა პურსა ვჭამ-
დი, რა სიამით გარს მეხვეოდნენ. მეც, აბა,
ამათ მეტი ვიღა მყვანდა, ჯერზედ თითო ქათამს
ან ინდოურს ვაჭმევდი.

„ვავიდა ორი კვირა. ყოველ დღე და ღამ
ამ ყოფაში ვიყავი... კარგი ლვინო შემომაკლ-
და. ერთ ადგილს მეგულებოდა კარგი ლვინო,

მაგრამ მარანი დაკეტილი დამხვდა. ვიფიქრე: გავტეხო, ვაი თუ მერე ხათაბალაში გამხვიონ-მეთქი, და ისევ ხერხს მივმართე. ავიდგი ფეხი და ბევრი ვიარე თუ ცოტა, კითხვის-კითხვით ერთ უვალ-ადგილს მივადექ. „ბიჭო, ბიჭო!..“ — მოვრთე ყვირილი, და ჩემ ყვირილზედ ფერდობზედ კნეინა გადმოდგა.

„— უი, სიმონ, აქ რამ მოგიყვანა, ჩვენი დალუბვა რად გინდა?... — გადმომკივლა კნეინამ და მაშინვე გატრიალდა.

„ეჰე, საქმე კარგად არის მეთქი! — წამო-ვიძახე და წელში გავიმართე.

ჯერ კიდევ ჩემ ფიქრს არ მოუშორებულ-ვიყავ, რომ კნეინას მაგიერად ფერდობზედ თი-თონ კნიაზი გადმოდგა და გადმომძახა:

„— სოფლიდან მოდიხარ, ნათელაშვილო?.

„— ჰო, შენი ჭირიმე.

„— ხორველა ძალიან არის?

„— ძალიან, ძალიან, შენი ჭირიმე, ისე ძალიან, რომ ჩემს. მეტი კაცი სოფელში აღარ დარჩენილა.

„ტყუილი ხომ არ მიაქვამს? ჩემს მეტი კაცი სოფელში არ იყო.

„— მერე, შე ოჯახდაქცეულო, აქ რა მოგარბევინებდა, რო მორბოდი?. — გაჯავრებით

გადმომძახა და ერთი მწარედაც გადააფურ-
თხა.

„— თუ აქეთ წიმოველი, ბატონო, მარტო
შენ დასახსნელად წიმოველი.

„— რას მიედ-მოედები, შე კომლობა-ამო-
წყვეტილო?.. ხორველიანი ადგილიდგან ჩემ და-
სახსნელად მოსდიხარ?.— მკვახედ გადმომჭიდ-
ლა იქიდგან.

„— შენმა მზემ, კნიაზო, გუშინ შენი მარ-
ნის გვერდით გავიარე და რაღაც ბლუილი შე-
მომესმა. შევიხედე და, შენ მტერსა და დუშმან-
სა, რაც მე დავინახე. „შენ, ეი,“ შემომჭიდ-
ლა იქიდგან და ისეც დაჭიეტილი თვალები
უფრო დააჭიიტა. მე ენა მუცელში ჩამივარდა
და ხესავით გავხდი. „ნუ-კი გახევდი და გა-
ქვავდი...— მითხრა იმან:— წადი და უოხარი
შენ კნიაზსა, რო, თუ ეს ქოცო არ დამიკა-
ლე და ეხლავე არ გადილე სხვა ქოცოში,
იცოდე, ცოლ-შვილიანად სულ ამოგწყვეტავ-
თქო? განა რო გაიქეცი, ველარ გიპოვი-თქო?
ეს ქოცო ჩემია, ჩემი...“ დაიჭიქა და საწნახ-
ლის და ზევით კედლის კუთხეში რო ქოცოა,
იმას უბრაგუნებდა ფეხს: „დილაზე ადრე ადექ
და, რო ნახო, ასე უთხარ: ხორველის ანგე-
ლოზმა გამომგზავნა-თქო. გზაც-კი იმან მას-

წავლა, თორემ, აბა, საით გიპოვიდი, ნიშან-დობლივ მომასწავლა-თქო“.

„ვატყობ, კნიაზს ფერი როგორ მიჰდიოდა და გულში მეცინებოდა. რო გავათავე, კნიაზმა პირჯვარი გადიწერა და ქუდი მოიხადა.

„— შენი ჭირიმე, ნათელა შვილო... — შემო-მეხვეწია: — მე ვერ წამოვალ იქ. შენ... შენ, ისევ შენ როგორმე დამიხსენ და ის ქოცო და-ცალე. აი, გასაღებიც.“

„ხი, ხი, ხი...“ გულიანად ჩაიხითხითა სი-მონამ. ჩვენც სიცილი აგვიტყდა, ისე მშვენივ-რად დაგვიხატა ტყუილი შიში.

„მეც ეგ მინდოდა-მეთქი, — განაგრძო სიმო-ნამ: — გავიფიქრე და გასაღებს რო დავხედე, სი-ცილი ვეღარ შევიმაგრე. არ გამიგოს-მეთქი, თავი მაღლა აღარ ავიღე, ვითომ გასაღებს ვე-ძებდი, დავბობდავდი, სანამ სიცილი არ შევიმა-გრე. როგორც იყო, სიცილი ხველად გადავაჭ-ციე და გული რომ მომეფხანა, მაშინ-ლა ავიხე-დე მაღლა.

„— რა ვქნა, კნიაზო, ძალიან საშინელი იყო ი ხორველის ანგელოზი და ეხლაც რო ვნა-ხო, მარნიდგან ცოცხალი ვეღარც-კი გამოვალ.

„— შენი ჭირიმე, ნათელა შვილო, როგო-რმე მოახერხე... ერთხელ ხომ ნახე და გადურ-

ჩი, მეორედაც არას გიზამს. მე-კი, იქნება, არ
დამინდოს.

„— შენი გულისთვის, კნიაზო, ცეცხლში
ჩავვარდები და ი ხორველის ანგელოზია თუ
ოხრობა დალრჩობის მეტს ხომ არას მიზამს.
სიკვდილისა არ მეშინიან. ღვთისმშობელს გე-
ფიცები, შიგ ერთ ცვარ ღვინოს აღარ გავუშ-
ვებ.— ვუთხარი და გამოვტრიალდი.

„სიხარულით მივადექი მარნის კარებს და
კლიტეს ჩხრეკა რომ დავუწყე, შიშმა წამილო,
გასაღები კლიტეში ველარ გადავატრიალე, ხე-
ლები ისე დამიდამლავდა. იმან ისე ჩქარა დაი-
ჯერა, მეც გამეფიქრა: იქნება მართლა ხორ-
ველის ანგელოზი იყოს-მეთქი და აქეთ-იქით
მივიხედე. თუ ვინიცობაა შიგნიდგან ხორველის
ანგელოზი გამომეხმაურა, გზა ხსნილი მექნება-
მეთქი, რო გავქუსლო. მივიხედე თუ არა და
ჩემ უკან ათიოდე ძალლი რო დავინახე, გული
გამიმაგრდა და გასაღებს ჩხაკანი მოვალებინე...

„ოხ, რა მშვენიერი სუნი მეცა, როცა ქვევრს
თავი მოვაძრე, ღმერთმანი, ჩემ დღეში არ და-
მავიწყდება! ცოტა პრკე ჰქონდა. მოვხადე და...
ერიშაა, ქუდი ქერს ვახალე.

„აი, სწორედ კნიაზის წითელი ღვინით ვი-
ყავი გამობრუვებული, როდესაც ზარის რეკა შა-

მომესმა. რა ამბავია-მეთქი? — გავიფიქრე და საყდრისკენ გავიხედე. დავინახე, ჩაფარი ზარსა რეკავდა, ორი ჩინოვნიკი-კი იქით-აქეთ იცქი-რებოდნენ. ეს უთუოდ დოხტური იქნება-მეთქი, ვთქვი და მაშინვე ბანზე გავგორდი. ახლა ამითრევდნენ ისინი და უნდა ტყე და მინდორი მეტარებინა!.. ისევ თავი მოვიმკვდარუნე. „ამდენი აწყარუნეთ ზარი, სანამ მოგწყინდებოდეთ,“ — ვიძახდი გუნებაში: მე იქ არ მივიღოდი და ჩემ მეტი-კი სოფელში არავინ იყო.

„რეკეს, რეკეს, რეკეს და რეკეს. მერე დააყენეს. ვიფიქრე: უთუოდ წავიდნენ, რო ზარს იღარ რეკენ მეთქი. და ადგომას ვაპირებდი, რო ამ დროს ლაპარაკი შამომესმა. ცერად გავიხედე იქით და ისინი დავინახე. ჩემკენ მოდიოდნენ: „ქსს, ქსს...“ ოდნავ მივუსიე ძალლებს. ამ წასევაზედ თორმეტიოდე ძალლმა ყურები დააცქვიტა, ალმასივით კბილები გამოყარა და... ღვთის წყალობა გქონდეთ, იმათ გაპჭუსლეს, როცა ორას-სამასი გალესილი კბილი წინ მიეგება. კატები, კაცო, რო გენახათ, სიცილით დაიხოცებოდით: შაიჯგუფნენ ერთად, კუდები მაღლა აფშიკეს, წელში ორად მოიხარნენ და თვალების შრიალით ისეთი ფრუტუნი მორთეს, გეგონებოდათ, მილეთის ჯარს გაუმ-

კლავდებიანო. აი, თქვენი ჭირიმეთ, თქვენი...
ვიძახდი სიცილით: დოხტურს კი არა, ეშმაკ-
საც არ მოუშვებთ-მეთქი ჩემთანა...

„მეორე ქოცოცა-კი დავუცალე კნიაზსა. ქა-
თამს, ბატს ინდოურს ხომ სულ მუსრი გავავ-
ლე. ხალხის დაბრუნების დროც მოვიდა. ხორ-
ველა განელდა. რო არ ყოფილა, რა განელ-
დებოდა! ხალხს-კი ეგონა. ვიფიქრე: ე ამო-
დენა შინაური ფრინველი რო გავწყვიტე და
ახლა ხალხმა სულ შამომაკეცოს, რითლა გა-
დავუხდი მეთქი. აქაც ხერხი ვიხმარე. ავდეჭი
და ნაჩალნიკთან წავედი. დამინახა თუ არა ნა-
ჩალნიკმა, ისეთი დამიყვირა, რომ, სხვა რომ
ყოფილიყო, გული გაუსქდებოდა. შე ასეთ-
ისეთო, ხორველიანი ადგილიდან აქ რა მოგარ-
ბევინებდა, რო აქაც შამოიტანოვო... ყვი-
როდა ნაჩალნიკი და თან-და-თან უკან იწევდა,
თითქოს ეშინოდა ჩემი. წადი, წადი ეხლავე,
თორემ ჩაფრებს დავუძახებ და სულ ტყავს გაგა-
ძრობინებო... დამჟყივლა და ფერ-წასული კუთ-
ხეში მიიჭუჭკა.

„— რა ვქნა, შენი ჭირიმე... — საცოდავად
მოვყევი კნავილს: — სოფელი გაიქცა, იმოდენა
ბატი და ქათამი სოფელში დასტოვა და მარტო-
კა რა ყარაულობას გავუწევდი ან ვუპატრონე-

ბდი?.. ზოგი გაგარეულდა, ზოგი კიდევ მგელ-
მა და ტურამ დაჭამა.

„— ვერ უყურებ ამ მ...ს ოხერს?.. მერე
შენ რა? გასწი, გაეთრიე...“

„— მერე სოფელი რო დაბრუნდება,—
უფრო უარესად დავიწყე კნავილი:—ჩემ მეტი
კაცი სოფელში არ იყო და ახლა პატრონები
მე რომ წამომედავნენ?..“

„— წადი, წადი ჩქარაო...— მამაძახა:— მაგი-
სი ნუ გეფიქრება, აქ არ მოვლენ საჩივლელად...“

„— მეც მეტი რა მინდოდა, ავდეჭი და გულ-
დაშვიდებული წამოველი.“

„ოუ სოფელში დამრჩა რამ, სანამ სახლ-
კარს დაუბრუნდებოდნენ პატრონები, შაუქმე-
ლი და დაულეველი აღარა დამრჩენია-რა.“

— ენდე, ჩემო შალვა, მაშ „ხორველის
ანგელოზი“ არ არის!— აღარ დაათავებინა ლა-
პარაკი შაქრომ და მე მხარზედ ხელი დამკრა.

— ეხლა-კი გავიგე, რადაც ეძახით „ხორ-
ველის ანგელოზს,“ — ნაღვლიანის ლიმილით ვუ-
პასუხე და გუნებაში-კი იმას გავიძახდი: ნე-
ტავი არ გამეგო-მეთქი.

სიმონას, ცოტა არ იყოს, ჩემ თვალ-
ში მიმზიდველობა მოაკლდა. ეხლა სიმო-
ნა ის აღარ იყო, რაც ამ ერთი საათის წინ,

როდესაც ის „მთაო, გადმიშვი, გადმიშვი“-ს
მღეროდა.

III

კიდევ ლვინო, კიდევ საჭმელი და კიდევ
სიმღერები. საღილს ვახშამი ზედ მოება და
ლვინით კარგად გაუღენთილებმა შუალამისას
სუფრას თავი დავანებეთ.

— ღმერთმანი, შაქრო, — ეხვევოდა ვანო
შაქროს და ლმობიერად ეუბნებოდა: — პატიოსა-
ნი კაცი ხარ, პატიოსანი!.. ნამდვილ კაცს
რომ იტყვიან, ისა ხარ!

— ვანო, ღმერთმანი, ისე მიყვარხარ, რომ
ლეიძლ ძმაში არ გამოგარჩევ!.. — თავის მხრით
ეფიცებოდა შაქრო ვანოს და თან ჰკოცნიდა.
სიმონამ-კი ჩიბუხი გააჩალა, ჯოხი იღლიაში
ამოიდო და ბარბაცით აივანი ააჭრიალა.

— ეი, „ხორველის ანგელოზო!“ სად ჯა-
ნაბას წახვედი?! — დაუჭყივლა შაქრომ და გარედ
გამოვიდა.

ჩვენც გამოვედით აივანზედ. გამაცოცხლე-
ბელმა სიომ დაგვბერა არაგვის მხრით. არაგვიც
მხიარულად მოგვეგება და გულმოდგინედ გვე-

პატიჟებოდა თავისკენ. მინდოდა მეთქვა: წავი-
დეთ, შუბლი გავიგრილოთ-მეთქი, მაგრამ შა-
ქროს და ვანოს რო შევხედე, გავჩუმდი. ვიცო-
დი, ესენი იმ ზომამდის იყვნენ მისულნი, რომ
შუბლის გაგრილებასთან ერთად მთლად ტანის
გაგრილებასაც მოინდომებდნენ და ეს-კი სასია-
მოვნო არ იქნებოდა.

— არ გეყურება, ნათელა შვილო?! — გადას-
ჭიკივლა შაქრომ სიმონას, რომელიც უკვე ეზოს
გარედ გავიდა.

— ღამე მშვიდობისათ!.. ძილის დროა!.. —
ეზოს გარედან დაიძახა სიმონამ და შინისაკენ
გასწია.

— აი, შეე... — სიტყვა აღარ დაათავა შაქ-
რომ და მაშინვე ვანოს მიმართა: — ვანო, მაშ
შაქრო მოგიკვდეს, თუ ეს არ დაგიმტკი-
ცო!..

— მჯერა... ვიცი... უხ, შაქრო, რა კარგ
გუნებაზედ ვარ!.. — შესჭიკივლა ვანომ და შაქრო
გულში ჩაიკრა. — შენა, შალვა, შენ როგორ-ლა
გუნებაზედ ხარ?!.. — მომიბრუნდა მერე მე და აღგ-
ზნებულის სახით დამეკითხა.

— მე, ჩემო კარგო, ძილის გუნებაზედ
ვარ! — ვუპასუხე განგებ, თუმცა-კი სრულებით
არ მეძინებოდა.

— სტყუი, სტყუი!.. შენ... გიცნობ, ღა-
მურა ხარ!.. ამისთანა ღამეებს გაათენებენ ხო-
ლმე და ეხლა-კი გეძინება!..

— ღამურა შენ თითონა ხარ! — ვითომ წყე-
ნით ვუპასუხე.

მართალს ამბობდა ვანო, როცა-კი ღამე
მომეწონება, ნამეტნავად მთვარიანი, ამისთანა
შემკული ბუნებით, ძილი არ მეკარება, და მთა-
ლრეს ხეტიალით ვათენებ. ხშირად დამთენებია
მთის წვერზედ ან კიდევ მდინარის პირზედ...

— გეწყინა, შალვა?! — დალონებული ვანო
მომიახლოვდა და გადამეხვია.

— ტყუილად რად აცდენ მა კოცნას?! —
ლიმილით ვუთხარი, როდესაც გადახვევნის დროს
ლოშნა დამიწყო.

დიდ ხანს ვლაპარაკობდით: ხან უაზროდ,
ხან კიდევ აზრიანად. ჩვენი ბაასის დროს მთვა-
რე, თითქოს დაეძებს ვისმეო, კანკალით დაჰ-
კრთოდა დედამიწას, და ჰპოვა თუ არა, არ ვი-
ცი. ეს-კი დავინახე, რომ მთის წვერზედ ობ-
ლად მდგომ ხეს ჩაეკონა, ზედ დაენთქა და ჩქა-
რა მთლად ჩადნა...

ლვინომ და ცხენით მოგზაურობამ თავისი
მოქმედება იქონია ჩვენზედ. ვანოს თავი გულ-
ზედ ჩამოეკიდა...

— აბა, ახლა-კი არაგვის ნომრებში მოსვენეთ!.. — წამოიძახა შაქრომ და ვანოს ხელი ჩავლო.

იმისი წინამძღოლობით კიბე ჩავიარეთ და ზედ არაგვის ნაპირას დაბალ ფიცრულ ოთახში შევედით. ეს ოთახი კიდევ რამდენსამე უჯრადიყო დაყოფილი, გაჩითული ფიცრულით, თოთოეულ უჯრაში ტახტი თავის ლოგინით იდგა.

— ხა, ხა, ხა!.. — უეცრად გადიხარხარა ვანომ, თვალი რო მიავლ-მოავლო, და ხარხარით ვე განაგრძო: — შაქრო, ეს პაწაწა გაჩითული ოთახები რალსაც მაგონებს!..

— ჰა, ჰა, ჰა, კაცო, გაჩუმდი!.. ეს არაგვის ნომრებია!.. — სიცილით უპასუხა შაქრომ და მერე მე მომიბრუნდა: — აი, შალვა, შენ აქ მოისვენე, ვანო-კი აგერ მეორე ნომერში დაიძინებს.

შაქრო გამოვვე შვიდობა. ვანო ჩემ ნომერში იდგა გულ-ხელ დაკრეფილი, თავი დაეხარა და ტუჩებზედ კიდევ ლიმი უკრთოდა.

შევცეროდი ვანოს. კარგად ვხედავდი, რომ იმისი ლიმი სიამოვნების ლიმი იყო და შევნატროდი...

— ვცხოვრობთ, შალვა, ვცხოვრობთ!.. — აღტაცებით წამოიძახა და ტაშის შემოკვრით

თავის ნომერში შევიდა. შესვლის უმაღლ მოწყვეტით ტახტზედ მიეშო და...

ჩქარა გულიანი ხვრინვა შემომესმა.

— ვცხოვრობთ!.. — გავიმეორე მეც აღტაცებით კი არა, გულ-ჩაწყვეტით და მივწექი.

ჩემდა უნებურად ამ დღეს ნახული და გაგონილი მომავონდა. დაღალული გონება მკაფიოდ აღარ ასურათებდა მოქმედ პირებს. თანდა-თან ფერი, პიროვნება ეკარგებოდათ. ვანო, შაქრო, სიმონა, მთა, მთვარე, არაგვი — ერთ-მანეთში აირივნენ. ბოლოს შუილ-ხარხარილა მეყურებოდა, მეტი აღარაფერი და...

მეც გაუგებრად ძილმა მომიპარა...“

—

„აი, ჩემო ერასტი, ასე ვატარებ დროს! წერილით მეკითხებოდი: რატომ არას მწერ, როგორ ატარებ დროსო. მეც, აი, ერთი დღე აგიშერე. ერთი დღე მეორეს ძალიან წააგავს. მეორე კიდევ მესამეს და ასე მისდევს. ვანო, სიმონა, შაქრო თუ არ იქნებიან, იმათ მაგიერ ნიკო, ალექსი, არჩილი და სხვები შეგვხვდებიან, იმათთანაც ეგრეთვე გაატარებ დროს. თუ ხორველის ამბავს არ მოგიყვნენ, სხვაზედ მაგგვარსავე ამბავს გეტყვიან. ლვინო, მთა, მთვარე,


მზე-კი ყველგან შეგხვდება ჩვენს საქართველოში.

ვცხოვრობთ, არა, ჩემო ერასტი?!

ეს-კია, დღე დღეს ჰგავს, მაგრამ რატომ
მე ეხლანდელი შალვა, პატარა შალვას არ
ვგევარ? რატომ იმასავით შეუხამებელი, უბიწო
არა ვარ?! ეს...

მაგრამ კმარა საამდლეოდ, თორემ მოგე-
წყინება ჩემი წერილის კითხვა. ბევრი მაქვს
მოსაწერი, სხვა დროისთვის გადავდოთ...

მარად შენი შალვა. “*)



*) ეს წერილი ერასტიმ გადმომიცა და მეც იმის ნება-
დართვით ვასტამბინებ.

„ხა, ხა, ხა, რა სულელი ხარ!..“

(ფსიხოლოგიური ეტიუდი)

— პატივცემულო მკურნალო, ყველაფერი, რასაც მიკრძალავთ, რომ შევასრულო, ხომ სამუდამოდ განვთავისუფლდები, ხომ მოვრჩები? — ეკითხებოდა მკურნალს თვალებ-გაბრწყინებული, გამხდარი ახალგაზდა და თან რამდენჯერმე ყრუდ ჩაახველა.

— გამოგიტყდებით, როგორც ინტელი-გენტს, — ცოტა ხნის ჩაფიქრების შემდეგ უპასუხა მკურნალმა, — საეჭვოა. იქნება ერთს ან ორ წელიწადს იცოცხლოთ. თქვენი ფილტვების გასინჯვის შემდეგ, მეტი არა მეთქმის-რა. მაგრამ ქვეყნიერებაზედ ზოგჯერ ისეთი სასწაულთ-მოქმედება ხდება, რომ თქვენისთანანი კი არა, სიკვდილის პირას მისულნიც-კი განკურნებულიან.

— მგონი, პატივცემულო მკურნალო, ჩემ დასამშვიდებლად დაუმატეთ ეგ „მაგრამ“ და სხვა... — მწარის ღიმილით დაეკითხა ახალგაზდა.

— თითქმის! — შუბლის შეჭმუხვნით უპასუხა მკურნალმა.

— მაშ ერთისა ან ორი წლის სიცოცხლე-
ლა მაქვს, არა?!

— აკი გითხარით!.. ისიც იმ პირობით,
თუ მყუდროდ, ძალიან მყუდროდ იცხოვრებთ.

— ახ, რა ბედნიერი ვიქნები!.. — დაცინ-
ვით წამოიძახა და კიდევ ყრუდ ჩაახველა.

— რაო?! ვერ გავიგე თქვენი „ახ!“

— არა, ისე!.. მაშ მყუდროდ, ძალიან მყუ-
დროდ რომ ვიცხოვრო, ორ წელიწადს ვიცო-
ცხლებ?

— დიალ!

— ეს მყუდროება რაში მდგომარეობს?..

— ხომ გითხარით: სასმელს ერიდეთ, ნუ-
რა გვარ გრძნობათა ლელვას ნუ მიიკარებთ,
თუნდ სიყვარულსაც; ნამეტანვად ამ უკანასკ-
ნელს ერიდეთ.— ცოტა წყენით უპასუხა მყურ-
ნალმა და სახის მოძრაობით ანიშნა, რომ დროა
მოშორებიყო.

— უკაცრავად, მკურნალო, ეხლავე წავალ.

— უთხრა ზიზღით და განაგრძო: — იმ ორ წე-
ლიწადს ჩემი სიცოცხლე რას ემსგავსება?..

— ვერ გამიგია თქვენი კითხვა.

— რისთვის უნდა ვიცოცხლო, თუ-კი ცო-
ცხალი მკვდარს დავემსგავსები?..

— როგორ თუ მკვდარს?.. განა თქვენ არ

იცით, რომ თითო წამშიაც-კი მთლად თავის
საცხოვრებელს მისცემენ, თუ-კი მომაკვდავთ
სიცოცხლეს განუგრძელებენ!..

— მხოლოდ იმ პირობით, თუ იმ წუთს სია-
მოვნებაში, მოქმედებაში გაატარებს და არა ჩე-
მსავით ცოცხალი უკანასკნელ წუთებამდის
მკვდარს დაემსგავსოს.

— განა თვით სიცოცხლე სიამოვნება არ
არის?

— რომ უმზიროს, სხვები როგორ სიამო-
ვნებენ და ის-კი... მშვიდობით!.. გმადლობთ!..

— მო, მარო, ხელი მომეცი. ჰო, ეგრე.
ეხლავე რომ სული ამომძვრეს, ბედნიერი ვიქ-
ნები! ეს გრძნობა წამყვება თან, ეს!.. — იძახდა
ახალგაზდა და თან მაგრად, მაგრად ეკონებოდა
მაროს ხელს, რომელიც ჩუმად ცრემლს აფრ-
ჭვევდა.

— ეფრემ, გენაცვა, რატომ... — ვეღარ და-
ათავა სიტყვები, გული ყელში მოებჯინა და,
რომ თვისი ქვითინი დაემალა, ეფრემის შუბლს
დააკვდა.

— ოხ, ნეტარებავ!.. ათი წლის სიცოცხ-
ლეც რომ მქონდეს, ამ ერთ წუთში მივცემდი!
ჰა! ჰა!.. შედეგ, გულო, ჯერ ადრეა! ჯერ...

ოხ!... გრძდა ბუღიდგან გადმოვარდე?.. ჰაა...
 — ხელი გულზედ იტაცა და საშინლად გაფით-
 რდა.

— წყალი!... — წამოიძახა მარომ და იქ
 მსხდომ ეფრემის მეგობრებს თვალები მიაპყრო,
 რომლებიც ნერწყვ-გამშრალნი შესცემოდნენ
 ეფრემს და მაროს.

— მაროს სიტყვებზედ ერთი მათვანი წამოვა-
 რდა და საჩქაროდ წყალით ხელში თავს დაადვა.

— მარო, მომეცა, მე მოვუვლი, შენ მო-
 ერიდე. — ჩუმად წასჩურჩულა ეფრემის ამხანა-
 გმა და წინ წადგა.

— არას დროს, თუნდაც ეხლავ სული ამო-
 მხდეს! უკანასკნელ წამებს ვერ გავუმწარებ. —
 უბასუხა მარომ და თან შუბლი უპკურა.

ცივი წყლის ზედ გავლენით გონება მოუ-
 პრუნდა ეფრემს. გაცრიაგებული თვალები გა-
 დაატრიალ-გადმოატრიალი და სიამოვნების
 ცრემლები გადმოსკდა.

— ბედნიერი ვარ!.. ჩემ საყვარელთ ვხე-
 დავ!.. მარო, თითქოს ვიტირნია?! რა იყო?
 მე ხომ კარგად ვარ? მაშ რა ვატირებს?! — და-
 ეკითხა ეფრემი და მაროს ხელი ტუჩებთან მი-
 იტანა.

— ბუნებავ, გინდოდა ცოცხალი მკვდარს

დაგემსგავსებინე, მაგრამ ვერ მოახერხე!.. მე... ჰა, კიდევ?! ბარემ გადმოვარდი ბულიდგან და... ლვინო შემასვით!..

— ეფრემ, ხომ თავს იწამლავ მაგ საქციელით და სიცოცხლეს ისწრაფებ?! — უთხრა ერთმა ამხანაგთაგანმა მზრუნველობით და წითელი ლვინით სავსე ჭიქა მიაწოდა.

— მწარე შხამს ტკბილით ვათავებ. მინდა... კიდევ დამისხი! — აჲო!.. ჩემი გული ფერხულში. კიდევ ებმის, ხტუნაობა მოსურვებია, ჰა, დაიწყე!.. ჩემო მარო, ნუ შესწუხდები!.. მე... მომეცი ლვინო!

— ეფრემ, გეყოფა!.. — ჩასძახა მარომ და ხელი შუბლზედ გადაუსვა.

— ეგრე... ეგრე!.. მსურს ამაღამ გრძნობით დავითრო, ჯერ არ მეყოფა... მომეცი ლვინო!.. ჯერ ხომ ადრეა?.. იქნება გეძინებათ კიდევაც?! ძილს მოესწრობით, ვისიამოვნოთ!.. ახ, რა გრძელდება ეს ლამე?!

— რა დაემართა, რომ მაგრე ლაპარაკობს? — წასჩურჩულა ამხანაგმა მეორეს და წითელი ლვინით სავსე ჭიქა მიაწოდა.

— რა მეჯავრება წყვილიადი ლამე!.. ნეტავი ჩქარა მაინც გათენდეს!.. არა თენდება?! მაშგაუმარჯოს დღის სინათლეს!.. აჲა, ჩამომარ-

თვი! კარგი ლვინოა... რატომ თქვენ-კი არა
სვამთ?.. მარო, ნუ მომშორდები!..

— არ მოგშორდები, გენაცვა, არა!

— გეყურებათ?! მამალი ყივის... ოხ, ნე-
ტარებავ!.. დღის სინათლეს კიდევ ვიხილავ...
მაგრამ... — უეცრად აჩქარებული სუნთქვა დაი-
წყო, საშინელი დაბალი ღმუილი მორთო და
ტანმა მთლად თრთოლა დაუწყო.

— ეფრემ, ეფრემ!.. — ჩასძახოდნენ მარო-
სთან ერთად ეფრემის ამხანაგები, მაგრამ ეფრემს
არა ეყურებოდა-რა.

— გენაცვა, ეფრემ, შენს მაროს აღარ გი-
ნდა შეჰქედო?!.. ეფრემ!.. ვაი, მე ბედშავს!..

— უუ!.. უუ!.. უუ!.. — ღმუოდა ეფრემი
და თან კანკალებდა.

— რამ შეგაშინა?! ნუ გეშინიან, ჩემო ეფ-
რემ, ჩვენ აქ არა ვართ?!.. — ტირილით ეუბნე-
ბოდა მარო და აღარ იცოდა, როგორ მოევლო...

— მარო... მარო... ნუ მომშორდები!.. —
ღიმილით წამოიძახა ეფრემმა და უეცრად ხვე-
ლა აუკარდა.

— არ მოგშორდები გენაცვალე, არა და
არა! იი, შენი ამხანაგებიც აქ არიან!.. რათა
კანკალებ?! შემომხედე, გენაცვალე, შენს მა-
როს ვეღარა სცნობ?!.

ეფრემი უაზროდ ატრიალებდა ბინდ-გა-
დაკრულ თვალის კაკლებს და მაროს ხვეწნას
ყურადღებას არ აქცევდა.

— ნუ კანკალებ, ეფრემ!.. — ჩასძახა ერ-
თმა ამხანაგმა და ხელი დაუჭირა.

— უუუ!.. უუ!.. — ეფრემმა ისევ წაიღმუ-
ვლა და ტანის თრთოლამ მოუმატა.

— ოხ, რა საშინელი წამებია!.. — წამოი-
ძახა ისევ იმ ამხანაგმა და გარედ გავარდა.

უმთვარო ცაზედ ვარსკვლავები ცელქობ-
დნენ და მიძინებულ დედამიწას თითქოს დას-
კინოდნენ, რომ სიცოცხლით არ სარგებლობსო.

ეფრემის ამხანაგმა გამოსვლის უმაღ ცას
გადაავლო თვალი და, თავისდა უნებურად, წა-
მოიძახა:

— ცავ, ჟენზედ ადამიანის მწუხარება არ
მოქმედებს?!

— ხა, ხა, ხა, რა სულელი ხარ!.. — ჩამოჰ-
კისკისეს ზეცით ვარსკვლავებმა.



ბედნიერი დედა.

— ღმერთო ჩემო! — წამოიძახა მზექალაშ
 და ტანში ურუანტელმა დაურბინა. — ნუ-თუ...
 — სიტყვა ველარ დაათავა შიშით, თავი გაიბერტ-
 ყა და ორივე ხელით შუბლი მოიწურა, რომ
 არა სასიამოვნო აზრები გამოედევნა იქიდან.
 მართლადაც, თითქო დამშვიდდა, საშიშო აზ-
 რები მოშორდა და, ცოტა არ იყოს, სასია-
 მოვნო გრძნობაშ შეიპყრო მისი არსება: ხედავს
 თავის პირმშოს, ერთად-ერთ ბიჭუკას, პატარა
 ოთარს. და სიხარულით გულში იკრავს. — რას
 შვრები, რას?! — მწარის ლიმილით წამოიძახა
 მზექალაშ და ისევ იმავე კილოთი განაგრძო:
 ვინ მალირსებს იმ ბედნიერებას, რომ ჩემ
 ოთარს, ჩემ ბიჭუკას, გამარჯვებულს ვნა-
 ხავდე!

მზექალა გადაესვენა სავარძელში და თვა-
 ლები დახუჭა.

ერთად-ერთი ძე, ათი წლის ოთარი, გა-
 ისტუმრა სასწავლებელში. დღეს უნდა გადასწ-
 ყდეს მისი ბედი. დღეს უკანასკნელად გამოს-

თქვამენ მის ოთარზე უკანასკნელ სიტყვას, მის უვარგისობაზე, და, აი, მზექალამ ვერც-კი გა-
ბედა თავის ოთარის გვერდით ყოფნა. რატომ
არ გაჰყვა თავის ოთარს სასწავლებელში, რო-
დესაც იგი უნდა გამოსცადონ?.. მზექალა ამ-
ტყუნებს თავის თავს, ჰყიცხავს და თან ამასაც
ფიქრობს: „ვაი თუ ოთარმა ვერ გაიმარჯოს
და იქ მას ყველას წინ სისუსტე დაემართოს,
ვერ აიტანოს თავისი საყვარელი ოთარის დამ-
ცირება და ისედაც დამცირებული ოთარი თა-
ვის სისუსტის გამომჟღავნებით უფრო დაამცი-
როს? ეს ხომ...“

— ევ! — ტანის შერხევით ამოიკვნესა მზე-
ქალამ და სხეული უფრო მოუდუნდა, მოელე-
შა... „ოთარი!.. ოთარი!..“ გაუხტა მზექა-
ლას მისი ძის სახელი გონებაში და მთლად
მისი წარსული თვალ-წინ გადაეფურცლა...
„ოთარი, ოთარი!..“ უეცრად მოაგონდა მზე-
ქალას მისი დაბადების დღე. რა იყო მაშინ
ოთარი?! ღმერთო, ღმერთო! კარგად ახსოვს
მზექალას, გული რანაირად გაუხეოქეს. შეუ-
ბრალებლად პირში მიახალა მშობელ დედას
მოწვეულმა მკურნალმა, რომ ოთარი დღენაკ-
ლულია, მალეც სულს განუტევებს, მალე აღი-
გვება მისი ხსენებაო...“

ამისი თქმა ადვილია, მაგრამ დედის გული განა ადვილად აიტანდა ამას? როგორ დაიჯერებდა ამას მზექალა?! მან გაათკეცა შვილის მოვლა... დღენაკლული ფეხზე წამოაყენა, თუმცა ეს დღენაკლულობა კიდევაც ეტყობოდა. მზექალას უნდოდა, თუმცა მკურნალების არა სჯეროდა-რა, გასამხნევებელი რამ გაეგონა. ამისათვის კიდევ მოიწვია იგინი. კიდევ ჩააბარა თავისი პირმშო და რამდენისამე ხნის შემდეგ, აი, რა გაიგონა: ტყუილად უვლიოთარს... მისი სიცოცხლის წუთები დათვლილიათ... კიდევ იგივე არა სანუგეშო სიტყვები... კიდევ... ოხ, ღმერთო, ღმერთო!.. მთლიად ცრემლად დაიღვარა მზექალა, მაგრამ ოთარის მოვლას უფრო გულ-მოდგინედ შეუდგა. რაც გამოცდილთ, დახელოვნებულთ თავიანთი წამლებით ვერ შესძლეს, ის დედის მხურვალედ მოსიყვარულე გულმა გამოაცოცხლა. დათვლილი წუთები უთვალავად გახდა და, აი, უკვე ათი წლისა გახდა ოთარი და საშუალო სასწავლებლისთვისაც მოემზადა...

გულგატეხილმა მზექალამ შვილის გამოცდაზე დასწრება ველარ გაბედა და ამისათვის არის, რომ ეგრე მოუთმენლად მოელის ოთარის სასწავლებლიდან დაბრუნებას.

ჩუ!.. ვისილაც ფეხის ხმა მოისმის! მზე-
ქალა სმენად გარდაიქცა. უნებურად ზეზე წა-
მოიჭრა... „ფეხის ხმაა, ფეხისა!“ ბუტბუტებს
მზექალა.

მართლაც, ფეხის ხმა უფრო მკაფიოდ ის-
მის...


არა ჰგავს დალონებულის, დამარცხებულის
ფეხის ხმას... ოთახის კარიც გაჭრიალდა და
კარებში მოცინარი, სახე-გაბრწყინვებული, ფუნ-
ჩულა ბავშვი გიმოჩნდა.

— ოთარ!...

— დედი!...

თითქმის ერთად წამოიძახა დედა-შვილმა
და უსიტყვოდ გაიგო ერთი-მეორის პასუხი...
სწრაფ გამარჯვებულთ გული გულს შეუერთეს
და...

მომლოცველნი რომ არ მოსულიყვნენ,
იქნება დედა-შვილი ერთმანეთს არ გასცლო-
და...



„ს ი ს უ ლ ე ლ ე ა!“

(ეტიუდი)

...გუგუნებს ბუხარი, გუგუნებს და მალხაზას მოუთხრობს წარსულს — ბავშვობის ამბავს:

„გახსოვს მალხაზ? — ეკითხება ბუხარი: — რა ალტაცებით მოექოდი ამ ლამეს, რა მოუსვენრად, უდარდელად კისკისებდი, როდესაც დედა-შენი გოზინაყს კეთებას დაუწყებდა?.. შენც შველოდი, ვინდოდა, ჩქარა გაეკეთებინა, საკვლეო ხონჩა დაემზადებინა, რომ დილით, ძალიან დილით, სავსე ხონჩით შემოსულიყავ და მოგელოცნა შენი ჭერისათვის, მშობლებისათვის. ცოტათი რაკი მოიზარდე, მეკვლეობას დღარავის ანებებდი. მეკვლეობა დიდ ბეღნიერებად მიგაჩნდა...“

„...ხა, ხა, ხა!.. ისიც ხომ გახსოვს, ხონჩიდან ერთხელ მოხარშული დედალი გადაგივარდა და ძალლმა მოგტაცა?!.. დაგავიწყდა მეკვლეობა, ხონჩა ძირს დასდგი და ღრიალით ძალლს გამოეკიდე. ხა, ხა, ხა!.. გეგონა დიდი უბედურება რამ დაგატყდა თავზედ...“

ამ მოგონებაზედ პირზედ ლიმილი მოუვილა, სიამოვნებით შეიშმუშნა და კვლავ ბუხრის გუგუნს ყური დაუგდო!

„ოო... მაშინ, ჩემო კარგო, — გუგუნებს ისევ ბუხარი: — გწამდა ყველაფერი: გეგონა, ახალი წელიწადი მართლა ახალი იყო; შენც ყოველ ახალ წელიწადის დღეს გაახლებულად ჰერძნობდი; გეგონა, სულ ხალისდებოდი და ამისთვის შენს სიხარულს საზღვარი არა ჰქონდა... ეხლა?!

„წწ... ფუუუ!..“ უეცრად ერთი ლერო წინ წამოვარდა, ჯერ მოუწვავი თავიდან წამოცრემლა და შიშინი დაიწყო...

— ეხლა?!. ეხლა?! — წინ წამოვარდნილ ლეროს ფეხი გაჯავრებით წაჰკრა და აჩქარებით ოთახში გაიარ-გამოიარა. — შენ თუ არ ჩამეკითხე, მე-კი არ ვიცი! — ლაპარაკობს სიარულის დროს მაღხაზა: — რანაირად გულს მიწამლავს ყოველგვარი სიშიარულე...

„ჰო!.. ჰო! ჰო!“ — ამშვიდებს ბუხარი და ისევ მხიარულად გუგუნებს.

— რანაირად მქენჯნის, გულს მისერავს ჩემი არსებობა, ურწმუნოება და...

„ჰო!.. ჰო!.. ჰო!..“ — ძალა-უნებურად იზიდავს ბუხარი თავისკენ, ეალერსება მაღხაზას და აშლილ ფიქრებს უქარწყლებს.

ისიც აჩქარებულ სიარულს თან-და-თან უკლებს, თავის-და უნებურად ბუხარს უახლო-ვდება და ჩქარა ისევ სავარძელში გადაწოლი-ლი სიამოვნებით ყურს უგდებს ბუხრის გუგუნს.

— დმერთო, ეს სადა ვარ?! სიზმარია თუ ცხადია?!. არა მჯერა, გენაცვა, არა!.. ნუ-თუ ჩემი ნატვრა, ჩემი ოცნება გამართლდა?!.. ხში-რად მითქვამს, ჩემო კარგო: „ოღონდ დამარ-წმუნე, რომ გულ-წრფელად გიყვარვარ და მა-შინ... მაშინ სააქაოს ტანჯვას, თუნდ საიქიოს, თუ-კი არსებობს, ჯოჯოხეთის ტანჯვაც ზედ დაურთეთ, მაშინ მე მაინც ბედნიერი ვიქნები; მაშინ თუნდ ყოველგვარ საზიზლრობას, ცას, ხმელეთს, ზღვას შევებრძოლები; მაშინ ჭირი და ლხინი გაერთიანებული მექნება, სიკვდილიც-კი ლხინად მიმაჩნდება-მეთქი.“ და, აი, თითქო მართლდება ჩემი ოცნება!.. მე მჯერა, გულ-წრფელია შენი სიყვარული... არ ვიცი-კი და მჯერა...

— ტყუილად გჯერა, ტყუილად!.. მე არ მიყვარხარ!.. — პასუხს აძლევს ჯერ ისევ შეუბ-ლალავი, უმანკო არსება და თან თავის პასუხი-სავე რცხვენიან, მის მკრთალ სახეს ალმული ასდის.

— ჩაუკვირდი შენს გულს, ჩაუკვირდი და
ისე მიპასუხე! აბა, რადა სტყუი, რადა? ხომ ეგ
არ უნდა გეთქვა?!

— მართალს გეუბნები, მაღხაზ, მართალს!

— რად ცბიერობ, ჩემო ელეონორა,
რად?!.. მე მჯერა, შენ გიყვარვარ, გიყვარვარ
გულწრფელად და ამას შენ ვერ უარჲყოფ!..
ელეონორა, სარკე მაინც გედგას წინ, ის დაგა-
რწმუნებდა შენი სიტყვების უშინაარსობას!..

— რა ვქნა, არ მიყვარხარ!..

— შეუძლებელია!.. შენ ხომ ქალი ხარ,
ადამიანის შთამომავალი!.. მაშ ნუთუ შენზედ
გრძნობა, გულწრფელობა არ მოქმედებს?!
კლდეს ააცრემლებს, ლითონს დააღნობს და...
არა, სტყუი, გიყვარვარ!.. გიყვარვარ, ჩემო
ელეონორა!..

— შენ არ მიყვარხარ, სხვა მიყვარს!.. — წაი-
ლულლულა ელეონორამ და თავი ძირს ჩაჰკიდა.

— ვინ სხვა?!

— მასაც ვუყვარვარ!..

— სიცრუვეა!.. მე გეუბნები, შენ მე გი-
ყვარვარ... გიყვარვარ მისთვის, მე რომ გულ-
წრფელად მიყვარხარ. საკმარისია, მგონი, ამისი
თქმა, რომ ყოველი ეჭვი გავაქარწყლოთ.

— მისი სიყვარულიც გულწრფელია!..

— ჩაშ უპირატესობას მის სიყვარულს რად
აძლევ?

— მე ეგ არ ვიცი!

მალხაზა ჩატიქერდა. სახე მოელრუბლა,
ძნელი იყო იმისთვის, დაეთმო ვისთვისმე ეს გან-
ხორციელებული სინაზე, მაგრამ...

— ელეონორა!.. — სასოწარკვეთილებით
წამოიძახა: — მე არა მჯეროდა, ვითომ შენ სხვა
გიყვარდა. ეხლაც მრწამს: ჩემი გულწრფელი
სიყვარული შენში თანაგრძნობას იწვევს... მაგ-
რამ... რა მეთქმის, როდესაც შენ პირდაპირ
ამბობ... იქნება, გვინია, მე ის ვაკიცხო?!. ის!..
ჩემი მეტოქე! არა და არა!.. მე შემეძლო მეთ-
ქვა: მას მოვკლავ, შევმუსრავ, მაგრამ არ ვამ-
ბობ, რადგანაც გულწრფელად მიყვარხარ, ვამ-
ბობ-კი არა, არც მართლა მოვკლავ... იცოც-
ხლოს... ნუ-კი იფიქრებ, ვითომ მე არ შემეძლოს
იმასთან ბრძოლა?! შენი გულისთვის ჩემ ძარ-
ლვებში ერთი წვეთი სისხლის მეტიც რომ არ
ნაკადულობდეს, იმასაც ვავწირავ; მაგრამ მხო-
ლოდ შენის სიყვარულით უკუ-ვსდგები, მე არ
მინდა პირუტყვით დაგადარო...

— რას მეუბნები?!

— ყური დამიგდე: ხომ გინახავს ყოჩა
ბრძოლა დედალი ცხვრისათვის? მე ყოველთვის

ყოჩა ბრძოლის მაგონებს მამაკაცთა სიტყვით
თუ საქმით შებრძოლება ქალის წინაშე. ორი
მებრძოლი მამაკაცი სცდილობს ერთი მეორის
გამასხარავებას, რომ ქალის ყურადღება დაიმსა-
ხუროს. ყოჩა შეხედე: მაგასვე არ სცდილო-
ბენ?! თავ-პირს იმტვრევენ, ილახვენ, რომ ერ-
თმა მეორე შორს გააძევოს და თითონ ხელთ
იგდოს დედალი. დედალი ცხვარიც გულის ფან-
ცქალით, ტუჩთა ცმაცუნით და ენის სავსავით
გამარჯვებულ ყოჩს ქვეშ ეფინება. ქალი?!.. გა-
ნა ქალიც მაგავე გრძნობით არ ეგებება მამა-
კაცა?!

— გაჩუმდი, მალხაზ!..

— მე არ მინდა ცხოველს შეგადარო და
ამისთვის ჩემს მეტოქეს არ ვებრძვი... მშვიდო-
ბით იყავ და გისურვებ ყოველგვარ ბედნიე-
რებას... — ამ სიტყვის წარმოთქმის შემდეგ მალ-
ხაზა გატრიალდა და გული-კი ელეონორასთან
რჩებოდა.

— მალხაზ, მიყვარხარ!..

— ელეონორა, შენ ამბობ მაგას?! ჩემო,
ჩემო, გამაგონე კიდევ ეგ სიტყვა!..

— მიყვარხარ, მალხაზ!..

— ელეონორა, მრწამდა, შენ ადამიანი
იყავ და...

— არ გეყურება, რამდენი ხანია ვაბრავუნებ, მალხაზ!.. — შემოესმა ხმაურობა და კედლის ბრავუნი მეორე ოთახიდან...

— ჰა!.. — დაბნევით წამოიძახა, აქეთ-იქით მიიხედა და...

სინათლის მკრთალი ნათელი, თავის ოთახის კედლები თვალთ წაეჩირა, ბუხარიც-კი აღარ გუგუნებდა, ჩანელებულიყო. ელეონორა?!.

ელეონორას სიტყვები ისევ ყურში ესმოდა...

ამის შნახველს გული მოელაფნა და მწარე ლიმილით წამოიძახა: „სისულელეა! წრფელ გრძნობას მხოლოდ ოცნება აჯილდოვებს!..“

— არ გეყურება, მალხაზ!

— ეხლავე!.. განა დრო არის?!

— საკაა ახალი წელი ჩემსავით კარებს შეგვინძრევს... შენს მეტი ყველა აქ არის.

— მეც ეხლავ მოვალ და ვიყოჩაოთ!.. — უკანასკნელი სიტყვა თითონაც არ იცოდა, რად წარმოსთქვა, თუმცა-კი თავისდა უნებურად საყოჩაოდ მზადებას შეუდგა...



ශ අ ර න ම ප ම 0.

| | සටුරදී |
|--|--------|
| „අ ගුන්දා, අ ගා!“ | 5 |
| „මාමාස මිඩ් මිදායාලුගේ!“ | 25 |
| „පුදුලාං දාය්දාරුගේ!“ | 31 |
| „නිශ්චි බැඳු අ අ ගාස, උමුරුතෙ!“ | 49 |
| „වාං තුළු බැඳුවා!“ | 93 |
| „උමුරුතෙ, දායුලුවුස මුද්‍රා කාමාරුතාලා!“ | 105 |
| „මුණු, රිඛාතා ටුක්කුරුවා?!“ | 110 |
| „……ුෂු……ඩු!“ | 125 |
| „ද්‍රාදුලුත්, යුතාලු, ද්‍රාදුලුත්!“ | 128 |
| „මදුල්‍යාරුත්!“ | 138 |
| ශුරාලුවා නාදුලුයුරු | 146 |
| „නාදුලු-කු!“ | 151 |
| „දුදුලුවාම්!“ | 157 |
| „රා තිත්දෙත මියුක්කුරුවා?!“ | 167 |
| „ටුක්කුරුවාත්!“ | 177 |
| „නා, නා, නා, රා තුළුවා නාරු!“ | 205 |
| දුද්ධිජිරා දුදා | 212 |
| „තිතුලුවා!“ | 216 |

„ 2010 21 განვითარების მიმდევრობის სამსახური

კარლაგანის ეროვნული ბიბლიოთეკა



K 35.141/2